

સિરિ ઉસહદેવ સામિસ્સ ણમો । સિરિ ગોડી - જિરાઉલા - સવ્વોદયપાસણાહાણં ણમો । નમોડ્ધુયં સમણસ્સ ભગવઓ મહઇ મહાવીર વદ્ધમાણ સામિસ્સ । સિરિ ગોયમ - સોહમ્માઇ સવ્વ ગણહરાણં ણમો । સિરિ સુગુરુ - દેવાણં ણમો । પંચમગણ અજ્જસુહુમ્મથેર - **ભગવં પરંપરાસંકલિઅવાયણાણુગયં ભગવતીસુતં તિ પસિદ્ધનામગં પંચમં અંગં ક્કક્ક વિયાહપણ્ણત્તિસુતં ક્કક્ક** [સુતં ૧. સમગ્ગસુત્તમંગલં ] ૧. નમો અરહંતાણં । નમો સિદ્ધાણં । નમો આયરિયાણં । નમો ઉવજ્ઞાયાણં । નમો સવ્વસાહૂણં । નમોબંભીએ લિવીએ । [સુત્તાઇં ૨-૩. પઠમસતગસ્સ વિસયસૂચી મંગલં ચ] ૨. રાયગિહ ચલણ ૧ દુક્ખે ૨ કંઠપઓસે ય ૩ પગતિ ૪ પુઠવીઓ ૫ । જાવંતે ૬ નેરઇએ ૭ બાલે ૮ ગુરુએ ય ૯ ચલણાઓ ૧૦ ॥૧॥ ૩. નમો સુયસ્સ । [ સુતં ૪. પઠમુદ્દેસગઉવુઘાઓ ] ૪. ૧ તેણં કાલેણં તેણં સમણં રાયગિહે નામં નયરે હોત્થા । વણ્ણઓ । તસ્સ ણં રાયગિહસ્સ નગરસ્સ બહિયા ઉત્તરપુરત્થિમે દિસીભાગે ગુણસિલએ નામં ચેઇએ હોત્થા । ૨ તે ણં કાલેણં તેણં સમણં સમણે ભગવં મહાવીરે આઇગરે તિત્થગરે સહસંબુદ્ધે પુરિસુત્તમે પુરિસસીહે પુરિસવરપુંડરીએ પુરિસવરગંધહત્થી લોગણાહે લોગપ્પદીવે લોગપ્પજોયગરે અભયદયે ચક્ખુદયે મગ્ગદયે સરણદયે ધમ્મદેસએ ધમ્મસારહી ધમ્મવરચાઉરંતચક્કવટ્ટી અપ્પહિહયવરનાણ-દંસણધરે વિયટ્ઠઉમે જિણે જાવએ બુદ્ધે બોહએ મુત્તે મોયએ સવ્વણ્ણુ સવ્વદરિસી સિવમયલમરુજમણંતમક્રવયમવ્વાબાહં 'સિદ્ધિગતિ'નામધેયં ઠાણં સંપાવિકામે જાવ સમોસરણં । પરિસા નિગ્ગયા । ધમ્મો કહિઓ । પરિસા પઠિગયા । ૩ તેણં કાલેણં તેણં સમણં સમણસ્સ ભગવઓ મહાવીરસ્સ જેટ્ટે અંતેવાસી ઇંદમ્મતી નામં અણગારે ગોયમસગોત્તે ણં સત્તુસ્સેહે સમચઉરંસસંઠાણસંઠિએ વજ્જરિસભનારાયસંઘયણે કણગપુલગણિઘસપમ્હગોરે ઉગ્ગતવે દિત્તતવે તત્તતવે મહાતવે ઓરાલે ઘોરે ઘોરગુણે ઘોરતવસ્સી ઘોરબંભચેરવાસી ઉચ્છૂઠસરીરે સંઘિત્તવિપુલતેયલેસે ચઉદસપુઠ્ઠી ચઉનાણોવગએ સવ્વક્રવરસન્નિવાતી સમણસ્સ ભગવતો મહાવીરસ્સ અદૂરસામંતે ઉદ્ઠં જાણૂ અહોસિરે જ્ઞાણકોટ્ટેવગએ સંજમેણં તવસા અપ્પાણં ભાવેમાણે વિહરઇ । ૪ તએ ણં સે ભગવં ગોયમે જાયસહ્થે જાયસંસએ જાયકોઠ્ઠહલ્લે, ઉપ્પન્નસહ્થે ઉપ્પન્નસંસએ ઉપ્પન્નકોઠ્ઠહલ્લે, સંજાયસહ્થે સંજાયસંસએ સંજાયકોઠ્ઠહલ્લે, સમુપ્પન્નસહ્થે સમુપ્પન્નસંસએ સમુપ્પન્નકોઠ્ઠહલ્લે ઉદ્ઘાએ ઉદ્ઘેતિ, ઉદ્ઘાએ ઉદ્ઘોત્તા જેણેવ સમણે ભગવં મહાવીરે તેણેવ ઉવાગચ્છઇ, ઉવાગચ્છિત્તા સમણં ભગવં મહાવીરં તિક્કવુત્તો આયાહિણપયાહિણં કરેતિ, તિક્કવુત્તો આયાહિણપયાહિણં કરેત્તા વંદતિ, નમંસતિ, નચ્ચાસન્ને નાઇદૂરે સુસ્સૂસમાણે અભિમુહે વિણણં પંજલિયડે પજ્જુવાસમાણે એવં વદાસી [ ☆☆☆પઠમો ઉદ્દેસો 'ચલણં' ] [સુતં ૫. 'ચલમાણે ચલિએ' ઇચ્ચાઇં પદાણં એગટ્ટ-નાણટ્ટાઇપરૂવણા] ૫. ૧ સે નૂણં મંતે ! ચલમાણે ચલિતે ૧ ? ઉદીરિજ્જમાણે ઉદીરિતે ૨ ? વેઙ્ગમાણે વેઙ્ગ ૩ ? પહિજ્જમાણે પહીણે ૪ ? ઇજ્જમાણે ઇજ્જે ૫ ? મિજ્જમાણે મિજ્જે ૬ ? ડજ્જમાણે ડજ્જે ૭ ? મિજ્જમાણે મડે ૮ ? નિજ્જરિજ્જમાણે નિજ્જિણે ૯ ? હંતા ગોયમા ! ચલમાણે ચલિએ જાવ નિજ્જરિજ્જમાણે નિજ્જિણે । ૨ એ ણં મંતે ! નવ પદા કિં એગટ્ટા નાણાઘોસા નાણાવંજણા ઉદાહુ નાણટ્ટા નાણાઘોસા નાણાવંજણા ? ગોયમા ! ચલમાણે ચલિતે ૧, ઉદીરિજ્જમાણે ઉદીરિતે ૨ ? વેઙ્ગમાણે વેઙ્ગ ૩ ? પહિજ્જમાણે પહીણે ૪, એ ણં ચત્તારિ પદા એગટ્ટા નાણાઘોસા નાણાવંજણા ઉપ્પન્નપક્રવસ્સ । ઇજ્જમાણે ઇજ્જે ૧, મિજ્જમાણે મિજ્જે ૨, ડજ્જમાણે ડજ્જે, મિજ્જમાણે મડે, નિજ્જરિજ્જમાણે નિજ્જિણે, એ ણં પંચ પદા નાણટ્ટા નાણાઘોસા નાણાવંજણા વિગતપક્રવસ્સ । [સુતં ૬. ચઉવીસદંડકે ઠિઇપમ્મુઇવિસયે વિયારો ] ૬. (૧.૧) નેરઇયાણં મંતે ! કેવઇકાલં ઠિઈ પણ્ણત્તા ? ગોયમા ! જહન્નેણં દસ વાસસહસ્સાઇં, ઉક્કોસેણં તેત્તીસં સાગરોવમાઇં ઠિઈ પણ્ણત્તા । (૧.૨) નેરઇયા ણં મંતે ! કેવઇકાલસ્સ આણમંતિ વા પાણમંતિ વા ઋસસંતિ વા નીસસંતિ વા ? જહા ઋસાસપદે । (૧.૩) નેરઇયા ણં મંતે ! આહારટ્ટી જહા પણ્ણવણાએ પઠમએ આહારઉદ્દેસએ તથા ભાણિયવ્વં । ઠિતિ ઉસ્સાસાહારે કિં વા ડ્ઠહારેંતિ સવ્વઓ વા વિ । કતિભાગં સવ્વાણિ વ કીસ વ મુજ્જો પરિણમંતિ ? ॥૨॥ (૧.૪) નેરતિયાણં મંતે ! પુવ્વાહારિતા પોગ્ગલા પરિણતા ૧ ? આહારિતા આહારિજ્જમાણા પોગ્ગલા પરિણતા ૨ ? અણાહારિતા આહારિજ્જિસ્સમાણા પોગ્ગલા પરિણયા ૩ ? અણાહારિયા અણાહારિજ્જિસ્સમાણા પોગ્ગલા પરિણયા ૪ ? ગોયમા ! નેરતિયાણં પુવ્વાહારિતા પોગ્ગલા પરિણતા ૧, આહારિતા આહારિજ્જમાણા પોગ્ગલા પરિણતા પરિણમંતિ ય ૨, અણાહારિતા આહારિજ્જિસ્સમાણા પોગ્ગલા નો પરિણતા, પરિણમિસ્સંતિ ૩, અણાહારિયા અણાહારિજ્જિસ્સમાણા પોગ્ગલા નો પરિણતા, નો પરિણમિસ્સંતિ ૪ । (૧.૫) નેરઇયાણં મંતે ! પુવ્વાહારિયા પોગ્ગલા ચિતાં પુચ્છા । જહા

સૌજન્ય :- માતૃશ્રી રતનબેન કાનજી ખીમજી શાહ પરિવાર. બીકેશકુમાર, બીન્ટુબેન, શાંતિલાલ, સુકેશીબેન અંકુર અને શીખલ-રાયણા(કચ્છ)

परिणया तथा चिया वि । एवं उवचिता, उदीरिता, वदिता, निज्जिण्णा । गाहा-- परिणत चिता उवचिता उदीरिता वेदिया य निज्जिण्णा । एक्केक्कम्मि पदम्मी चउव्विहा पोग्गला होंति ॥३॥ (१.६) नेरइयाणं भंते ! कतिविहा पोग्गला भिज्जंति ? गोयमा ! कम्मदव्ववग्गणंअहिकिच्च दुविहा पोग्गला भिज्जंति । तं जहा— अणू चेव, बादरा चेव १ । नेरइयाणं भंते ! कतिविहा पोग्गला चिज्जंति ? गोयमा ! आहारदव्ववग्गणं अहिकिच्च दुविहा पोग्गला चिज्जंति । तं जहा— अणू चेव बादरा चेव २ । एवं उवचिज्जंति ३ । नेरइयाणं भंते ! कतिविहे पोग्गले उदीरेंति ? गोयमा ! कम्मदव्ववग्गणं अहिकिच्च दुविहे पोग्गले उदीरेंति । तं जहा— अणू चेव बादरे चेव ४ । एवं वेदेंति ५ । निज्जरेंति ६ । ओयट्टेंसु ७ । ओयट्टेंति ८ । ओयट्टिस्संति ९ । संकामिंसु १० । संकामेंति ११ । संकामिस्संति १२ । निहत्तिसु १३ । निहत्तेंति १४ । निहत्तिस्संति १५ । निकायंसु १६ । निकाएंति १७ । निकाइस्संति १८ । सव्वेसु वि कम्मदव्ववग्गणमहिकिच्च । गाहा— भेदित चिता उवचिता उदीरिता वेदिया य निज्जिण्णा । ओयट्टण -संकामण -निहत्तण -निकायणे तिविहे कालो ॥४॥ (१.७) नेरइयाणं भंते ! जे पोग्गले तेयाकम्मत्ताए गेण्हंति ते किं तीतकालसमए गेण्हंति ? पडुप्पन्नकालसमए गेण्हंति ? अणागतकालसमए गेण्हंति ? गोयमा ! नो तीतकालसमए गेण्हंति, पडुप्पन्नकालसमए गेण्हंति, नो अणागतकालसमए गेण्हंति १ । (१.८) नेरइयाणं भंते ! जे पोग्गले तेयाकम्मत्ताए गहिए उदीरेंति ते किं तीतकालसमयगहिते पोग्गले उदीरेंति ? पडुप्पन्नकालसमयघेप्पमाणे पोग्गले उदीरेंति ? गहणसमयपुरेक्खडे पोग्गले उदीरेंति ? गोयमा ! तीयकालसमयगहिए पोग्गले उदररेंति, नो पडुप्पन्नकालसमयघेप्पमाणे पोग्गले उदीरेंति, नो गहणसमयपुरेक्खडे पोग्गले उदीरेंति २ । एवं वेदेंति ३, निज्जरेंति ४ । (१.९) नेरइयाणं भंते ! जीवातो किं चलियं कम्मं बंधंति ? अचलियं कम्मं बंधंति ? गोयमा ! नो चलियं कम्मं बंधंति, अचलितं कम्मं बंधंति १ । एवं उदीरेंति २ वेदेंति ३ ओयट्टेंति ४ संकामेंति ५ निहत्तेंति ६ निकाएंति ७ । सव्वेसु णो चलियं, अचलियं । (१.१०) नेरइयाणं भंते ! जीवातो किं चलियं कम्मं निज्जरेंति अचलियं कम्मं निज्जरेंति ? गोयमा ! चलियं कम्मं निज्जरेंति, नो अचलियं कम्मं निज्जरेंति ८ । गाहा— बंधोदय-वेदोव्वट्ट-संकमे तह निहत्तण -निकाए । अचलियं कम्मं तु भवे चलितं जीवाउ निज्जरए ॥५॥ (२.१) असुरकुमाराणं भंते ! केवइयं कालं ठिती पण्णत्ता ? जहन्नेणं दस वाससहस्साइं, उक्कोसेणं सातिरेगं सागरोवमं । (२.२) असुरकुमाराणं भंते ! केवइकालस्स आणमंति वा ४ ? गोयमा ! जहन्नेणं सत्तण्हं थोवाणं उक्कोसेणं साइरेगस्स पक्खस्स आणमंति वा ४ । (२.३) असुरकुमाराणं भंते ! आहारट्टी ? हंता, आहारट्टी ? (२.४) असुरकुमाराणं भंते ! केवइकालस्स आहारट्टे समुप्पज्जइ ? गोयमा ! असुरकुमाराणं दुविहे आहारे पण्णत्ते । तं जहा— आभोगनिव्वत्तिए य, अणाभोगनिव्वत्तिए य । तत्थ णं जे से अणाभोगनिव्वत्तिए से अणुसमयं अविरहिए आहारट्टे समुप्पज्जइ । तत्थ णं जे से आभोगनिव्वत्तिए से जहन्नेणं चउत्थभत्तस्स, उक्कोसेणं साइरेगस्स वाससहस्सस्स आहारट्टे समुप्पज्जइ । (२.५) असुरकुमाराणं भंते ! किं आहारं आहारेंति ? गोयमा ! दव्वओ अणंतपएसियाइं दव्वाइं, खित्त-काल-भावा पण्णवणागमेणं । सेसं जहा नेरइयाणं जाव ते णं तेसिं पोग्गला कीसत्ताए भुज्जो भुज्जो परिणमंति ? गोयमा ! सोइंदियत्ताए ५ सुरूवत्ताए सुवण्णत्ताए इट्टत्ताए इच्छियत्ताए अभिज्झियत्ताए, उट्टत्ताए, णो अहत्ताए, सुहत्ताए, णो दुहत्ताए भुज्जो भुज्जो परिणमंति । (२.६) असुरकुमाराणं पुव्वाहारिया पुग्गला परिणया ? असुरकुमाराभिलावेणं जहा नेरइयाणं जाव चलियं कम्मं निज्जरंति । (३.१) नागकुमाराणं भंते ! केवइयं कालं ठिती पण्णत्ता ? गोयमा ! जहन्नेणं दस वाससहस्साइं, उक्कोसेणं देसूणाइं दो पलिओवमाइं । (३.२) नागकुमाराणं भंते ! केवइकालस्स आणमंति वा ४ ? गोयमा ! जहन्नेणं सत्तण्हं थोवाणं, उक्कोसेणं मुहुत्तपुहत्तस्स आणमंति वा ४ । (३.३) नागकुमाराणं भंते ! आहारट्टी ? हंता, गोयमा ! आहारट्टी । (३.४) नागकुमाराणं भंते ! केवइकालस्स आहारट्टे समुप्पज्जइ ? गोयमा ! नागकुमाराणं दुविहे आहारे पण्णत्ते । तं जहा—आभोगनिव्वत्तिए य अणाभोगनिव्वत्तिए य । तत्थ णं जे से अणाभोगनिव्वत्तिए से अणुसमयं अविरहिए आहारट्टे समुप्पज्जइ, तत्थ णं जे से आभोगनिव्वत्तिए से जहन्नेणं चउत्थभत्तस्स, उक्कोसेणं दिवसपुहत्तस्स आहारट्टे समुप्पज्जइ । सेसं जहा असुरकुमाराणं जाव चलियं कम्मं निज्जरेंति, नो अचलियं कम्मं निज्जरेंति । (४-११) एवं सुवण्णकुमाराण वि जाव थणियकुमाराणं ति । (१२.१) पुढविक्काइयाणं भंते ! केवइयं कालं ठिती पण्णत्ता ? गोयमा ! जहन्नेणंअंतोमुहुत्तं, उक्कोसेणं

बावीसं वाससहस्साइं । (१२.२) पुढविकाइया केवइकालस्स आणमंति वा ४ ? गोयमा ! वेमायाए आणमंति वा ४ । (१२.३) पुढविकाइया आहारट्टी ? हंता, आहारट्टी । (१२.४) पुढविकाइयाणं केवइकालस्स आहारट्टे समुप्पज्जइ ? गोयमा ! अणुसमयं अविरहिए आहारट्टे समुप्पज्जइ । (१२.५) पुढविकाइया किं आहारं आहारंति ? गोयमा ! दव्वओ जहा नेरइयाणं जाव निव्वाघाएणं छद्दिसिं; वाघायं पडुच्च सिय तिदिसिं, सिय चउद्दिसिं सिय पंचदिसिं । वण्णओ काल-नील-लोहित-हालिद्द-सुक्किलाणि । गंधओ सुब्भिगंध २, रसओ तित्त ५, फासओ कक्खड ८ । सेसं तहेव । नाणत्तं कतिभागं आहारंति ? कइभागं फासादेति ? गोयमा ! असंखिज्जभागं आहारंति, अणंतभागं फासादेति जाव ते णं तेसिं पोग्गला कीसत्ताए भुज्जो भुज्जो परिणामंति ? गोयमा ! फासिंदियवेमायत्ताए भुज्जो भुज्जो परिणमंति । सेसं जहा नेरइयाणं जाव चलियं कम्मं निज्जरेति, नो अचलियं कम्मं निज्जरेति । (१३-१६) एवं जाव वणस्सइकाइयाणं । नवरं ठिती वण्णेयव्वा जा जस्स, उस्सासो वेमायाए । (१७.१) बेइंदियाणं ठिई भाणियव्वा । ऊसासो वेमायाए । (१७.२) बेइंदियाणं आहारे पुच्छा । अणाभोगनिव्वत्तिओ तहेव । तत्थ णं जे से आभोगनिव्वत्तिए से णं असंखेज्जसमइए अंतोमुहुत्तिए वेमायाए आहारट्टे समुप्पइ । सेसं तहेव जाव अणंतभागं आसायंति । (१७.३) बेइंदिया णं भंते ! जे पोग्गले आहारत्ताए गेण्हंति ते किं सव्वे आहारंति ? नो सव्वे आहारंति गोयमा ! बेइंदियाणं दुविहे आहारे पण्णत्ते । तं जहा— लोमाहारे पक्खेवाहारे य । जे पोग्गले लोमाहारत्ताए गिहणंति ते सव्वे अपरिसेसिए आहारंति जे पोग्गले पक्खेवाहारत्ताए गिहंति तेसिं णं पोग्गलाणं असंखिज्जभागं आहारंति, अणेगाइं चणं भागसहस्साइं अणासाइज्जमाणाइं अफासाइज्जमाणाइं विद्धंसमागच्छंति । (१७.४) एतिसिं णं भंते ! पोग्गलाणं अणासाइज्जमाणाणं अफासाइज्जमाणाणं य कयरे कयरेहंतो अप्पा वा ४ ? गोयमा ! सव्वत्थोवा पोग्गला अणासाइज्जमाणा, अफासाइज्जमाणा अणंतगुणा । (१७.५) बेइंदिया णं भंते ! जे पोग्गले आहारत्ताए गिहंति ते णं तेसिं पोग्गला कीसत्ताए भुज्जो भुज्जो परिणमंती ? गोयमा ! जिब्भिंदिय-फासिंदिय- वेमायत्ताए भुज्जो भुज्जो परिणमंति । (१७.६) बेइंदियाणं भंते ! पुव्वाहारिया पोग्गला परिणया तहेव जाव चलियं कम्मं निज्जरेति । (१८-१९.१) तेइंदिय-चउरिंदियाणं णाणत्तं ठितीए जाव णेगाइं च णं भागसहस्साइं अणाघाइज्जमाणाइं अणासाइज्जमाणाइं अफासज्जमाणाइं विद्धंसमागच्छंति । (१८-१९.२) एतेसिं णं भंते ! पोग्गलाणं अणाघाइज्जमाणाणं ३, ० पुच्छा । गोयमा ! सव्वत्थोवा पोग्गला अणाघाइज्जमाणा, अणासाइज्जमाणा अणंतगुणा, अफासाइज्जमाणं अणंतगुणा । (१८.३) तेइंदियाणं घाणिंदिय - जिब्भिंदिय - फासिंदियत्ताए भुज्जो भुज्जो परिणमंति । (१९.३) चउरिंदियाणं चक्खिंदिय - घाणिंदिय - जिब्भिंदिय - फासिंदियत्ताए भुज्जो भुज्जो परिणयंति । (२०) पंचिंदियतिरिक्खजोणियाणं ठितिं भाणिरुण ऊसासो वेमायाए । आहारो अणाभोगनिव्वत्तिओ अणुसमयं अविरहिओ । आभोगनिव्वत्तिओ जहन्नेणं अंतोमुहुत्तस्स, उक्कोसेणं उट्ठमत्तस्स । सेसं जहा चउरिंदियाणं जाव चलियं कम्मं निज्जरेति । (२१) एवं मणुस्साण वि । नवरं आभोगनिव्वत्तिए जहन्नेणं अंतोमुहुत्तं, उक्कोसेणं अट्ठमत्तस्स । सोइंदिय ५ वेमायत्ताए भुज्जो भुज्जो परिणमंति । सेसं तहेव जाव निज्जरेति । (२२) वाणमंतराणं ठिईए नाणत्तं । अवसेसं जहा नागकुमाराणं (सु. ६ (३) । (२३) एवं जोइसियाण वि । नवरं उस्सासो जहन्नेणं मुहुत्तपुहत्तस्स, उक्कोसेण वि मुहुत्तपुहत्तस्स । आहारो जहन्नेणं दिवसपुहत्तस्स, उक्कोसेणं वि दिवसपुहत्तस्स । सेसं तहेव । (२४) वेमाणियाणं ठिती भाणियव्वा ओहिया । ऊसासो मुहुत्तपुहत्तस्स, उक्कोसेणं तेत्तीसाए पक्खाणं । आहारो आभोगनिव्वत्तिओ जहन्नेणं दिवसापुहत्तस्स, उक्कोसेणं तेत्तीसाए वाससहस्साणं । सेसं तहेव जाव निज्जरेति । [सु. ७ जीवेषु आरंभपरूवणा] ७ (१) जीवा णं भंते ! किं आयारंभा ? परारंभा ? तदुभयारंभा ? अणारंभा ? गोयमा ! अत्थेगइया जीवा आतारंभा वि, परारंभा वि, तदुभयारंभा वि, नो अणारंभा । अत्थेगइया जीवा नो आयारंभा, नो परारंभा, नो तदुभयारंभा, अणारंभा । २ से केणट्टेणं भंते ! एवं वुच्चति- अत्थेगइया जीवा आयारंभा वि ? एवं पडिउच्चरितव्वं । गोयमा ! जीवा दुविहा पण्णत्ता । तं जहा— संसारसमावन्नगा य असंसारसमावन्नगा य । तत्थ णं जे ते असंसारसमावन्नगा ते णं सिद्धा, सिद्धा णं नो आयारंभा जाव अणारंभा । तत्थ णं जे ते संसारसमावन्ना ते दुविहा पण्णत्ता । तं जहा— संजता य, असंजता य । तत्थ णं जे ते (२) संजता ते दुविहा पण्णता । तं जहा-पमत्तसंजताय, आपमत्तसंजताय । तत्थ णं जे ते अप्पमत्तसंजता ते णं नो

आयारंभा, नो परारंभा, जाव अणारंभा । तत्थ णं जे ते पमत्तसंजया ते सुभं जोगं पडुच्च नो आयारंभा जाव अणारंभा । (३) असुभं जोगं पडुच्च आयारंभा वि जाव नो अणारंभा तत्थ णं जे ते असंजया ते अविरतिं पडुच्च आयारंभा वि जाव नो अणारंभा । से तेणट्टेणं गोयमा ! एवं वुच्चइ-अत्थेगइया जीवा जाव अणारंभा । [सु. ८ चउवीसदंडकेसु आरंभपरूवणा] ८. (१) नेरइया णं भंते ! किं आयारंभा ? परारंभा ? तदुभयारंभा ? अणारंभा ? गोयमा ! नेरइया आयारंभा वि जाव नो अणारंभा । से केणट्टेणं ? गोयमा ! अविरतिं पडुच्च । से तेणट्टेणं जाव नो अणारंभा । (२-२०) एवं जाव असुरकुमारा वि, जाव पंचिंदियतिरिक्खजोणिया । (२१) मणुस्सा जथा जीवा । नवरं सिद्धविरहिता भाणियव्वा । (२२-२४) वाणमंतरा जाव वेमाणिया जथा नेरतिया । [सु. ९ सलेसेसु जीवेसु आरंभपरूवणा] ९. (१) सलेसा जथा ओहिया (सु.७) । (२) किणहलेस- नीललेस -काउलेसा जथा ओहिया जीवा, नवरं पमत्तअप्पमत्ता न भाणियव्वा । तेउलेसा पम्हलेसा सुक्कलेसा जथा ओहिया जीवा (सु.७), नवरं सिद्धा न भाणितव्वा । [सु. १०. भवं पडूच्च णाणाइपरूवणा ] १०. (१) इहभविए भंते ! नाणे ? परभविए नाणे ? तदुभयभविए नाणे ? गोयमा ! इहभविए वि नाणे, परभविए वि नाणे, तदुभयभविए वि नाणे । (२) दंसणं पि एवमेव । ३ इहभविए भंते ! चरित्ते ? परभविए चरित्ते ? तदुभयभविए जरित्ते ? गोयमा ! इहभविए चरित्ते, नो परभविए चरित्ते, नो तदुभयभविए चरित्ते । (४) एवं तवे, संजमे । [सु. ११. असंवुड-संवुडसिञ्झणावियारो ] ११. (१) असंवुडे णं भंते ! अणगारे किं सिञ्झति ? बुञ्झति ? मुच्चति ? परिनिव्वाति ? सव्वदुक्खाणमंतं करेति ? गोयमा ! नो इणट्टे समट्टे । से केणट्टेणं जाव नो अंतं करेइ ? गोयमा ! असंवुडे अणगारे आउयवज्जाओ सत्त कम्मपगडीओ (४) सिढिलबंधणबद्धाओ घणियबंधणबद्धाओ पकरेति हस्सकालट्टितायाओ दीहकालट्टितीयाओ पकरेति, मंदाणुभागाओ तिक्वाणुभागाओ पकरेति, अप्पपदेसग्गाओ बहुप्पदेसग्गाओ पकरेति, आउगं च णं कम्मं सिय बंधति, सिय नो बंधति, अस्सातावेदणिज्जं च णं कम्मं भुज्जो भुज्जो उवचिणाति, अणादीयं च णं अणवदग्गं दीहमद्धं चाउरंतं संसारकंतारं अणुपरियट्टइ । से तेणट्टेणं गोयमा ! असंवुडे अणगारे नो सिञ्झति ५ । (२) संवुडे णं भंते ! अणगारे सिञ्झति ५ ? हंता, सिञ्झति जाव अंतं करेति । से केणट्टेणं ? गोयमा ! संवुडे अणगारे आउयवज्जाओ सत्त कम्मपगडीओ धणियबंधणबद्धाओ सिढिलबंधणबद्धाओ पकरेति, दीहकालट्टितीयाओ हस्सकालट्टितीयाओ पकरेति, तिक्वाणुभागाओ मंदाणुभागाओ पकरेति, बहुपएसग्गाओ अप्पपएसग्गाओ पकरेति, आउयं च णं कम्मं न बंधति, अस्सायावेयणिज्जं च णं कम्मं नो भुज्जो भुज्जो उवचिणाति, अणादीयं च णं अणवदग्गं दीहमद्धं चाउरंतं संसारकंतारं वीतीवयति । से तेणट्टेणं गोयमा ! एवं वुच्चइ -संवुडे अणगारे सिञ्झति जाव अंतं करेति । [सु. १२. असंजतजीवदेवगइवियारो, वाणमंतरदेवलोसखं च] १२. (१) जीवे णं भंते ! असंजते अविरते अप्पडिहयपच्चक्खायपावकम्मे इतो चुए पेच्चा देवे सिया ? गोयमा ! अत्थेगइए देवे सिया । अत्थेगइए नो देवे सिया से केणट्टेणं जाव इतो चुए पेच्चा अत्थेगइए देवे सिया, अत्थेगइए नो देवे सिया ? गोयमा ! जे इमे जीवा गामाऽऽगर-नगर-निगम -रायहाणि-खेड -कब्बड -मंडब -दोणमुह -पट्टणाऽऽसम -सन्निवेसेसु अकामतण्हाए अकामछुहाए अकामबंधेचरवासेणं अकामअण्हाणगसेय -जल्ल -मल -पंकपरिदाहेणं अप्पतरो वा भुज्जतरो वा कालं अप्पाणं परिकिलेसंति, अप्पाणं परिकिलेसइत्ता कालमासे कालंकिच्चा अन्नतरेसु वाणमंतरेसु देवलोगेसु देवत्ताए उवत्तारो भवंति । (२) केरिसा णं भंते ! तेसिं वाणमंतराणं देवाणं देवलोगा पण्णत्ता ? गोयमा ! से जहानामए इहं असोगवणे इ वा, सत्तवण्णवणे इ वा, चंपगवणे इ वा, चूतवणे इ वा, तिलगवणे इ वा, लउयवणे ति वा, णिग्गोहवणे इ वा, छत्तोववणे इ वा, असणवणे इ वा, सणवणे इ वा, अयसिवणे इ वा, कुसुभंवणे इ वा, सिद्धत्थवणे इ वा, बंधुजीवगवणे इ वा णिच्चं कुसुमितमाइतलवइतथइयगुलुइतगुच्छित्तजमलितजुवलितविणमित-पणमितसुविभत्तपिंडिमंजरिवडेंसगधरे सिरीए अईव अईव उवसोभेमाणे उवसोभेमाणे चिद्धति, एवामेव तेसिं वाणमंतराणं देवाणं देवलोगा जहन्नेणं दसवाससहस्सट्टितीएहिं उक्कोसेणं पलिओवमट्टितीएहिं बहूहिं वाणमंतरेहिं देवेहिं य देवीहि य आइण्णा वितिकिण्णा उवत्थडा संथाडा फुडा अवगाढागाढसिरीए अतीव अतीव उवसोभेमाणा चिद्धति । एरिसगा णं गोतमा ! तेसिं वाणमंतराणं देवाणं देवलोगा पण्णत्ता । से तेणट्टेणं गोतमा ! एवं वुच्चति -जीवे णं अस्संजए जाव देवे सिया । सेवं भंते ! सेवं भंते ! त्ति भगवं गोतमे समणं भगवं महावीरं वंदति नमंसति नमंसित्ता संजमेणं तवसा अप्पाणं भावेमाणे

विहरति । ☆ ☆ ☆ ॥ पढमे सते पढमो उद्देसो ॥ ☆ ☆ ☆ बितिओ उद्देसो 'दुक्खे' ☆ ☆ ☆ [सु. १. उवक्कमो ] १. रायगिहे नगरे समोसरणं । परिसा निग्गता जाव एवं वदासी— [सु. २-३. जीवं पडुच्च एगत्त-पुहत्तेणं दुक्खवेदणपरूवणं] २. जीवे णं भंते ! सयंकडं दुक्खं वेदेति ? गोयमा ! अत्थेगइयं वेदेति, अत्थेगइयं नो वेदेति ? गोयमा ! उदिण्णं वेदेति, अणुदिण्णं नो वेदेति, से तेणट्टेणं एवं वुच्चति— अत्थेगइयं वेदेति, अत्थेगइयं नो वेदेति । एवं चउव्वीसदंडएणं जाव वेमाणिए । (३). जीवा णं भंते सयंकडं दुक्खं वेदेति ? गोयमा ! अत्थेगइयं वेदेति, अत्थेगइयं णो वेदेति । से केणट्टेणं ? गोयमा ! उदिण्णं वेदेति, नो अणुदिण्णं वेदेति, से तेणट्टेणं एवं जाव वेमाणिया । [सु. ४. जीवं पडुच्च एगत्त-पुडुत्तेणं आउयवेदेणपरूवणं ] ४. जीवे णं भंते ! सयंकडं आउयं वेदेति ? गोयमा ! अत्थेगइयं वेदेति ० जथा दुक्खेणं दो दंडगा तहा आउएण वि दो दंडगा एगत्त-पोहत्तिया; एगत्तेणं जाव वेमाणिया, पुहत्तेण वि तहेव । [सु. ५-११. चउवीसदंडएसु समाहाराइसत्तदारपरूवणं] ५. (१) नेरइयाण भंते ! सव्वे समाहारा, सव्वे समसरीरा, सव्वे समुस्सा-नीसासा ? गोयमा ! नो इमट्टे समट्टे । से केणट्टेणं भंते ! एवं वुच्चति -नेरइया नो सव्वे समाहारा, नो सव्वे समसरीरा, नो सव्वे समुस्सास -निस्सासा ? गोयमा ! नेरइया दुविहा पण्णत्ता । तं जहा— महासरीरा य अप्पसरीरा य । तत्थ णं जे ते महासरीरा ते (१) बहुतराए पोग्गले आहारेति बहुतराए पोग्गले परिणामेति बहुतराए पोग्गले उस्ससंति बहुतराए पोग्गले नीससंति, अभिक्खणं आहारेंति, अभिक्खणं परिणामेति, अभिक्खणं ऊससंति, अभिक्खणं निस्ससंति । तत्थ णं जे ते अप्पसरीरा ते णं अप्पतराए पोग्गले (२) आहारेंति अप्पतराए पुग्गले परिणामेति अप्पराए पोग्गले उस्ससंति अप्पतराए पोग्गले । नीससंति, आहच्च आहारेंति, आहच्च परिणामेति, आहच्च उस्ससंति, आहच्च नीससंति । से तेणट्टेणं गोयमा ! एवं वुच्चइ- नेरइया नो सव्वे समाहारा जाव नो सव्वे समुस्सास -निस्सासा ॥१। २ नेरइया णं भंते ! सव्वे समक्कमा ? गोयमा ! णो इमट्टे समट्टे । से केणट्टेणं ? गोयमा ! नेरइया दुविहा पण्णत्ता । तं जहा— पुव्वोववन्नगा य पच्छोववन्नगा य । तत्थ णं जे ते पुव्वोववन्नगा ते णं अप्पक्कम्मतरागा । तत्थ णं जे ते पच्छोववन्नगा ते णं महाक्कम्मतरागा । से तेणट्टेणं गोयमा ! ० ।२। ३ नेरइया णं भंते ! सव्वे समवण्णा ? गोयमा ! नो इणट्टे समट्टे । से केणट्टेणं तहा चेव ? गोयमा ! जे ते पुव्ववन्नगा ते णं विसुद्धवण्णतरागा तहेव से तेणट्टेणं ० ।३। ४ नेरइया णं भंते ! सव्वे समलेसा ? गोयमा ! नो इणट्टे समट्टे । से केणट्टेणं जाव नोसव्वे समलेसा ? गोयमा ! नेरइया दुविहा पण्णत्ता । तं जहा— पुव्वोववन्नगा य पच्छोववन्नगा य । तत्थ णं जे ते पुव्वोववन्नगा ते णं विसुद्धलेसतरागा । (३) तत्थ णं जे ते पच्छोववन्नगा ते णं अविस्सुद्धलेसतरागा । से तेणट्टेणं ० ।४। ५ नेरइया णं भंते ! सव्वे समवेदणा ? गोयमा ! नो इणट्टे समट्टे । से केणट्टेणं ? गोयमा ! नेरइया दुविहा पण्णत्ता । तं जहा— सण्णिभूया य असण्णभूया य । तत्थ णं जे ते सण्णिभूया ते णं महावेयणा, तत्थ णं जे ते असण्णिभूया ते णं अप्पवेयणतरागा । से तेणट्टेणं गोयमा ! ० ।५। ६ नेरइया णं भंते ! सव्वे समकिरिया ? गोयमा ! नो इणट्टे समट्टे । से केणट्टेणं ? गोयमा ! नेरइया तिविहा पण्णत्ता । तं जहा— सम्मद्विटी मिच्छादिटी सम्मामिच्छद्विटी । तत्थ णं जे ते सम्मामिच्छादिटी तेसि णं चत्तारि किरियाओ पण्णत्ताओ, तं जहा— आरंभिया १ पारिग्गहिया २ मायावत्तिया ३ अप्पक्ख्वाणकिरिया ४ । तत्थ णं जे ते मिच्छादिटी तेसि णं पंच किरियाओ कज्जंति, तं जहा— आरंभिया जाव मिच्छादंसणवत्तिया एवंसम्मामिच्छादिट्टिणं पि । से तेणट्टेणं गोयमा ! ० ।६। ७ नेरइया णं भंते ! सव्वे समाउया ? सव्वे समोववन्नगा ? गोयमा ! णो इणट्टे समट्टे । से केणट्टेणं ? गोयमा ! नेरइया चउव्विहा पण्णत्ता तं जहा— अत्थेगइया समाउया समोववन्नगा १, अत्थेगइया समाउया विसमोववन्नगा २, अत्थेगइया विसमाउया विसमोववन्नगा ३, अत्थेगइया विसमाउया विसमोववन्नगा ४ । से तेणट्टेणं गोयमा ! ० ।७। ६. (१) असुरकुमारा णं भंते ! सव्वे समाहारा ? सव्वे समसरीरा ? जथा नेरइया तथा भाणियव्वा । नवरं कम्म -वण्ण -लेसाओ परित्थल्लेयव्वाओ -पुव्वोववन्नगा महाक्कम्मतरागा, अविस्सुद्धवण्णतरागा, अविस्सुद्धलेसतरागा । पच्छोववन्नगा पसत्था । सेसं तहेव । (२) एवं जाव थणियकुमारा । ७. (१) पुढविकाइयाणं आहार -कम्म -वण्ण -लेस्सा जहा नेरइयाणं । (२) पुढविकाइया णं भंते ! सव्वे समवेदणा ? हंता, समवेयणा । से केणट्टेणं ? गोयमा ! पुढविकाइया सव्वे असण्णी

असण्णिभूतं अण्णिदाए वेयणं वेदेंति । से तेणट्टेणं ० । (३) पुढविक्कइया णं भंते ! समकिरिया ? हंता, समकिरिया । से केणट्टेणं गोयमा ! पुढविकाइया सव्वे माईमिच्छदिट्ठी, ताणं नेयतियाओ पंच किरियाओ कज्जंति, तं जहा— आरंभिया १ जाव मिच्छदंसणवत्तिया ५ । से तेणट्टेणं ० समकिरिया । (४) समाउया, समोववन्नगा जथा नेरइया तथा भाणियव्वा । ८. जथा पुढविक्काइया तथा जाव चउरिंदिया । ९. (१) पंचिंदियतिरिक्खजोणिया जहा नेरइया । नाणत्तं किरियासु— २ पंचिंदियतिरिक्खजोणिया णं भंते ! सव्वे समकिरिया ? गोयमा ! णो इणट्टे समट्टे । से केणट्टेणं ? गोयमा ! पंचिंदियतिरिक्खजोणिय तिविधा पण्णत्ता । तं जहा— सम्मद्दिट्ठी, मिच्छादिट्ठी, सम्मामिच्छादिट्ठी ! तत्थ णं जे ते सम्मद्दिट्ठी ते दुविहा पण्णत्ता, तं जहा— अस्संजता य, संजताऽसंजता य । तत्थ णं जे ते संजताऽसंजता तेसि णं तिन्नि किरियाओ कज्जंति, तं जहा— आरंभिया १ पारिण्हिया २ मायावत्तिया ३ । असंजताणं चत्तारि । मिच्छादिट्ठीणं पंच । सम्मामिच्छादिट्ठीणं पंच । १०. (१) मणुस्सा जहा नेरइया (सु.५) नाणत्तं- जे महासरीरा ते आहच्च आहारेंति । जे अप्पसरीरा ते अभिक्खणं आहारेंति ४ । सेसं जहा नेरइयाणं जाव वेयणा । (२) मणुस्सा णं भंते ! सव्वे समकिरिया ? गोयमा ! णो इणट्टे समट्टे । से केणट्टेणं ? गोयमा ! मणुस्सा तिविहा पण्णत्ता । तं जहा— सम्मद्दिट्ठी मिच्छादिट्ठी सम्मामिच्छादिट्ठी । तत्थ णं जे ते सम्मद्दिट्ठी ते तिविधा पण्णत्ता, तं जहा— संजता अस्संजता संजतासंजता य । तत्थ णं जे ते संजता ते दुविहा पण्णत्ता, तं जहा— सरागसंजता य वीतरागसंजता य । तत्थ णं जे ते वीतरागसंजता ते णं अकिरिया । तत्थ णं जे ते सरागसंजता ते दुविहा पण्णत्ता, तं जहा— पमचसंजता य अपमत्तसंजता य । तत्थ णं जे ते पमत्तसंजता तेसि णं एगा मायावत्तिया किरिया कज्जति । तत्थ णं जे ते पमत्तसंजता तेसि णं दो किरियाओ कज्जंति, तं ०— आरंभिया य १ मायावत्तिया य २ । तत्थ णं जे ते संजतासंजता तेसि णं आइल्लाओ तिन्नि किरियाओ कज्जंति । अस्संजताणं चत्तारि किरियाओ कज्जंति— आरं ० ४ । मिच्छादिट्ठीणं पंच । सम्मामिच्छादिट्ठीणं पंच ५ । ११. वाणमंतर -जोतिस -वेमाणिया जहा असुरकुमारा (सु. ६) । नवरं वेयणाए नाणत्तं-मायामिच्छादिट्ठीउववन्नगा य अप्पवेदणतरा, अमायिसम्मद्दिट्ठीउववन्नगा य महावेयणतरागा भाणिय जोतिस-वेमाणिया । [सु. १२. चउवीसदंडएसु लेसं पडुच्च समाहाराइसत्तदारपरूवणं] १२. सलेसा णं भंते ! नेरइया सव्वे समाहारगा ? ओहियाणं, सलेसाणं, सुक्कलेसाणं, एसि णं तिण्हं एक्को गमो । कण्हलेस-नीललेसाणं पि एक्को गमो, नवरं वेदणाए - मायिमिच्छादिट्ठीउववन्नगा य, अमायिसम्मद्दिट्ठीउववण्णगा य भाणियव्वा । मणुस्सा किरियासु सराग-वीयराग -पमत्तापमत्ता ण भाणियव्वा । काउलेसाण वि एसेव गमो, नवरं नेरइए जहा ओहिए दंडए तथा भाणियव्वा । तेउलेसा पम्हलेसा जस्स अत्थि जहा ओहियो दंडओ तथा भाणियव्वा, नवरं मणुस्सा सरागा वीयरागा य न भाणियवा । गाहा— दुक्खाऽऽउए उदिण्णे, आहारे, कम्म-वण्ण-लेस्सा य । समवेदण समकिरिया समाउए चेव बोद्धव्व ॥१॥ [सु. १३. लेसाभेयपरूवणं] १३. कति णं भंते ! लेसाओ पण्णत्ताओ ? गोयमा छल्लेसाओ पण्णत्ताओ । तं जहा— लेसाणं बीओ उद्देसओ भाणियव्वो जाव इट्ठी [सु. १४-१७. जीवाईणं संसारसंचिट्ठणकालस्स भेय -पभेया अप्पाबहुयं च] १४. जीवस्स णं भंते ! तीतद्धाए आदिट्ठस्स कइविहे संसारसंचिट्ठणकाले पण्णत्ते ? गोयमा ! चउव्विहे संसारसंचिट्ठणकाले पण्णत्ते । तं जहा— णेरइयासंसारसंचिट्ठणकाले, तिरिक्खजोणियसंसारसंचिट्ठणकाले, मणुस्ससंसारसंचिट्ठणकाले, देवसंसारसंचिट्ठणकाले य पण्णत्ते । १५. (१) नेरइयसंसारसंचिट्ठणकाले णं भंते ! कतिविहे पण्णत्ते ? गोयमा ! तिविहे पण्णत्ते । तं जहा— सुन्नकाले, असुन्नकाले मिस्सकाले । २ तिरिक्खजोणियसंसारसंचिट्ठणकाले पुच्छा । गोयमा ! दुविहे पण्णत्ते । तं जहा— असुन्नकाले य मिस्सकाले य । ३ मणुस्साण य, देवाण य जहा नेरइयाणं । १६. (१) एयस्स णं भंते ! नेरइयसंसारसंचिट्ठणकालस्स सुन्नकालस्स असुन्नकालस्स मीसकालस्स य कयरे कयरेहिंतो अप्पे वा, बहुए वा तुल्ले वा, विसेसाहिए वा, गोयमा ! सव्वत्थोवे असुन्नकाले, मिस्सकाले अणंतगुणे, सुन्नकाले अणंतगुणे । २ तिरिक्खजोणियाणं सव्वत्थोवे असुन्नकाले मिस्सकाले अणंतगुणे । ३ मणुस्स-देवाण य जहा नेरइयाणं । १७. एयस्स णं भंते ! नेरइयसंसारसंचिट्ठणकालस्स जाव देवसंसारसंचिट्ठण जाव विसेसाधिए वा ? गोयमा ! सव्वत्थोवे मणुस्ससंसारसंचिट्ठणकाले नेरइयसंसारसंचिट्ठणकाले असंखेज्जगुणे, देवसंसारसंचिट्ठणकाले असंखेज्जगुणे तिरिक्खजोणियसंसारसंचिट्ठणकाले अणंतगुणे ।

[सु. १८. अंतकिरियाकारगरिइनिरूवणं ] १८. जीवे णं भंते ! अंतकिरियं करेज्जा ? गोयमा ! अत्थेगतिए करेज्जा, अत्थेगतिए नो करेज्जा । अंतकिरियापदं नेयव्वं । [सु. १९. असंजयभवियदव्वदेवपभिइ-दंसणवावन्नगपज्जंताणं पिहप्पिहदेवलोगपरूवणं ] १९. अह भंते ! असंजयभवियदव्वदेवाणं १, अविराहियसंजमाणं २, विराहियसंजमाणं ३, अविराहियसंजमासंजमाणं ४, विराहियसंजमासंजमाणं ५, असण्णीणं ६, तावसाणं ७, कंदप्पियाणं ८, चरगपरिव्वयगाणं ९, किव्विसियाणं १०, तेरिच्छियाणं ११, आजीवियाणं १२, आभिओगियाणं १३, सलिंगीणं दंसणवावन्नगाणं १४, एएसि णं देवलोगेसु उववज्जमाणाणं कस्स कहिं उववाए पण्णत्ते ? गोयमा ! अस्संजतभवियदव्वदेवाणं जहन्नेणं भवणवासीसु उक्कोसेणं उवरिमगेविज्जएसु १ । अविराहियऽसंजमाणं जहन्नेणं सोहम्मे कप्पे, उक्कोसेणं सव्वट्टसिद्धेविमाणे २ । विराहियसंजमाणं जहन्नेणं भवणवासीसु, उक्कोसेणं सोधम्मे कप्पे ३ । अविराहिय संजमाऽसंजमाणं जहन्नेणं सोहम्मे कप्पे, उक्कोसेणं अच्चुए कप्पे ४ । विराहियसंजमाणं जहन्नेणं भवणवासीसु, उक्कोसेणं जोतिसिएसु ५ । असण्णीणं जहन्नेणं भवणवासीसु, उक्कोसेणं वाणमंतरेसु ६ । अवसेसा सव्वे जहन्नेणं भवणवासीसु, उक्कोसग वोच्छामि- तावसाणं जोतिसिएसु ७ । कंदप्पियाणं सोहम्मे कप्प । चरग-परिव्वायगाणं बंभलोए कप्पे ९ । किव्विसियाणं लंतगे कप्पे १० । तेरिच्छियाणं सहस्सारे कप्पे ११ । आजीवियाणं अच्चुए कप्पे १२ । आभिओगियाणं अच्चुए कप्पे १३ । सलिंगीणं दंसणवावन्नगाणं उवरिमगेवेज्जएसु १४ । [सु. २०-२२. असण्णिआउस्स भेया, असण्णिजीवस्साउयबंधवियारो, असण्णिआउयस्स अप्पाबहुयं च] २०. कतिविहे णं भंते ! असण्णियाउए पण्णत्ते ? गोयमा ! चउव्विहे असण्णिआउए पण्णत्ते । तं जहा— नेरइय-असण्णियाउए १, तिरिक्खजोणियअसण्णियाउए २, मणुस्सअसण्णियाउए ३, देवअसण्णियाउए ४ । २१. असण्णी णं भंते ! जीवे किं नेरइयाउयं पकरेति, तिरिक्खजोणियाउयं पकरेइ, मणुस्साउयं पकरेइ, देवाउयं पकरेइ ? हंता, गोयमा ! नेरइयाउयं पि पकरेइ, तिरिक्खजोणियाउयं पि पकरेइ, मणुस्साउयं पि पकरेइ, देवाउयं पि पकरेइ । नेरइयाउयं पकरेमाणे जहन्नेणं दस वाससहस्साइं, उक्कोसेणं पलिओवमस्स असंखेज्जइभागं तिरिक्खजोणियाउयं पकरेमाणे जहन्नेणं अंतोमुहुत्तं उक्कोसेणं पलिओवमस्स असंखेज्जइभागं पकरेइ । मणुस्साउए वि एवं चेव । देवाउयं पकरेमाणे जहा नेरइया । २२. एयस्स णं भंते ! नेरइयअसण्णियाउयस्स तिरिक्खजोणियअसण्णिआउयस्स मणुस्सअसण्णिआउयस्स देवअसण्णिआउयस्स य कयरे कयरेहितो जाव विसेसाहिए वा ? गोयमा ! सव्वत्थोवे देवअसण्णिआउए, मणुस्सअसण्णिआउए असंखेज्जगुणे, तिरियजोणियअसण्णिआउए असंखेज्जगुणे, नेरइयअसण्णिमाउये असंखेज्जगुणे । सेव भंते ! सेवं भंते ! त्ति ॥ ☆ ☆ ☆ ॥ बितिओ उद्देसओ समत्तो ॥ ☆ ☆ ☆ तइओ उद्देसो 'कंखपओसे' ☆ ☆ ☆ [सु. १-२. जीव-चउवीसदंडएसु कंखामोहणिज्जकम्मस्स किरियानिप्फन्नत्तपरूवणं ] १. (१) जीवाणं भंते ! कंखामोहणिज्जे कम्मे कडे ? हंता कडे । २ से भंते ! किं देसेणं देसे कडे १ ? , देसेणं सव्वे कडे २ ? , सव्वेणं देसे कडे ३ ? , सव्वेणं सव्वे कडे ४ ? । गोयमा ! नो देसेणं देसे कडे १, नो देसेणं सव्वे कडे २, नो सव्वेणं देसे कडे ३, सव्वेणं सव्वे कडे ४ । २. (१) नेरइयाणं भंते ! कंखामोहणिज्जे कम्मे कडे ? हंता कडे जाव सव्वेणं सव्वे कडे ४ । २ एवं जाव वेमाणियाणं दंडओ भाणियव्वो । [सु. ३ कंखामोहणिज्जकम्मस्स करण- चयणाइरूवो तिकालविसयो वियारो] ३. १ जीवा णं भंते ! कंखामोहणिज्जं कम्मं करिंसु ? हंता, करिंसु । २ तं भंते ! किं देसेणं देसं करिंसु ? एतेणं अभिलावेणं दंडओ जाव वेमाणियाणं । ३ एवं करेति । एत्थ वि दंडओ जाव वेमिणियाणं । ४ एवं करेस्संति । एत्थ वि दंडओ जाव वेमाणियाणं । ५ एवं चिते - चिणिसु, चिणंति, चिणिसंति । उवचिते-उवचिणिसु, उवचिणंति, उवचिणिसंति । उदीरेंसु, उदीरेंति, उदीरिस्संति । वेदिंसु, वेदेति, वेदिस्संति । निज्जरेंसु, निज्जरेति, निज्जरिस्संति । गाधा— कड चित, उवचित, उदीरिया, वेदिया य, निज्जण्णा । आदितिए चउभेदा पच्छिमा तिण्णि ॥१॥ [सु. ४-५. कंखामोहणिज्जकम्मवेदणकारणाणि ] ४. जीवा णं भंते ! जीवा कंखामोहणिज्जं कम्मं वेदेति ? हंता, वेदेति । ५. कहं णं भंते ! जीवा कंखामोहणिज्जं कम्मं वेदेति ? गोयमा ! तेहिं तेहिं कारणेहिं संकिगा कंखिगा वितिकिंछिता भेदसमावन्ना कलुससमावन्ना, एवं खलु जीवा कंखामोहणिज्जं कम्मं वेदेति । [सु. ६. आहारगसरूवं ] ६. (१) से नूणं भंते ! तमेव सच्चं णीसंकं जं जिणेहिं पवेदितं ? हंता, गोयमा ! तमेव सच्चं णीसंकं जं जिणेहिं पवेदितं । २ से नूणं भंते ! एवं मणं धारेमाणे, एवं पकरेमाणे एवं

चिद्वेमाणे, एवं सवरेमाणे आणाए आराहए भवति ? हंता, गोयमा ! एवं मण धारेमाणे जाव भवति । [सु. ७. अत्थित्तनत्थित्तपरिणामो] ७. (१) से नूणं भंते ! अत्थित्तं अत्थित्ते परिणमइ, नत्थित्तं नत्थित्ते परिणमति ? हंता, गोयमा ! जाव परिणमति । (२) जं तं भंते ! अत्थित्तं अत्थित्ते परिणमइ, नत्थित्तं नत्थित्ते परिणमति तं किं पयोगसा वीससा ? गोयमा ! पयोगसा वि तं, वीससा वि तं । (३) जहा ते भंते ! अत्थित्तं अत्थित्ते परिणमइ तथा ते नत्थित्तं नत्थित्ते परिणमति ? जहा ते नत्थित्तं नत्थित्ते परिणमति तथा ते अत्थित्तं अत्थित्तेपरिणमति ? हंता, गोयमा ! जहा मे अत्थित्तं अत्थित्ते परिणमति तथा मे नत्थित्तं नत्थित्ते परिणमति, जहा मे नत्थित्तं नत्थित्ते परिणमति तथा मे अत्थित्तं अत्थित्ते परिणमति । (४) से णूणं भंते ! अत्थित्तं अत्थित्ते गमणिज्जं ? जथा परिणमइ दो आलावगा तथा गमणिज्जेण वि दो आलावगा भाणितव्वा जाव तथा मे अत्थित्तं अत्थित्ते गमणिज्जं । (५) जहा ते भंते ! एत्थं गमणिज्जं तथा ते इहं गमणिज्जं ? जथा ते इहं गमणिज्जं तथा ते एत्थं गमणिज्जं ? हंता, गोयमा ! जहा मे एत्थं गमणिज्जं जाव तथा मे एत्थं गमणिज्जं । [सु. ८-९. कंखामोहणिज्जकम्मबंधहेउपरूवणं] ८. जीवा णं भंते ! कंखामोहणिज्जं कम्मं बंधंति ? हंता, बंधंति । ९. (१) कहां णं भंते ! जीवा कंखामोहणिज्जं कम्मं बंधंति ? गोयमा ! पमादपच्चया जोगनिमित्तं च । (२) से णं भंते ! पमादे किंपवहे ? गोयमा ! जोगप्पवहे । (३) से णं भंते ! जोगे किंपवहे ? गोयमा ! वीरियप्पवहे । (४) से णं भंते ! वीरिए किंपवहे ? गोयमा ! सरीरप्पवहे । (५) से णं भंते ! सरीरे किंपवहे ? गोयमा ! जीवप्पवहे । एवं सति अत्थि उट्ठाणे ति वा, कम्मे ति वा बले ति वा, वीरए ति वा, पुरिसक्कारपरक्कमे ति वा । [सु. १०-११. कंखामोहणिज्जस्स उदीरणा-उवसामणाइ] १०. (१) से णूणं भंते ! अप्पणा चेव उदीरेइ, अप्पणा चेव गरहइ, अप्पणा चेव संवरेइ ? हंता, गोयमा ! चेव तं चेव उच्चारयेव्वं ३ । (२) जं तं भंते ! अप्पणा चेव उदीरेइ अप्पणा चेव गरहेइ, अप्पणा चेव संवरेइ तं किं उदिण्णं उदीरेइ १ अणुदिण्णं उदीरेइ २ अणुदिण्णं उदीरणाभवियं कम्मं उदीरेइ ३ उदयाणंतरपच्छाकडं कम्मं उदीरेइ ४ ? गोयमा ! नो उदिण्णं उदीरेइ १, नो अणुदिण्णं उदीरेइ २, अणुदिण्णं उदीरणाभवियं कम्मं उदीरेइ ३, णो उदयाणंतरपच्छाकडं कम्मं उदीरेइ ४ । (३) जं तं भंते ! अणुदिण्णं उदीरणाभवियं कम्मं उदीरेइ तं किं उट्ठाणं कम्मेणं बलेण वीरिएणं पुरिसक्कारपरक्कमेणं अणुदिण्णं उदीरणाभवियं कम्मं उदीरेइ ? उदाहु तं अणुट्ठाणेणं अकम्मेणं अबलेणं अवीरिएणं अपुरिसक्कारपरक्कमेणं अणुदिण्णं उदीरणाभवियं कम्मं उदीरेइ ? गोयमा ! तं उट्ठाणेण वि कम्मेण वि बलेण वि वीरिएण वि पुरिसक्कारपरक्कमेण वि अणुदिण्णं उदीरणाभवियं कम्मं उदीरेइ, णो तं अणुट्ठाणेणं अकम्मेणं अबलेणं अवीरिएणं अपुरिसक्कारपरक्केणं अणुदिण्णं उदीरणाभवियं कम्मं उदीरेइ । एवं सति अत्थि उट्ठाणेइ वा कम्मेइ वा बलेइ वा वीरिएइ वा पुरिसक्कारपरक्कमेइ वा । ११. (१) से नूणं भंते ! अप्पणा चेव उवसामेइ, अप्पणा चेव गरहइ, अप्पणा चेव संवरेइ ? हंता, गोयमा ! एत्थ वि तं चेव भाणियव्वं, नवरं अणुदिणं उवसामेइ, सेसा पडिसेहेयव्वा तिण्णि । (२) जं तं भंते ! अणुदिण्णं उवसामेइ तं किं उट्ठाणेणं जाव पुरिसक्कारपरक्कमेण वा । [सु. १२-१३. कंखामोहणिज्जस्स वेयण-णिज्जराणाइ] १२. से नूणं भंते ! अप्पणा चेव वेदेइ अप्पणा चेव गरहइ ? एत्थ वि व च्चेव परिवाडी । नवरं उदिण्णं वेएइ, नो अणुदिण्णं वेएइ । एवं जाव पुरिसक्कारपरक्कमे इ वा । १३. से नूणं भंते ! अप्पणा चेव निज्जरेति अप्पणा चेव गरहइ ? एत्थ वि स च्चेव परिवाडी । नवरं उदयाणंतरपच्छाकडं कम्मं निज्जरेइ, एवं जाव परक्कमेइ वा । [सु. १४. चउवीसदंडचसु कंखामोहणिज्जकम्मवेदेण-निज्जराणाइ] १४. (१) नेरइया णं भंते ! कंखामोहणिज्जं कम्मं वेदंति ? जथा ओहिया जीवा तथा नेरइया जाव थणितकुमारा । (२) पुढविक्काइया णं भंते ! कंखामोहणिज्जं कम्मं वेदंति ? हंता, वेदंति । (३) कहां णं भंते ! पुढविक्काइया कंखामोहणिज्जं कम्मं वेदंति ? गोयमा ! तेसि णं जीवाणं णो एवं तक्का इ वा सण्णा इ वा पण्णा इ वा मणे इ वा वई ति वा 'अम्हे णं कंखामोहणिज्जं कम्मं वेदेमो' वेदंति पुण ते । (४) से णूणं भंते ! तमेव सच्चं नीसंकं जं जिणेहिं पवेदियं । सेसं तं चेव जाव पुरिसक्कारपरक्केणं ति वा । (५) एवं जाव चउरिंदिया । (६) पंचिंदियतिरिक्खजोणिया जाव वेमाणिया जथा ओहिया जीवा । [सु. १५. निग्गंथे पडुच्च कंखामोहणिज्जवेदणवियारो] १५. (१) अत्थि णं भंते ! समणा वि निग्गंथा कंखामोहणिज्जं कम्मं वेदंति ? हंता, अत्थि । (२) कहां णं भंते ! समणावि निग्गंथा कंखामोहणिज्जं कम्मं वेदंति ? गोयमा ! तेहिं तेहिं नाणंतरेहिं दंसणंतरेहिं चरितंतरेहिं लिंगंतरेहिं पवयणंतरेहिं पावयणंतरेहिं कप्पंतरेहिं चरितंतरेहिं

य भग्गंतरेहि भंगंतरेहिं नयंतरेहिं नियमंतरेहिं पमाणंतरेहिं संकिया कंखिया वितिकिंछिता भेदसमावन्ना, कलुससमावन्ना, एवं खलु समणा निग्गंथा कंखामोहणिज्जं कम्मं वेदेति । (३) से नूणं भंते तमेव सच्चं नीसंकं जं जिणेहिं पवेइयं ? हंता, गोयमा ! तमेव सच्चं नीसंकं जाव पुरिसक्कारपरक्कमे इ वा । सेवं भंते ! सेवं भंते ! ० ।

**ततिओ ॥१-३॥ ☆☆☆ चउत्थो उद्देसओ 'पगई' ☆☆☆** [सु. १ कतिपगडी' आइपंचदारपरूवणं] १. कति पं भंते ! कम्मपगडीओ पणत्ताओ ? गोयमा ! अट्ट कम्मपगडीओ पणत्ताओ । कम्मपगडीए पढमो उद्देसो नेतव्वो जाव अणुभागो सम्मत्तो । कति पगडी ? १ कह बंधइ ? २ कतिहि व ठाणेहिं बंधती पगडी ? ३ । कति वेदेति व पगडी ? ४ अणुभागो कतिविहो कस्स ? ५ ॥१॥ [सु. २-५. उदिण्ण-उवसंतमोहणिजजस्स जीवस्स उवट्ठावण -अवक्कमणाइपरूवणं] २. (१) जीवे पं भंते ! मोहणिज्जेणं कडेणं कम्मणे उदिण्णेणं उवट्ठाएज्जा ? हंता, उवट्ठाएज्जा । (२) से भंते ! किं वीरियत्ताए उवट्ठाएज्जा ? अवीरियत्ताए उवट्ठाएज्जा ? गोतमा ! वीरियत्ताए उवट्ठाएज्जा, नो अवीरियत्तशए उवट्ठाएज्जा । (३) जदि वीरियत्ताए किं बालवीरियत्ताए उवट्ठाएज्जा ? पंडितवीरियत्ताए उवट्ठाएज्जा ? बाल-पंडितवीरियत्ताए उवट्ठाएज्जा ? गोयमा ! बालवीरियत्तराए उवट्ठाएज्जा, णो पंडितवीरियत्ताए उवट्ठाएज्जा, नो बाल-पंडित-वीरियत्ताए उवट्ठाएज्जा । ३. (१) जीवे पं भंते ! मोहणिज्जेणं कडेणं कम्मणेणं उदिण्णेणं अवक्कमेज्जा ? हंता, अवक्कमेज्जा । (२) से भंते ! बालपंडियवीरियत्ताए अवक्कमेज्जा ३ ? गोयमा ! बालवीरियताए बुज्झिसु अवक्कमेज्जा, नो पंडियवीरियत्ताए अवक्कमेज्जा, सिय बालपंडियवीरियत्ताए अवक्कमेज्जा । ४. जधा उदिण्णेणं दो आलावगा तथा उवसंतेण वि दो आलावगा भाणियव्वा । नवरं उवट्ठाएज्जा पंडियवीरियत्ताए, अवक्कमेज्जा बाल-पंडियवीरियत्ताए । ५. (१) से भंते ! किं आताए अवक्कमइ ? अणाताए अवक्कमइ ? गोयमा ! आताए अवक्कमइ, णो अणाताए अवक्कमइ; मोहणिज्जं कम्मं वेदेमाणे । (२) से कहमेयं भंते ! एवं गोतमा ! पुव्विं से एतं एवं रोयति इदाणिं से एयं एवं नो रोयइ, एवं खलु एतं एवं । [सु. ६. कम्मवेदेणं पडुच्च मोक्खपरूवणं] ६. से नूणं भंते ! नेरइयस्स वा, तिरिक्खजोणियस्स वा, मणूसस्स वा, देवस्स वा जे कडे पावे कम्मे, नत्थि पं तस्स अवेदइत्ता मोक्खो ? हंता, गोतमा ! नेरइयस्स वा तिरिक्खजोणियस्स वा, मणुस्सस्स वा, देवस्स वा जे कडे पावे कम्मे, नत्थि तस्स अवेदइत्ता मोक्खो । से केणट्ठेणं भंते ! एवं वुच्चति नेरइयस्स वा जाव मोक्खो ? एवं खलु मए गोयमा ! दुविहे कम्मे पणत्ते । तं जहा— पदेसकम्मे य, अणुभागकम्मे य । तत्थ पं जं तं पदेसकम्मं तं नियमा वेदेति, तत्थ पं जं तं अणुभागकम्मे य । तत्थ पं जं तं पदेसकम्मं तं नियमा वेदेति, तत्थ पं जं तं अणुभागकम्मं तं अत्थेगइयं नो वेएइ । णायमेतं अरहता, सुतमेतं अरहता, विण्णायमेतं अरहता-“इमं कम्मं अयं जीवे अब्भोवगमियाए वेदणाए वेइस्सइ, इमं कम्मं अयं जीवे उवक्कमियाए वेदणाए वेइस्सइ । अहाकम्मं अधानिकरणं जधा जधा तं भगवता दिट्ठं तथा तथा तं विप्परिणमिस्सतीति । से तेणट्ठेणं गोतमा ! नेरइयस्स वा ४ जाव मोक्खो । [सु. ७-११. पोग्गल-जीवाणं तिकालसासयत्तपरूवणं] ७. एस पं भंते ! पोग्गले तीतमणंतं सासयं समयं 'भुवि' इति वत्तव्वं सिया ? हंता, गोयमा ! एस पं पोग्गले तीतमणंतं सासयं समयं 'भुवि' इति वत्तव्वं सिया । ८. एस पं भंते ! पोग्गले पडुप्पन्नं सासयं समयं भवति' इति वत्तव्वं सिया ? हंता, गोयमा ! तं चेव उच्चारेतव्वं । ९. एस पं भंते ! पोग्गले अणागतमणंतं सासतं समयं 'भविस्सति' इति वत्तव्वं सिया ? हंता, गोयमा ! तं चेव उच्चारेतव्वं । १०. एवं खंधेण वि तिण्णि आलावगा । ११. एवं जीवेण वि तिण्णि आलावगा भाणितव्वा । [सु. १२-१५. छदमत्थ केवलीणं कमसो असिज्झणाइ-सिज्झणाइपरूवणं] १२. छउमत्थे पं भंते ! मणूसे तीतमणंतं सासतं समयं केवलेणं सजमेणं केवलेणं संवरेणं, केवलेणं बंभचेरवासेणं, केवलाहिं पवयणमाताहिं सिज्झिसु जाव सब्बदुक्खाणमंतं करिसु ? गोयमा ! नो इणट्ठे समट्ठे । से केणट्ठेणं भंते ! एवं वुच्चइ तं चेव जाव अंतं करेसु ? गोतमा ! जे केइ अंतकरा वा, अंतिमसरीरिया वा सब्बदुक्खाणमंतं करेसु वा करेति वा करिस्संति वा सव्वे ते उप्पन्नानाण-दंसणधरा अरहा जिणे केवली मवित्ता ततो पच्छा सिज्झंति वुज्झंति मुच्चंति परिनिव्वायंति सब्बदुक्खाणमंतं करेसु वा करेति वा करिस्संति वा से तेणट्ठेणं गोतमा ! जाव सब्बदुक्खाणमंतं करेसु । १३. पडुप्पन्ने वि एवं चेव, नवरं 'सिज्झंति' भाणितव्वं । १४. अणागते वि एवं चेव, नवरं 'सिज्झिस्संति' भाणियव्वं । १५. जहा छउमत्थो तथा आघोहिओ वि, तथा परमाहोहिओ वि । तिण्णि तिण्णि आलावगा भाणियव्वा । [सु. १६-१८. केवलिस्स मोक्खो संपुण्णणाणित्तं च] १६.

केवली णं भंते ! मणूसे तीतमणंतं सासयं समयं जाव अंतं करेंसु ? हंता, सिज्झिंसु जाव अंतं करेंसु । एते तिण्णि आलावगा भाणियव्वा छउमत्थस्स जधा, नवरं सिज्झिंसु, सिज्झिस्संति । १७. से नूणं भंते ! तीतमणं तं सासयं समयं, पडुप्पन्नं वा सासयं समयं, अणागतमणंतं वा सासयं समयं जे केइ अंतकरा वा अंतिमसरीरिया वा सव्वदुक्खाणमंतं करेंसु वा करेंति वा करिस्संति वा सव्वे ते उप्पन्नानाण-दंसणधरा अरहा जिणे केवली भवित्ता तओ पच्छा सिज्झिंति जाव अंतं करेस्संति वा हंता, गोयमा ! तीतमणंतं सासतं समयं जाव अंतं करेस्संति वा । १८. से नूणं भंते ! उप्पन्नानाण-दंसणधरे अरहा जिणे केवली 'अलमत्थु' ति वत्तव्वं सिया ? हंता, गोयमा ! उप्पन्नानाण-दंसणधरे अरहा जिणे केवली 'अलमत्थु' ति वत्तव्वं सिया । सेवं मंते ! सेवं भंते ! ति० । ॥ चउत्थो ॥ ☆ ☆ ☆ पंचमो उद्देशो 'पुढवी' ☆☆☆ [सु. १-५. चउवीसदंडयाणं आवाववंखापरूवणं] १. कति णं भंते ! पुढवीओ पण्णत्ताओ ? गोयमा ! सत्त पुढवीओ पण्णत्ताओ । तं जहा— रयणप्पभा जाव तमतमा । २. इमीसे णं भंते ! रतणप्पभाए पुढवीए कति निरयावाससयसहस्सा पण्णत्ता ? गाथा— तीसा य पण्णवीसा पण्णरस दसेव या सयसहस्सा। तिण्णेगं पंचूणं पंचेव अणुत्तरा निरया ॥१॥ ३. केवतिया णं भंते ! असुरकुमारावाससतसहस्सा पण्णत्ता ? एवं— चोयट्ठी चउरासती य होति नागाणं । बावत्तरी सुवण्णाण, वाउकुमाराण छण्णउती ॥२॥ दीव-दिसा -उदहीणं विज्जुकुमारिंद-थणिय -मग्गीणं । छण्हं पि जुयलगाणं छावत्तरिमो सत्तसहस्सा ॥३॥ ४. केवतिया णं भंते ! पुढविक्काइयावाससतसहस्सा पण्णत्ता ? गोयमा ! असंखेज्जा पुढविक्काइयावाससयसहस्सा पण्णत्ता जाव असंखेज्जा जोदिसियविमाणावाससयसहस्सा पण्णत्ता । ५. सोहम्मं णं भंते ! कप्पे कति विमाणावाससतसहस्सा पण्णत्ता ? गोयमा ! बत्तीसं विमाणावाससतसहस्सा पण्णत्ता ? एवं— बत्तीसड्ढावीसा बारस अट्ट चउरो सतसहस्सा । पण्णा चत्तालीसा उच्च सहस्सा सहस्सारे ॥४॥ आणय-पाणयकप्पे चत्तारि सताऽऽरणऽ-चुए तिण्णि । सत्त विमाणसत्ताइं चउसु वि एएसु कप्पेसुं ॥५॥ एक्कारसुत्तरं हेट्ठिमेसु सत्तुत्तरं च मज्झिमए । सतमेगं उवरिमए पंचेव अणुत्तरविमाणा ॥६॥ [सु. ६. पंचमुद्देशेसगस्स अत्थाहिगारदारगाहा ] ६. पुढवि द्विति १ ओगाहण २ सरीर ३ संघयणमेव ४ संठाणे ५ । लेस्सा ६ दिट्ठी ६ णाणे ८ जोगुवओगे ९-१० य दस ठाणा ॥१४॥ [सु. ७-९. नेरइयाणं कोहोवउत्ताइवत्तव्वयापुव्वं पढमं ठितिट्ठाणपरूवणदारं] ७. इमीसे णं भंते ! रतणप्पभाए पुढवीए तीसाए निरयावाससतसहस्सेसु एगमेगंसि निरयावासंसि नेरतियाणं केवतिया ठितिठाणा पण्णत्ता? गोयमा ! असंखेज्जा ठितिठाणा पण्णत्ता । तं जहा— जहन्निया ठिती, समयाहिया जहन्निया ठिई, दुसमयाहिया जहन्निया ठिती जाव असंखेज्जसमयाहिया जहन्निया ठिती, तप्पाउग्गुक्कोसिया ठिती । ८. इमीसे णं भंते । रतणप्पभाए पुढवीए तीसाए निरयावाससतसहसकसेसु एगमेगंसि निरयावासंसि जहन्नियाए ठितीए वट्टमाणा नेरइया किं कोधोवउत्ता, माणोवउत्ता, मायोवउत्ता, लोभोवउत्तश ? गोयमा ! सव्वे वि ताव होज्जा कोहोवउत्ता १, अहवा कोहोवउत्ता, यमाणोवउत्तो य २, अहवा कोहोवउत्ता य माणोवउत्ता य ३, अहवा कोहोवउत्ता य मयोवउत्ते य ४, अहवा कोहोवउत्ता मायोवउत्ता य ५, अहवा कोहोवउत्ता य लोभोवउत्ता य ६, अहवा कोहोवउत्ता य लोभोवउत्ता य ७ । अहवा कोहोवउत्ता य मणोवउत्ते य मायोवउत्ते य १, कोहोवउत्ता य माणोवउत्ते य मायोवउत्ता य २, कोहोत्तउत्ता य माणोवउत्ता य मयोवउत्ते य ३, कोहोवउत्ता य माणोवउत्ता य मायाउवउत्ता य ४ । एवं कोह-माण -लोभेण वि चउ ४ । एवं कोह- माया -लोभेण वि चउ ४, एवं १२ । पच्छा माणेण मायाए लोभेण य कोहो भइयव्वो, ते कोहं अमुंचता ८ । एवं सत्तावीसं भंगा णेयव्वा । ९. इमीसे णं भंते ! रयणप्पभाए पुढवीए तीसाए निरयावाससयसहस्सेसु एगमेगंसि निरयावासंसि समयाधियाए जहन्नट्ठितीए वट्टमाणा नेरइया किं कोधोवउत्ता, माणोवउत्ता, मायोवउत्ता, लोभोवउत्ता ? गोयमा ! कोहोत्तउत्ते य माणोवउत्ते य माणोवउत्ते य लोभोवउत्ते य ४ । कोहोवउत्ता य माणोवउत्ता य मायोत्तउत्ता य लोभोवउत्ता य ८ । अधवा कोहोवउत्ते य माणोवउत्ते य १०, अधवा कोहोत्तउत्ते य माणोवयुत्ता य १२, एवं असीति भंगा नेयव्वा, एवं जाव संखिज्जसमयाधिया ठिई । असंखेज्जसमयाधियाए ठिईए तप्पाउग्गुक्कोसियाए ठिईए सत्तावीसं भंगा भाणियव्वा । [ सु. १०-११. नेरइयाणं कोहोवउत्ताइवत्तव्वपुव्वं बीयं ओगाहणठाणदारं ] १०. इमीसे णं भंते ! रतणप्पभाए पुढवीए तीसाए निरयावाससयसहस्सेसु एगमेगंसि निरयावासंसि नेरइयाणं केवतिया ओगाहणाठाणा पण्णत्ता ? गोयमा ! असंखेज्जा ओगाहणाठाणा पण्णत्ता । तं जहा—

जधन्निया ओगाहणा, पदेसाहिया जहन्निया ओगाहणा, दुप्पदेसाहिया जहन्निया ओगाहणा जाव असंखेज्जपदेसाहिया जहन्निया ओगाहणा, तप्पाछग्गुक्कोसिया ओगाहणा । ११. इमीसे णं भंते ! रतणप्पभाए पुढवीए तीसाए निरयावाससयसहस्सेसु एगमेगंसि निरयावासंसि जहन्नियाए ओगाहणाए वट्टमाणा नेरतिया किं कोहोवउत्ता० ? असीति भंगा भाणियव्वा जाव संखिज्जपदेसाधिया जहन्निया ओगाहणा । असंखेज्जपदेसाहियाए जहन्नियाए ओगाहणाए वट्टमाणाणं तप्पाउग्गुक्कोसियाए ओगाहणाए वट्टमाणाणं नेरइयाणं दोसु वि सत्तावीसं भंगा । [सु. १२-१३. नेरइयाणं कोहोवउत्ताइवत्तव्वयापुव्वं तइयं सरीरदारं ] १२. इमीसे णं भंते ! रयण० जाव एगमेगंसि निरयावासंसि नेरतियाणं कति सरीरया पण्णत्ता ? गोयमा ! तिण्णि सरीरया पण्णत्ता । तं जहा— वेउव्विए तेयए कम्मए । १३. (१) इमीसे णं भंते ! जाव वेउव्वियसरीरे वट्टमाणा नेरतिया किं कोहोवयुत्ता० ।? सत्तावीसं भंगा । २ एतेणं गमेणं तिण्णि सरीरा भाणियव्वा । [सु. १४-१५. नेरइयाणं कोहोवउत्ताइवत्तव्वयापुव्वं चउत्थं संघयणदारं] १४. इमीसे णं भंते ! रयणप्पभाए पुढबाह जाव नेरइयाणं सरीरगा किं संघयणा पण्णत्ता ? गोयमा ! छण्हं संघयणाणं असंघयणा, नेवऽट्ठी, नेव छिरा, नेव ण्हारूणि । जे पोग्गला अणिट्ठा अकंता अप्पिया असुभा अमुणुण्णा अमणामा ते तेसिं सरीरसंघातत्ताए परिणमंति । १५. इमीसे णं भंते ! जाव छण्हं संघयणाणं असंघयणे वट्टमाणा नेरइया किं कोहोवउत्ता० ? सत्तावीसं भंगा । [सु. १६-१७. नेरइयाणं कोहोवउत्ताइवत्तव्वयापुव्वं पंचमं संठाणदारं] १६. इमीसे णं भंते ! रयणप्पभा जाव सरीरया किंसंठिता पण्णत्ता ? गोयमा ! दुविधा पण्णत्ता । तं जहा— भवधारणिज्जा य उत्तरवेउव्विया य । तत्थ णं जे ते भवधारणिज्जा ते हुंडसंठिया पण्णत्ता । तत्थ णं उत्तरवेउव्विया ते वि हुंडसंठिया पण्णत्ता । १७. इमीसे णं जाव हुंडसंठाणे वट्टमाणा नेरइया किं कोहोवउत्ता० ? सत्तावीसं भंगा । [सु. १८-१९. नेरइयाणं कोहोवउत्ताइवत्तव्वयापुव्वं छट्ठं लेसादारं] १८. इमीसे णं भंते ! रयणप्पभाए पुढवीए नेरइयाणं कति लेसाओ पण्णत्ताओ ? गोयमा ! एक्का काउलेसा पण्णत्ता । १९. इमीसे णं भंते ! रयणप्पभाए जाव काउलेस्साए वट्टमाणा० ? सत्तावीसं भंगा । [सु. २०-२१. नेरइयाणं कोहोवउत्ताइवत्तव्वयापुव्वं सत्तमं दिट्ठिदारं] २०. इमीसे णं जाव किं सम्मद्धिटी मिच्छद्धिटी सम्मामिच्छद्धिटी ? तिण्णि वि । २१. (१) इमीसे णं जाव सम्महंसणे वट्टमाणा नेरइया० ? सत्तावीसं भंगा । (२) एवं मिच्छहंसणे वि । (३) सम्मामिच्छहंसणे असीति भंगा । [सु. २२-२३. नेरइयाणं कोहोउत्ताइवत्तव्वयापुव्वं अट्टमं नाणदारं ] २२. इमीसे णं भंते ! जाव किं णाणी, अण्णाणी ? गोयमा ! णाणी वि, अण्णाणी वि । तिण्णि नाणाणि नियमा, तिण्णि अण्णाणाइं भयणाए । २३. (१) इमीसे णं भंते ! जाव आभिणिबोहियणाणे वट्टमाणा० ? सत्तावीसं भंगा । (२) एवं तिण्णि णाणाइं, तिण्णि य अण्णाणाइं भाणियव्वइं । [सु. २४-२५. नेरइया णं कोहोवउत्ताइवत्तव्वयापुव्वं नवमं जोगदारं] २४. इमीसे णं जाव किं मणजोगी, वइजोगी, कायजोगी ? तिण्णि वि । २५. (१) इमीसे णं जाव मणजोए वट्टमाणा किं कोहोवउत्ता० ? सत्तावीसं भंगा । (२) एवं वइजोए । एवं कायाजोए । [सु. २६-२७. नेरइयाणं कोहोवउत्ताइवत्तव्वयापुव्वं दसमं उवओगदारं] २६. इमीसे णं जाव नेरइया किं सागरोवयुत्ता, अणागारोवयुत्ता ? गोयमा ! सागरोवउत्ता वि, अणागारोवयुत्ता वि । २७. (१) इमीसे णं जाव सागरोवओगे वट्टमाणा किं कोहोवउत्ता० ? सत्तावीसं भंगा । (२) एवं अणागारोवउत्ते वि सत्तावीसं भंगा । [सु. २८. सत्तविहनेरइयाणं छट्ठे लेसादारे णाणत्तं ] २८. एवं सत्त वि पुढवीओ नेतव्वाओ । णाणत्तं लेस्सासु, गाधा— कारु य दोसु, ततियाए मीसिया, नीलिया चउत्थीए । पंचमियाए मीसा, कण्हा, तो परमकण्हा ॥७॥ [सु. २९. भवणवासीणं कोहोवउत्ताइत्तव्वयापुव्वं ठिति -ओगाहणाइदसदारपरूवणं] २९. चउसट्ठीए णं भंते ! असुरकुमारावाससतसहस्सेसु एगमेगंसि असुरकुमारावासंसि असुरकुमाराणं केवतिया ठिइठाणा पण्णत्ता ? गोयमा ! असंखेज्जा ठितिठाणा पण्णत्ता । तं जहा— जहन्निया ठिई जहा नेरतिया तहा, नवरं पडिलोभा भंगा भाणियव्वा सव्वे वि ताव होज्ज लोभोवयुत्ता, अधवा लोभोवयुत्ता य मायोवउत्ते य, अहवा लोभोवयुत्ता य मायोवयुत्ता य । एतेणं गमेणं नेतव्वं जाव थणियकुमारा, नवरं णाणत्तं जाणितव्वं । [सु. ३०-३२. एगिंदियाणं कोहोवउत्ताइवत्तव्वयापुव्वं ठितिओगाहणाइदसदापरूवणं ] ३०. असंखेज्जेसु णं भंते ! पुढविकाइयावाससतसहस्सेसु एगमेगंसि पुढविकाइयावासंसिस पुढविकाइयाणं केवतिया ठितिठाणा पण्णत्ता ? गोयमा ! असंखेज्जा ठितिठाणा पण्णत्ता । तं जहा— जहन्निया ठिई जाव तप्पाउग्गुक्कोसिया

ठिती । ३१. असंखेज्जेसु णं भंते ! पुढविक्काइयावास सतसहरस्सेसु एगमेगंसि पुढविक्काइयावासंसि जहन्नठितीए वट्टमाणा पुढविक्काइया किं कोधोवउत्ता, माणोवयुत्ता, मायोवउत्ता, लोभोवउत्ता ? गोयमा ! कोहोवउत्ता वि माणोवउत्ता वि मायोवयुत्ता वि लोभोवउत्ता वि । एवं पुढविक्काइयाणं सव्वेसु वि ठाणेसु अभंगयं, नवरं तेउलेस्साए असीति भंगा । ३२. (१) एवं आउक्काइया वि । (२) तेउक्कइया -वाउक्कइयाणं सव्वेसु वि ठाणेसु अभंगयं । (३) वणप्फतिकाइया जथा पुढविक्काइया । [सु. ३३. विगलिनंदियाणं कोहोवउत्ताइवत्तव्वयापुव्वं ठिति -ओगाहणाइदसदारपरूवणं] ३३. बेइंदिय - तेइदिय -चउरिंदियाणं जेहिं ठाणेहिं नेरतियाणं असीइ भंगा तेहिं ठाणेहिं असीइं चेव । नवरं अब्भहिया सम्मत्ते, आभिणिबोहियनाणे सुयनाणे य, एएहि असीइ भंगा; जेहिं ठाणेहिं नेरतियाणं सत्तावीसं भंगा तेसु ठाणेसु सव्वेसु अभंगयं । [सु. ३४. पंचिंदियतिरिक्खाणं कोहोवउत्ताइवत्तव्वयापुव्वं ठितिओगाहणाइदसदारपरूवणं] ३४. पंचिंदियतिरिक्खजोणिया जथा नेरइया तथा भाणियव्वा, नवरं जेहिं सत्तावीसं भंगा तेहिं अभंगयं कायव्वं । जत्थ असीति तत्थ असीतिं चेव । [सु. ३५. मणुस्साणं कोहोवउत्तव्वयापुव्वं ठिति-गाहणाइदसदारपरूवणं] ३५. मणुस्सा वि । जेहिं ठाणेहिं नेरइयाणं असीति भंगा तेहिं ठाणेहिं मणुस्साण वि असीति भंगा भाणियव्वा । जेसु ठाणेसु सत्तावीसा तेसु अभंगयं, नवरं मणुस्साणं अब्भहियं- जहन्नियाए ठिईए आहारए य असीतिं भंगा । [सु. ३६. वाणमंतराईणं कोहोवउत्ताइवत्तव्वयापुव्वं ठिति -ओगाहणाइदसदारपरूवणं] ३६. वाणमंतर - जोदिस-वेमाणिया जहा भवणवासी (सु.२९), नवरं णाणत्तं जाणियव्वं जं जस्स; जाव अणुतरा । सेवं भंते ! सेवं भंते ! त्ति० ★ ★ ★। पंचमोउद्देसो समत्तो

॥५॥ ★ ★ ★ छट्ठो उद्देसो 'जावते' ★ ★ ★ [सु.१-४. सूरिअस्स उदयत्थमणाइं पडुच्च अंतर-पगासखेत्ताइपरूवणं] १. जावतियातो णं भंते ! ओवासंतरातो उदयंते सूरिए चक्खुप्फासं हव्वमागच्छति, अत्थमंते वि य णं सूरिए तावतियाओ चेव ओवासंतराओ चक्खुप्फासं हव्वमागच्छति ? हंता, गोयमा ! जावतियाओ णं ओवासंतराओ उदयंते सूरिए हव्वमागच्छति अत्थमंते वि सूरिए जाव हव्वमागच्छति । (२). जावतियं णं भंते ! खेत्तं उदयंते सूरिए आतवेणं सव्वतो समंता ओभासेति उज्जोएति तवेति पभासेति अत्थमंते वि य णं सूरिए तावइयं चेव खेत्तं आतवेणं सव्वतोसमंता ओभासेति उज्जोएति तवेति पभासेति ? हंता, गोयमा ! जावतियं णं खेत्तं जाव पभासेति । ३ (१) तं भंते ! किं पुट्टं ओभासेति अपुट्टं ओभासेति ? जाव छद्दिसिं ओभासेति । (२) एवं उज्जोवेदि ? तवेति पभासेति ? जाव नियमा छद्दिसिं । ४. (१) से नूणं भंते ! सव्वंति सव्वावंति फुसमाणकालसमयंसि जावतियं खेत्तं फुसइ तावतियं फुसमाणे पुट्टे त्ति वत्तव्वं सिया ? हंता, गोयमा ! सव्वति जाव वत्तव्वं सिया । (२) तं भंते ! किं पुट्टं फुसति अपुट्टं फुसइ ? जाव नियमा छद्दिसिं । [सु. ५-६. लोयंत-अलोयंताईणं फुसणापरूवणं] ५. (१) लोअंते भंते ! अलोअंतं फुसति ? अलोअंते वि लोअंतं फुसति ? हंता, गोयमा ! लोअंते अलोअंतं फुसति, अलोअंते वि लोअंतं फुसति । (२) तं भंते ! किं पुट्टं फुसति ? जाव नियमा छद्दिसिं फुसति । ६. (१) दीवंते भंते ! सागरंतं फुसति ? सागरंते वि दीवंतं फुसति ? हंता, जाव नियमा छद्दिसिं फुसति । (२) एवं एतेणं अभिलावेणं उदयंते पोदंतं, छिद्धंते दूसंतं, छायंते आतवंतं ? जाव नियमा छद्दिसिं फुसति । [सु. ७-११. जीव-चउवीसदंडोसु पाणाइवायाइपावट्टाणपभवकम्मफुस्सणापरूवणं] ७. (१) अत्थि णं भंते ! जीवाणं पाणातिवातेणं किरिया कज्जति ? हंता, अत्थि । (२) सा भंते ! किं पुट्टा कज्जति ? अपचट्टा कज्जति ? जाव निव्वाघातेणं छद्दिसिं, वाघातं पडुच्च सिय तिदिसिं, सिय चउदिसिं, सिय पंचदिसिं । (३) सा भंते ! किं कडा कज्जति ? अकडा कज्जति ? गोयमा ! कडा कज्जति, नो अकडा कज्जति । (४) सा भंते ! किं अत्तकडा कज्जति ? परकडा कज्जति ? तदुभयकडा कज्जति ? गोयमा ! अत्तकडा कज्जति, णो परकडा कज्जति, णो तदुभयकडा कज्जति । (५) सा भंते ! किं आणुपुव्विकडा कज्जति ? अणाणुपुव्विकडा कज्जति ? गोयमा ! आणुपुव्विकडा कज्जति, नो अणाणुपुव्विकडा कज्जति । जा य कडा, जा य कज्जति, जा य कज्जिस्सति सव्वा सा आणुपुव्विकडा; नो अणाणुपुव्विकड त्ति वत्तव्वं सिया । ८. (१) अत्थि णं भंते ! नेरइयाणं पाणातिवायकिरिया कज्जति ? हंता, अत्थि । (२) सा भंते ! किं पुट्टा कज्जति ? अपुट्टा कज्जति ? जाव नियमा छद्दिसिं कज्जति । (३) सा भंते ! किं कडा कज्जति ? अकडा कज्जति ? तं चेव जाव नो अणाणुपुव्विकड

त्ति वत्तव्वं सिया । ९. जथा नेरइया (सु. ८) तथा एगिंदियवज्जा भाणितव्वा जाव वेमाणिया । १०. एकिंदिया जथा जीवा (सु. ७) तथा भाणियव्वा । ११. जहा पाणादिवाते (सु. ७-१०) तथा मुसावादे तथा अदिच्चादाणे मेहुणे परिग्गहे कोहे जाव मिच्छादंसणसल्ले एवं एते अट्टारस, चउवीसं दंडगा भाणियव्वा । सेवं भंते ! त्ति भगवं गोतमे समणं भगवं जाव विहरति । [सु. १२. रोहस्स अणगारस्स वण्णओ ] १२. तेणं कालेणं तेणं समएणं समणस्स भगवतो महावीरस्स अंतेवासी रोहे नामं अणगारे पगतिभद्दए पगतिभउए पगतिविणीते पगतिउवसंते पगतिपतणुकोह -माण -माय -लोभे मिदुमद्दवसंपन्ने अल्लीणे भद्दए विणीए समणस्स भगवतो महावीरस्स अदूरसामंते उड्डंजाणू अहोसिरे झाणकोट्टोवगते संजमेणं तवसा अप्पाणं भावेमाणे विहरति । तए णं से रोहे नामं अणगारे जातसद्धे जाव पज्जुवासमाणे एवं वदासी— [सु. १३-२४. रोहाणगारपण्हत्तरे लोयालय- जीवाजीवाइ अणेगभावाणं सासयत्त -अणाणुपुव्वीपरूवणं ] १३. पुव्विं भंते ! लोए ? पच्छा अलोए ? पुव्विं अलोए ? पच्छा लोए ? रोहा ! लोए य अलोए य पुव्विं पेते, पच्छा पेते, दो वि ते सासता भावा, अणाणुपुव्वी एसा रोहा ! । १४. पुव्विं भंते ! जीवा ? पच्छा अजीवा ? पुव्विं अजीवा ? पच्छा जीवा ? जहेव लोए य अलोए य तहेव जीवा य अजीवा य । १५. एवं भवसिद्धिया, अन्नवसिद्धिया य सिद्धी असिद्धी सिद्धा असिद्धा । १६. पुव्विं भंते ! अंडए ? पच्छा कुक्कुडी ? पुव्विं कुक्कुडी ? पच्छा अंडए ? रोहा ! से णं अंडए कतो ? भगवं ! तं कुक्कुडीतो, सा णं कुक्कुडी कतो ? भंते ! अंडगातो । एवामेव रोहा ! से य अंडए सा य कुक्कुडी, पुव्विं पेते, पच्छा पेते, दो वेते सासता भावा, अणाणुपुव्वी एसा रोहा ! । १७. पुव्विं भंते ! लोअंते ? पच्छा अलोयंते ? पुव्वं अलोअंते ? पच्छा लोअंते ? रोहा लोअंते य अलोअंते य जाव अणाणुपुव्वी एसा रोहा ! । १८. पुव्विं भंते ! लोअंते ? पच्छा सत्तमे ओवासंतरे ? पच्छा । रोहा ! लोअंते य सत्तमे य ओवासंतरे पुव्विं पेते जाव अणाणुपुव्वी एसा रोहा ! । १९. एवं लोअंते य सत्तमे य तणुवाते । एवं घणवाते, घणोदही, सत्तमा पुढवी । २०. एवं लोअंते एक्केक्केणं संजोएतव्वे इमेहिं ठाणेहिं, तं जहा— ओवासा वात घण उदही पुढवी दीवा य सागरा वासा । नेरइयादी अत्थिय समया कम्माइं लेस्साओ ॥१॥ दिट्ठी दंसण णाणा सण्ण सरीरा य जोग उवओगे । दव्व पदेसा पज्जव अद्धा, किं पुव्वि लोयंते ? ॥२॥ पुव्विं भंते ! लोयंते पच्छा सव्वद्धा ? ० । २१. जहा लोयंतेणं संजोइया सव्वे ठाणा एते, एवं अलोयंतेण वि संजोएतव्वा सव्वे । २२. पुव्विं भंते ! सत्तमे ओवारे ? पच्छा सत्तमे तणुवाते ? एवं सत्तमं ओवासंतरं सव्वेहिं समं संजोएतव्वं जाव सव्वद्धाए । २३. पुव्विं भंते ! सत्तमे तणुवाते ? पच्छा सत्तमे घणवाते ? एयं पि तहेव नेतव्वं जाव सव्वद्धा । २४. एवं उवरिल्लं एक्केक्कं संजोयंतेणं जो जो हेट्टिल्लो तं तं छड्डेतेणं नेयव्वं जाव अतीत-अणागतद्धा पच्छा सव्वद्धा जाव अणाणुपुव्वी एसा रोहा ! । सेवं भंते त्ति ! जाव विहरति । [सु. २५. गोयमपण्हत्तरे वत्थिउदाहरणजुयं लोगट्टिइभेयपरूवणं ] २५. (१) भंते त्ति भगवं गोतमे समणं जाव एवं वदासि— कतिविहा णं भंते ! लोयट्टिती पण्णत्ता ? गोयमा ! अट्टविहा लोयट्टिती पण्णत्ता । तं जहा— आगासपतिट्टिते वाते, १, वातपतिट्टिते उदही २, उदहिपतिट्टिता पुढवी ३, पुढविपतिट्टिता तस -थावरा पाणा ४, अजीवा जीवपतिट्टिता ५, जीवा कम्मपतिट्टिता ६, अजीवा जीवसंगहिता ७, जीवा कम्मसंगहिता ८ । (२) से केणट्टेणं भंते ! एवं वुच्चिति अट्टविहा जाव जीवा कम्मसंगहिता ? गोयमा ! से जहानामए केइ पुरिसे वत्थिमाडोवेति, वत्थिमाडोविता उप्पिं सितं बंधति, बंधिता मज्झे णं गंठिं बंधति, मज्झे गंठिं बंधित्ता उवरिल्लं गंठिं मुयति, मुइत्ता उवरिल्लं देसं वामेति, उवलिल्लं देसं वामेत्ता उवरिल्लं देसं आउयास्स पूरेति, पूरित्ता उप्पिं सितं बंधति बंधित्ता मज्झिल्लं गंठिं मुयति । से नूणं गोयमा ! से आउयाए तस्स वउयस्स उप्पिं उवरितले चिट्ठति ? हंता, चिट्ठति । से तेणिट्टेणं जाव जीवा कम्मसंगहिता । (३) से जहा वा केइ पुरिसे वत्थिमाडोवेति, आडोवित्ता कडीए बंधति, बंधित्ता अत्थाहमतारमपोरुसियंसि उदगंसि ओगाहेज्जा । से नूणं गोयमा ! से पुरिसे तस्स आउयायस्स उवरिमतले चिट्ठति ? हंता, चिट्ठति । एवं वा अट्टविहा लोयट्टिती पण्णत्ता जाव जीवा कम्मसंगहिता । [सु. २६. हरदगयनावादिट्टंतजुयं जीव-पोग्गलाणमन्नोन्नबद्धत्ताइपरूवणं] २६. (१) अत्थि णं भंते ! जीवा य पोग्गला य अन्नमन्नबद्धा अन्न-मन्नपुट्टा अन्नमन्नपोगाठा अन्नमन्नसिणहेपडिबद्धा अन्न मन्नछडताए चिट्ठति १ हंता अत्थि । (२) से फेणट्टेणं भंते ! जाव चिट्ठति ? गोयमा ! से जहानामए हरदे सिया पुण्णे पुण्णप्पमाणे वोलट्टमाणे वोसट्टमाणे समभरघडताए चिट्ठति, अहे णं केइ पुरिसे तंसि हरदंसि एणं महं नावं सदासवं सतछिड्डं

ओगाहेज्जा । से नूणं गोयमा ! सा णावा तेहिं आसवद्वारेहिं आपूरमाणी आपूरमाणी पुण्णा पुण्णप्पमाणा वोल्हमाणा वोसद्वमाणा समभरघडत्ताए चिद्वति ? हंता, चिद्वति । से तेणद्वेणं गोयमा ! अत्थि णं जीवा य जाव चिद्वंति । [सु. २७. सुहुमआउकायस्स पवडणपरूवणं कालद्विई य ] २७. (१) अत्थि णं भंते ! सदा समितं सुहुमे सिणेहकाये पवडति ? हंता, अत्थि । (२) से भंते ! किं उद्वे पवडति, अहे पवडति तिरिए पवडति ? गोयमा ! उद्वे वि पवडति, अहे वि पवडति, तिरिए वि पवडति । (३) जहा से बादरे आउकाए अन्नमन्नसमाउत्ते चिरं पि दीहकालं चिद्वति तथा णं से वि ? नो इणद्वे समद्वे, से णं खिप्पामेव विद्वंसमागच्छति । सेवं भंते ! सेवं भंते ! त्ति !० ।

☆☆☆ छट्ठो उद्देशो समत्तो ॥६॥ ☆ ☆ ☆ सत्तमो उद्देशो 'नेरइए' ☆ ☆ ☆ [सु. १-२. उवज्जमाणेसु चउवीसदंडएसु देस-सव्वेहिं उवज्जणाआहाराहियारो] १. (१) नेरइए णं भंते ! नेरइएसू उवज्जमाणे किं देसेणंदेसं उवज्जति १, देसेणंसव्वं उवज्जति २, सव्वेणंदेसं उवज्जति ३, सव्वेणंसव्वं उवज्जति ४ ? गोयमा ! नो देसेणंदेसं उवज्जति, नो देसेणंसव्वं उवज्जति, नो सव्वेणंदेसं उवज्जति, सव्वेणंसव्वं उवज्जति । (२) जहा नेरइए एवं जाव वेमाणिए । १। २. (१) नेरइए णं भंते ! नेरइएसु उवज्जमाणे किं देसेणंदेसं आहारेति १, देसेणंसव्वं आहारेति २, सव्वेणंदेसं आहारेति ३, सव्वेणंसव्वं आहारेति ४ ? गोयमा ! नो देसेणंदेसं आहारेति, नो देसेणंसव्वं आहारेति, सव्वेण वा देसं आहारेति, सव्वेण वा सव्वं आहारेति । (२) एवं जाव वेमाणिए । २। [सु. ३-४. उव्वट्टमाणेसु चउवीसदंडएसु देस-सव्वेहिं उव्वट्टणाआहाराहियारो ] ३. नेरइए णं भंते ! नेरइएहिंतो उव्वट्टमाणे किं देसेणंदेसं उव्वट्टति ? जहा उवज्जमाणे (सु. १) तहेव उव्वट्टमाणे वि दंडगो भाणितव्वो । ३। ४. (१) नेरइए णं भंते ! नेरइएहिंतो उव्वट्टमाणे किं देसेणंदेसं आहारेति ? तहेव जाव (सु. २ १ ), सव्वेण वा देसं आहारेति, सव्वेण वा सव्वं आहारेति । २ एवं जाव वेमाणिए । ४। [सु. ५. उववन्न-उव्वट्टेसु चउवीसदंडएसु देस-सव्वेहिं उववन्न-उव्वट्टतत्तयौराहियारो] ५. (१) नेरइए णं भंते ! नेरइएसु उववन्ने किं देसेणंदेसं उववन्ने ? एसोवि तहेव जाव सव्वेणंसव्वं उववन्ने । (२) जहा उववट्टमाणे उवज्जमाणे य चत्तारि दंडगा तथा उववन्नेणं उव्वट्टेण वि चत्तारि दंडगा भाणियव्वा । सव्वेणंसव्वं उववन्ने; सव्वेण वा देसं आहारेति, सव्वेण वा सव्वं आहारेति, एणं अभिलावेणं उववन्ने वि, उववट्टे वि नेयव्वं । ८। [सु. ६. उवज्जमाणाईसु चउवीसदंडएसु अद्व-सव्वेहिं उवज्जणाइतत्तयाहाराहियारो] ६. नेरइए णं भंते ! नेरइएसू उवज्जमाणे किं अद्वेणंअद्वं उवज्जति १, अद्वेण सव्वं उवज्जति २ ? सव्वेणंअद्वं उवज्जइ ३ ? सव्वेणंसव्वं उवज्जति ४ ? जहा पढमिल्लेणं अद्व दंडगा तथा अद्वेण वि अद्व दंडगा भाणितव्वा । नवरं जहिं देसेणंदेसं उवज्जति तहिं अद्वेणंअद्वं उवज्जावेयव्वं, एयं णाणत्तं । एते सव्वे वि सोलस दंडगा भाणियव्वा । [ सु. ७-८. जीव-चउवीसदंडएसु एगत्त-पुहत्तेणं विग्गइपरूवणं ] ७. (१) जीव णं भंते ! किं विग्गहगतिसमावन्नए ? अविग्गहगतिसमावन्नए ? गोयमा ! सिय विग्गहगतिसमावन्नए, सिय अविग्गहगतिसमावन्नगे । (२) एवं जाव वेमाणिए । ८ (१) जीवा णं भंते ! किं विग्गहगतिसमावन्नगा ? अविग्गहगतिसमावन्नगा ? गोयमा ! विग्गहगतिसमावन्नगा वि, अविग्गहगतिसमावन्नगा वि । ( २) नेरइया णं भंते ! किं विग्गहगतिसमावन्नगा ? अविग्गहगतिसमावन्नगा ? गोयमा ! सव्वे वि ताव होज्जा अविग्गहगतिसमावन्नगा १, अहवा अविग्गहगतिसमावन्नगा य विग्गहगतिसमावन्नगे य २, अहवा अविग्गहगतिसमावन्नगा य विग्गहगतिसमावन्नगा य ३ । एवं जीव- एणिंदियवज्जो तियभंगो । [सु. ९. देवस्स चवणाणंतरभवाउयपडिसंवेदणाहियारो ] ९. देवे णं भंते ! महिद्विए महज्जुतीए महब्वले महायसे महेसक्खे महाणुभावे अविउक्कंतियं चयमाणे किंचि वि कालं हिरिवत्तियं दुगुंछावत्तियं परिस्सहवत्तियं आहारं नो आहारेति; अहे णं आहारेति, आहारिज्जमाणे आहारिए, परिणामिज्जमाणे परिणामिए, पहीणे य आउए भवइ, जत्थ उवज्जति तमाउयं पडिसंवेदेति, तं जहा— तिरिक्खजोणियाउयं वा मणुस्साउयं वा ? हंता, गोयमा ! देवे णं महिद्वीए जाव मणुस्साउगं वा । [सु. १०-१२. गब्भं वक्कममाणस्स जीवस्स सइंदियत्त-ससरीरत्त-आहाराहियारो] १०. जीवे णं भंते ! गब्भं वक्कममाणे किं सइंदिए वक्कमति, अणिंदिए वक्कमति ? गोयमा ! सिय सइंसिए वक्कमइ, सिय अणिंदिए वक्कमइ । से केणद्वेणं ? गोयमा ! दव्विंदियाइं पडुच्च अणिंदिए वक्कमति, भाविंदियाइं पडुच्च सइंदिए वक्कमति, से तेणद्वेणं० । ११. जीवे णं भंते ! गब्भं वक्कममाणे किं ससरीरी वक्कमइ ? असरीरी वक्कमइ ? गोयमा ! सिय ससरीरी वक्कमति, सिय असरीरी वक्कमति । से केणद्वेणं ? गोयमा ! ओरालिय

-वेउव्विय -आहारयाइं पडुच्च असरीरी वक्कमति, तेया -कम्माइं पडुच्च ससरीरी वक्कमति; से तेणट्टेणं गोयमा ! ० । १२. जीवे णं भंते ! गब्भं वक्कममाणे तप्पढमताए किमाहारमाहारेति ? गोयमा ! माउओयं पिउसुक्कं तं तदुभयसंसिद्धं कलुसं किव्विसं तप्पढंताए आहारमाहारेति । [सु. १३-१५. गब्भगयजीवस्स आहार-उच्चार-कवलाहाराहियारा] १३. जीवे णं भंते ! गब्भगए समाणे किमाहारमाहारेति ? गोयमा ! जं से माता नाणाविहाओ रसविगतीओ आहारमाहारेति तदेक्कदेसेणं ओयमाहारेति । १४. जीवस्स णं भंते ! गब्भगतस्स समाणस्स अत्थि उच्चारैइ वा पासवणेइ वा खेलेइ वा सिंघाणेइ वा वंते इ वा पित्ते इ वा ? णो इणट्टे समट्टे । से केणट्टेणं ? गोयमा ! जीवे णं गब्भगए समाणे जमाहारेति तं चिणाइ तं सोतिंदियत्ताए जाव फासिंदियत्ताए अट्ठि-अट्ठिमिंज-केस -मंसु -रोम -नहत्ताए, से तेणट्टेणं ० । १५. जीवे णं भंते ! गब्भगते समाणे पभू मुहेणं कावलियं आहारं आहारित्तए ? गोयमा ! णो इणट्टे समट्टे । से केणट्टेणं ? गोयमा ! जीवे णं गब्भगते समाणे सव्वतो आहारेति, सव्वतो परिणामेति, सव्वतो उस्ससति, सव्वतो निस्ससति, अभिक्खणं आहारेति, अभिक्खणं परिणामेति, अभिक्खणं उस्ससति, अभिक्खणं निस्ससति, आहच्च आहारेति, आहच्च परिणामेति, आहच्च उस्ससति, आहच्च नीससति । मातुजीवरसहरणी पुत्तजीवरसहरणी मातुजीवपडिबद्धा पुत्तजीवं फुडा तम्हा आहारेइ, तम्हा चिणाति, तम्हा परिणामेति, अवरा वि य णं पुत्तजीवपडिबद्धा माउजीवफुडा तम्हा चिणाति, तम्हा उवचिणाति; से तेणट्टेणं ० जाव नोपभू मुहेणं कावलिकं आहारं आहारित्तए । [सु. १६-१८. गब्भयसरीरस्स माइ-पिइअंगविभागा माइ-पिइसरीरकालट्ठिई य] १६. कति णं भंते ! मातिअंगा पण्णत्ता ? गोयमा ! तओ मातियंगा पण्णत्ता । तं जहा— मंसे सोणिते मत्थुलुंगे । १७. कति णं भंते ! पितियंगा पण्णत्ता ? गोयमा ! तओ पेतियंगा पण्णत्ता । तं जहा— अट्ठि अट्ठिमिंजा केस -मसु -रोम -नहे । १८. अम्मापेतिए णं भंते ! सरीरए केवइयं कालं संचिद्धति ? गोयमा ! जावतियं से कालं भवधारणिज्जे सरीरए अव्वावच्चे भवति एवतियं कालं संचिद्धति, अहे णं समए समए वोक्कसिज्जमाणे २ चरमकालसमयंसि वोच्छिच्चे भवइ । [सु. १९-२०. गब्भम्मि मियस्स जीवस्स नरय - देवलोगुववायाहियारो] १९. (१) जीवे णं भंते ! गब्भगते समाणे नेरइएसु उववज्जेज्जा ? गोयमा ! अत्थेगइए उववज्जेज्जा, अत्थेगइए नो उववज्जेज्जा । (२) से केणट्टेणं ? गोयमा ! से णं सन्नी पंचिंदिए सव्वाहिं पज्जत्तीहिं पज्जत्तए वीरियलद्धीए वेउव्वियलद्धीए पराणीयं आगयं सोच्चा निसम्म पदेसे निच्छुभति, २ वेउव्वियसमुग्घाएणं समोहण्णइ वेउव्वियसमुग्घाएणं समोहण्णित्ता चाउरंगिणिं सेणं विउव्वइ, चाउरंगिणिं सेणं विउव्वेत्ता चाउरंगिणीए सेणाए पराणीएणं सद्धिं संगामं संगामेइ, से णं जीवे अत्थकामए रज्जकामए भोगकामए कामकामए अत्थकंखिए रज्जकंखिए भोगकंखिए कामकंखिए, अत्थपिवासिते रज्जपिवासिते भोगपिवासिए कामपिवासिते, तुच्चते तम्मणे तल्लेसे तदज्झवसिए तत्तिव्वज्झवसाणे तदट्ठोउत्ते तदप्पितकरणे तब्भावणाभाविते एतंसि णं अंतरंसि कालं करेज्ज नेरतिएसु उववज्जइ; से तेणट्टेणं गोयमा ! जाव अत्थेगइए उववज्जेज्जा, अत्थेगइए नो उववज्जेज्जा । २०. जीवे णं भंते ! गब्भगते समाणे देवलोगेसु उववज्जेज्जा ? गोयमा ! अत्थेगइए उववज्जेज्जा अत्थेगइए नो उववज्जेज्जा । से केणट्टेणं ? गोयमा ! से णं सन्नी पंचिंदिए सव्वाहिं पज्जत्तीहिं पज्जत्तए तहारूवस्स समणस्स वा माहणस्स वा अंतीए एगमवि आरियं धम्मयं सुवयणं सोच्चा विसम्म ततो भवति संवेगजातसट्टे तिव्विधम्मणुरागरते, से णं जीवे धम्मकामए पुण्णकामए सग्गकामए मोक्खकामए, धम्मकंखिए पुण्णकंखिए सग्गकंखिए मोक्खकंखिए, धम्मपिवासिए पुण्णपिवासिए सग्गपिवासिए मोक्खपिवासिए, तच्चित्ते तम्मणे तल्लेसे तदज्झवसिते तत्तिव्वज्झवसाणे तदट्ठोवउत्ते तदप्पितकरणे तब्भावणाभाविते एयंसि णं अंतरंसि कालं करेज्ज देवलोएसु उववज्जति; से तेणट्टेणं गोयमा ! ० । [सु. २१. गब्भट्टियस्स जीवस्स आगार-किरियापरूवणं] २१. जीवे णं भंते ! गब्भगए समाणे उत्ताणए वा पासिल्लए वा अंबखुज्जए वा अच्छेज्ज वा चिट्ठेज्ज वा निसीएज्ज वा तुयट्टेज्ज वा, मातूए सुवमाणीए सुवति, जागरमाणीए जागरति, सुह्याए सुहिते भवइ, दुहिताए दुहिए भवति ? हंता, गोयमा ! जीवे णं गब्भगए समाणे जाव दुहियाए दुहिए भवति । [सु. २२ पसवणसमए तयणंतरं च जीवावत्थानिस्वणाइ] २२. अहे णं पसवणकालसमयंसि सीसेण वा पाएहिं वा आगच्छति सममागच्छइ तिरियमागच्छति विणिहायमावज्जति ।

पणवज्झाणि य से कम्माइं बद्धाइं पुट्टाइं निहत्ताइं कडाइं पुट्टविताइं अभिनिविट्टाइं अभिसमन्नागयाइं उदिण्णाइं, नो उवसंताइं भवंति; तओ भवइ दुरूवे दुव्वण्णे दुग्गंथे दूरसे दुप्फास; अणिट्टे अकंते अप्पिए असुभे अमणुण्णे अमणामे हीणस्सरे दीणस्सरे अणिट्टस्सरे अकंतस्सरे अप्पियस्सरे असुभस्सरे अमणुण्णस्सरे अमणामस्सरे अणादेज्जवयणे पच्चायाए याऽवि भवति । वणवज्झाणि य से कम्माइं नो बद्धाइं० पसत्थं नेतव्वं जाव आदेज्जवयणे पच्चायाए याऽवि भवति । सेवं भंते ! सेवं भंते ! त्ति० । **☆☆☆॥ सत्तमो उद्देसोसत्तो ॥ ☆☆☆ अट्टमो उद्देसो 'बाले' ☆☆☆** [सु. १-३. एगंतबाल-पंडित -बालपंडितमणुस्साणं आउयबंधपरूवणाइ] १. एगंतबाले णं भंते ! मणुस्से किं नेरइयाउयं पकरेति ? तिरिक्खाउयं पकरेति ? मणुस्साउयं पकरेति ? देवाउयं पकरेति ? नेरइयाउयं किच्चा नेरइएसु उववज्जति ? तिरियाउयं किच्चा तिरिएसु उववज्जइ ? मणुस्साउयं किच्चा मणुस्सेसु उववज्जइ ? देवाउयं किच्चा देवलोगेसु उववज्जति ? गोयमा ! एगंतबाले णं मणुस्से नेरइयाउयं पि पकरेइ, तिरियाउयं पि पकरेइ, मणुयाउयं पि पकरेइ, देवाउयं पि पकरेइ; णेरइयाउयं पि किच्चा नेरइएसु उववज्जति, तिरियाउयं पि किच्चा तिरिएसु उववज्जति, मणुस्साउयं पि किच्चा मणुस्सेसु उववज्जति, देवाउयं पि किच्चा देवेसु उववज्जति । २. एगंतपंडिए णं भंते ! मणुस्से किं नेरइयाउयं पकरेइ ? जाव देवाउयं किच्चा देवलोएसु उववज्जति ? गोयमा ! एगंतपंडिए णं मणुस्से आउयं सिय पकरेति, सिय नो पकरेति । जइ पकरेइ नो नेरइयाउयं पकरेइ, नो तिरियाउयं पकरेइ, नो मणुस्साउयं पकरेइ, देवाउयं पकरेइ । नो नेरइयाउयं किच्चा नेरइएसु उववज्जइ, णो तिरि०, णो मणुस्सा०, देवाउयं किच्चा देवेसु उववज्जति । से केणट्टणं जाव देवाउयं किच्चा देवेसु उववज्जति ? गोयमा ! एगंतपंडितस्स णं मणुस्सस्स केवलमेव दो गतीओ पन्नायंति, तं जहा-अंतकिरिया चेव, कप्पोववत्तिया चेव । से तेणट्टेणं गोयमा ! जाव देवाउयं किच्चा देवेसु उववज्जति । ३. बालपंडिते णं भंते ! मणुस्से किं नेरइताउदं पकरेति जाव देवाउयं किच्चा देवेसु उववज्जति ? गोयमा ! नो नेरइयाउयं पकरेति जाव देवाउयं किच्चा देवेसु उववज्जति । से केणट्टेणं जाव देवाउयं किच्चा देवेसु उववज्जति ? गोयमा ! बालपंडिए णं मणुस्से तहारूवस्स समणस्स वा माहणस्स वा अंतिए एगमवि आरियं धम्मियं सुवयणं सोच्चा निसम्म देसं उवरमति, देसं नो उवरमइ, देसं पच्चक्खाति, देसं णो पच्चक्खाति; से णं तेणं देसोवरम-देसपच्चक्खाणेणं नो नेरइयाउयं पकरेति जाव देवाउयं किच्चा देवेसु उववज्जति । से तेणट्टेणं जाव देवेसु उववज्जइ । [सु. ४-८. मियकूडपासकारग-तिणदाहगाइपुरिसाणं काइयाइकिरियापरूवणं] ४ पुरिसे णं भंते ! कच्छंसि वा १ दहंसि वा २ उदगंसि वा ३ दवियंसि वा ४ वलयंसि वा ५ नूमंसि वा ६ गहणंसि वा ७ गहणविदुग्गंसि वा ८ पव्वतंसिवा ९ पव्वतविदुग्गंसि वा १० वणंसि वा ११ वणविदुग्गंसि वा १२ मियवित्तीए मियसंकप्पे मियपणिहाणे मियवहाए गंता 'एते मिए' त्ति काउं अन्नयरस्स मियस्स वहाए कूड-पासं उदाइ; ततो णं भंते ! से पुरिसे कतिकरिए ? गोयमा ! जावं च णं से पुरिसे कच्छंसि वा १२ जाव कूड-पासं उदाइ तावं च णं से पुरिसे सिय तिकरिए, सिय चउकिरिए, सिय पंचकिरिए । से केणट्टेणं भंते ! एवं वुच्चति 'सिय तिकरिए, सिय चउकिरिए, सिय पंचकिरिए' ? गोयमा ! जे भविए उद्ववणयाए, णो बंधणयाए, णो मारणयाए, तावं च णं से पुरिसे काइयाए अहिगरणियाए पादोसियाए तीहिं किरियाहिं पुट्टे । जे भविए उद्ववणयाए वि बंधणयाए वि, णो मारणयाए तावं च णं से पुरिसे काइयाए अहिगरणियाए पाओसियाए पारियावणियाए चउहिं किरियाहिं पुट्टे । जे भविए उद्ववणयाए वि बंधणयाए वि मारणयाए वि तावं च णं से पुरिसे काइयाए जाव पाणातिवातकिरियाए पंचहिं किरियाहिं पुट्टे । से तेणट्टेणं जाव पंचकिरिए । ५. पुरिसे णं भंते ! कच्छंसि वा जाव वणविदुग्गंसि वा तणाइं ऊसविय ऊसविय अगणिकायं निसिरइ तावं च णं भंते ! से पुरिसे कतिकरिए ? गोयमा ! सिय तिकरिए सिय चउकिरिए सिय पंचकिरिए । से केणट्टेणं ? गोयमा ! जे भविए उस्सवणयाए तिहिं; उस्सवणयाए वि निसिरणयाए वि, नो दहणयाए चउहिं; जे भविए उस्सवणयाए वि निसिरणयाए वि दहणयाए वि तावं च णं से पुरिसे काइयाए जाव पंचहिं किरियाहिं पुट्टे । से तेणट्टेणं गोयमा ! ० । ६. पुरिसे णं भंते ! कच्छंसि वा जाव वणविदुग्गंसि वा मियवित्तीए मियसंकप्पे मियपणिहाणे मियवहाए गंता 'एए मिये' त्ति काउं अन्नयरस्स मियस्स वहाए उसुं निसिरइ, ततो णं भंते ! से पुरिसे

कतिकिरिए ? गोयमा ! सिय तिकिरिए, सिय चउकिरिए, सिय पंचकिरिए । से केणट्टेणं ? गोयमा ! जे भविए निसिरणयाए तिहिं; जे भविए निसिरणयाए वि विद्धंसणयाए वि, नो मारणयाए चउहिं; जे भविए निसिरणयाए वि विद्धंसणयाए वि मारणयाए वि तावं च णं से पुरिसे जाव पंचहिं किरियाहिं पुट्टे । से तेणट्टेणं गोयमा ! सिय तिकिरिए, सिय चउकिरिए, सिय पंचकिरिए । ७. पुरिसे णं भंते ! कच्छंसि वा जाव अन्नयरस्स मियस्स वहाए आयातकण्णायतं उंसुं आयामेत्ता चिट्ठिज्जा, अन्ने य से पुरिसे मग्गतो आगम्म सयपाणिणा असिणा सीसं छिंदेज्जा, से य उसू ताए चैव पुव्वायामणयाए तं मियं विंधेज्जा, से णं भंते ! पुरिसे किं मियवेरेणं पुट्टे ? पुरिसवेरेणं पुट्टे ? गोयमा ! जे मियं मारेति से मियवेरेणं पुट्टे, जे पुरिसं मारेइ से पुरिसवेरेणं पुट्टे । से केणट्टेणं भंते ! एवं वुच्चइ जाव से पुरिसरेरेणं पुट्टे ? से नूणं गोयमा ! कज्जमाणे कडे, संधिज्जमाणे संधिते, निव्वत्तिज्जमाणे निव्वत्तिए, निसिरिज्जमाणे निसट्टे त्ति वत्तव्वं सिया ? हंता, भगवं ! कज्जमाणे कडे जाव निसट्टे त्ति वत्तव्वं सिया । से तेणट्टेणं गोयमा ! जे मियं मारेति से मियवेरेणं पुट्टे, जे पुरिसं मारेइ से पुरिसवेरेणं पुट्टे । अंतो छण्हं मासाणं मरइ काइयाए जाव पंचहिं किरियाहिं पुट्टे, बाहिं छण्हं मासाणं मरति काइयाए जाव पारितावणियाए चउहिं किरियाहिं पुट्टे । ८. पुरिसे णं भंते ! पुरिसं सत्तीए समभिधंसेज्जा, सयपाणिणा वा से असिणा सीसं छिंदेज्जा, ततो णं भंते ! से पुरिसे कतकिरिए ? गोयमा ! जाव च णं से पुरिसे तं पुरिसं सत्तीए समभिधंसेइ सयपाणिणा वा से असिणा सीसं छिंदइ तावं च णं से पुरिसे काइयाए अहिगरणिं जाव पाणातिवायकिरियाए पंचहिं किरियाहिं पुट्टे, आसन्नवहणं य अणवकंखणवत्तिणं पुरिसवेरेणं पुट्टे । [सु. ९. जुज्झमाणाणं जय-पराजयहेउनिरूवणं] ९. दो भंते ! पुरिसा सरिसया सरित्तया सरिव्वया सरिसभंडमत्तोवगरणा अन्नमन्नेणं सद्धिं संगामं संगामेति, तत्थ णं एगे पुरिसे पराइणइ एगे पुरिसे पराइज्जइ, से कहमेयं भंते ! एवं गोयमा ! सवीरिए परायिणति, अवीरिए पराइज्जति । से केणट्टेणं जाव पराइज्जति ? गोयमा ! जस्स णं वीरियवज्जाइं कम्माइं बद्धाइं नो पुट्टाइं जाव नो अभिसमन्नागताइं, नो उदिण्णाइं, उवसंताइ भवंति से णं परायिणति; जस्स णं वीरियवज्जाइं, कम्माइं बद्धाइं जाव नो उदिण्णाइं, कम्माइं नो उवसंताइं भवंति से णं पुरिसे परायिज्जति । से तेणट्टेणं गोयमा ! एवं वुच्चइ सवीरिए पराजिणइ, अवीरिए पराइज्जति ! [सु. १०-११. जीव-चउवीसदंडएसु सवीरियत्त-अवीरियत्तपरूवणं] १०. जीवा णं भंते ! किं सवीरिया ? अवीरिया गोयमा ! सवीरिया वि, अवीरिया वि । से केणट्टेणं ? गोयमा ! जीवा दुविहा पण्णत्ता; तं जहा—संसारसमावन्नगा य, असंसारसमावन्नगा य । तत्थ णं जे ते असंसारसमावन्नगा ते णं सिद्धा, सिद्धा णं अवीरिया । तत्थ णं जे ते संसारसमावन्नगा ते दुविहा पण्णत्ता; तं जहा—सेलेसिपडिवन्नगा य, असेलेसिपडिवन्नगा य । तत्थ णं जे ते सेलेसिपडिवन्नगा ते णं लद्धिवीरिएणं सवीरिया, करणवीरिएणं अवीरिया । तत्थ णं जे ते असेलेसिपडिवन्नगा ते णं लद्धिवीरिएणं सवीरिया, करणवीरिएणं सवीरिया वि अवीरिया वि । से तेणट्टेणं गोयमा ! एवं वुच्चति जीवा दुविहा पण्णत्ता; तं जहा—सवीरिया वि । अवीरिया वि ११. (१) नेरइया णं भंते ! किं सवीरिया ! अवीरिया ? गोयमा ! नेरइया लद्धिवीरिएणं सवीरिया, करणवीरिएणं सवीरिया वि अवीरिया वि । से केणट्टेणं ? गोयमा ! जेसि णं नेरइयाणं अत्थि उट्टाणे कम्मे बले वीरिए पुरिसक्कारपरक्कमे ते णं नेरइया लद्धिवीरिएणं सवीरिया, करणवीरिएणं सवीरिया, जेसि णं नेरइयाणं नत्थि उट्टाणे जाव परक्कमे ते णं नेरइया लद्धिवीरिएणं सवीरिया, करणवीरिएणं अवीरिया । से तेणट्टेणं ० । (२) जहा नेरइया एवं जाव पंचिंदियतिरिक्खजोणिया । (३) मणुस्सा जहा ओहिया जीवा । नवरं सिद्धवज्जा भाणियव्वा । ४ वाणमंतर-जोतिस-वेमाणिया जहा नेरइया । सेवं भंते ! सेवं भंते ! त्ति ० । ★ ★ ★॥ पढमसए अट्टमो उद्देसो समत्तो ॥ ★ ★ ★ नवमो उद्देसो 'गरुए' ★ ★ ★ [सु. १-३. जीवेसु गरुयत्त - लहुयत्ताईणं हेउपरूवणं] १. कहां णं भंते ! जीवा गरुयत्तं हव्वमागच्छंति ? गोयमा ! पाणातिवातेणं मुसावादेणं अदिण्णां मेहुणं परिग्गं कोहं माणं मायां लोभं पेज्जं दोसं कलहं अब्भक्खाणं पेसुन्नं रति-अरतिं परपरिवायं मायामोसं मिच्छादंसणसल्लेणं, एवं खलु गोयमा ! जीवा गरुयत्तं हव्वमागच्छंति । २. कहां णं भंते ! जीवा लहुयत्तं हव्वमागच्छंति ? गोयमा ! पाणातिवातवेरमणेणं जाव मिच्छादंसणसल्लवेरमणेणं, एवं खलु गोयमा ! जीवा लहुयत्तं हव्वमागच्छंति । ३. एवं आकुलीकरेति,

एवं परितीकरेति । एवं दीहीकरेति, एवं हस्सीकरेति । एवं अणुपरियट्टंति, एवं वीतीवयंति । पसत्था चत्तारि । अप्पसत्था चत्तारि । [सु. ४-५. सत्तमओवासंतर-तणुवायाईसु गरुयत्त-लहुयत्ताइपरूवणं ] ४. सत्तमे णं भंते ! ओवासंतरे किं गरुए, लहुए, गरुयलहुए, अगरुयलहुए ? गोयमा ! नो गरुए, नो लहुए, नो गरुयलहुए, अगरुयलहुए । ५. (१) सत्तमे णं भंते ! तणुवाते किं गरुए, लहुए, गरुयलहुए, अगरुयलहुए ? गोयमा ! नो गरुए, नो लहुए, गरुयलहुए, नो अगरुयलहुए । (२) एवं सत्तमे घणवाए, सत्तमे घणोदही, सत्तमा पुढवी । (३) ओवासंतराइ सव्वाइं जहा सत्तमे ओवासंतरे (सु. ४) । (४) सेसा जहा तणुवाए । एवं-ओवास वाय घणउदहि पुढवी दीवा य सागरा वासा । [सु. ६. चउवीसदंडएसु गरुयत्त-लहुयत्ताइपरूवणं] ६. (१) नेरइयाणं भंते ! किं गरुया जाव अगरुयलहुया ? गोयमा ! नो गरुया, नो लहुया, गरुयलहुया वि, अगरुयलहुया वि । से केणट्टेणं ? गोयमा ! वेउव्विय-तेयाइं पडुच्च नो गरुया, नो लहुया, गरुयलहुया, नो अगरुयलहुया । जीवं च कम्मणं च पडुच्च नो गरुया, नो लहुया, नो गरुयलहुया, अगरुयलहुया । से तेणट्टेणं० । (२) एवं जाव वेमाणिया । नवरं णाणत्तं जाणियव्वं सरीरेहिं । [सु. ७-१६. अत्थिकाय-समय-कम्म-लेस्सा-दिट्ठिआईसु गरुयत्त-लहुयत्तपरूवणं] ७. धम्मत्थिकाये जाव जीवत्थिकाये चउत्थपदेणं । ८. पोग्गलत्थिकाए णं भंते ! किं गरुए, लहुए, गरुयलहुए, अगरुयलहुए ? गोयमा ! णो गरुए, नो लहुए, गरुयलहुए वि, अगरुयलहुए वि । से केणट्टेणं ? गोयमा ! गरुयलहुयदव्वाइं पडुच्च नो गरुए, नो लहुए, गरुयलहुए, नो अगरुयलहुए । अगरुयलहुयदव्वाइं पडुच्च नो गरुए, नो लहुए, नो गरुयलहुए, अगरुयलहुए । ९. समया कम्माणि य चउत्थपदेणं । १०. (१) कणहलेस्सा णं भंते ! किं गरुया, जाव अगरुयलहुया ? गोयमा ! नो गरुया, नो लहुया, गरुयलहुया वि, अगरुयलहुया वि । से केणट्टेणं ? गोयमा ! दव्वलेसं पडुच्च ततियपदेणं, भावलेसं पडुच्च चउत्थपदेणं । (२) एवं जाव सुक्कलेसा । ११. दिट्ठी-दंसण-नाण-अण्णाण-सण्णओ चउत्थपदेणं णेतव्वाओ । १२. हेट्ठिल्ला चत्तारि सरीरा नेयव्वा ततियएणं पदेणं । कम्मयं चउत्थएणं पदेणं । १३. मणजोगो वइजोगो चउत्थएणं पदेणं । कायजोगो ततिएणं पदेणं । १४. सागरोवओगो अणागारोवओगो चउत्थएणं पदेणं । १५. सव्वदव्वा सव्वपदेसा सव्वपज्जवा जहा पोग्गलत्थिकाओ (सु. ८) । १६. तीतद्धा अणागतद्धा सव्वद्धा चउत्थेणं पदेणं । [सु. १७-१८. लाघवियाइजुएसु अकसाईसु य पसत्थत्तपरूवणं ] १७. से नूणं भंते ! लाघवियं अप्पिच्छा अमुच्छा अगेही अपडिबद्धता समणाणं णिग्गंथाणं पसत्थं ? हंता, गोयमा ! लाघवियं जाव पसत्थं । १८. से नूणं भंते ! अकोहत्तं अमाणत्तं अमायत्तं अलोभत्तं समणाणं निग्गंथाणं पसत्थं ? हंता, गोयमा ! अकोहत्तं जाव पसत्थं । [सु. १९. सिज्झणाए कंखा-पदोसखयस्स पाहण्णपरूवणं] १९. से नूणं भंते ! कंखा-पदोसे खीणे समणे निग्गंथे अंतकरे भवति, अंतिससरीरिए वा, बहुमोहे वि य णं पुव्विं विहरित्ता अह पच्छा संवुडे कालं करेति तओ पच्छा सिज्झति ३ जाव अंतं करेइ ? हंता गोयमा ! कंखा-पदोसे खीणे जाव अंतं करेति । [सु. २०. एणं जीवं पडुच्च इहअपरभवियाउयाणं एगसमयबंधणिसेहो] २०. अन्नउत्थिया णं भंते ! एवमाइक्खंति एवं भासेंति एवं पण्णवेति एवं परूवेति-“एवं खलु एगे जीवे एगेणं समएणं दो आउयाइं पगरेति, तं जहा-इहभवियाउयं च, परभवियाउगं च । जं समयं इहभवियाउगं पकरेति तं समयं परभवियाउगं पकरेति, जं समयं परभवियाउगं पकरेति तं समयं इहभवियाउगं पकरेइ; इहभवियाउगस्स पकरणयाए परभवियाउगं पकरेइ, परभवियाउगस्स पगरणताए इहभवियाउयं पकरेति । एवं खलु एगे जीवे एगेणं समएणं दो आउयाइं पकरेति, तं०- इहभवियाउयं च, परभवियाउयं च ।” से कहमेतं भंते ! एवं ? गोयमा ! जं णं ते अण्णउत्थिया एवमाइक्खंति जाव परभवियाउयं च । जे ते एवमाहंसु मिच्छं ते एवमाहंसु । अहं पुण गोयमा ! एवमाइक्खामि जाव परूवेमि— एवं खलु एगे जीवे एगेणं समएणं आउगं पकरेति, तं जहा— इहभवियाउयं वा, परभवियाउयं वा; जं समयं इहभवियाउयं पकरेति णो तं समयं परभवियाउयं पकरेति, जं समयं परभवियाउयं पकरेइ णो तं समयं इहभवियाउयं पकरेइ; इहभवियाउयस्स पकरणताए णो परभवियाउयं पकरेति, परभवियाउस्स पकरणताए णो इहभवियाउयं पकरेति । एवं खलु एगे जीवे एगेणं समएणं एणं आउयं पकरेति, तं०— इहभवियाउयं वा, परभवियाउयं वा । सेवं भंते ! सेवं भंते ! त्ति भगवं गोयमे जाव विहरति । [सु. २१-२४. पासावच्चिज्जस्स कालासवेसियपुत्तस्स सामाइयाइविसया पुच्छा थेरकयसमाहणं पंचजामधम्मपडिवज्जणं निव्वाणं च ] २१. (१) तेणं कालेणं समएणं पासावच्चिज्जे कालासवेसियपुत्ते

णामं अणगारे जेणेव थेरा भगवंतो तेणेव उवागच्छति, उवागच्छिता थेरे भगवंते एवं वयासी— थेरा सामाइयं ण जाणंति, थेरा सामाइयस्स अट्ठं ण याणंति, थेरा पच्चक्खाणं ण याणंति, थेरा पच्चक्खाणस्स अट्ठं ण याणति, थेरा संजमं ण याणंति, थेरा संजमस्स अट्ठं ण याणंति, थेरा संवरं ण याणंति, थेरा संवरस्स अट्ठं ण याणंति, थेरा विवेगं याणंति, थेरा विवेगस्स अट्ठं ण याणंति, थेरा विउस्सग्गं ण याणंति, थेरा विउस्सग्गस्स अट्ठं ण याणंति । (२) तए णं ते थेरा भगवंतो कालासवेसियपुत्तं अणगारं एवं वयासी— जाणामो णं अज्झो ! सामाइयं, जाणामो णं अज्झो ! सामाइयस्स अट्ठं जाव जाणामो णं अज्झो ! विउस्सग्गस्स अट्ठं । (३) तए णं से कालासवेसियपुत्ते अणगारे ते थेरे भगवंते एवं वयासी— जति णं अज्झो ! तुब्भे जाणह सामाइयं, जाणह सामाइयस्स अट्ठं जाव जाणह विउस्सग्गस्स अट्ठं, किं भे अज्जो सामाइए ? किं भे अज्जो ! सामाइयस्स अट्ठे ? जाव किं भे विउस्सग्गस्स अट्ठे ? (४) तए णं ते थेरा भगवंतो कालासवेसियपुत्तं अणगारं एवं वयासी— आया णे अज्जो ! सामाइए, आया णे अज्जो ! सामाइयस्स अट्ठे जाव विउस्सग्गस्स अट्ठे । (५) तए णं से कालासवेसियपुत्तं अणगारं थेरे भगवंते एवं वयासी— जति भे अज्जो ! आया सामाइए, आया सामाइयस्स अट्ठे एवं जाव आया विउस्सग्गस्स अट्ठे, अवहट्ठु कोह -माण- माया -लोभे किमट्ठं अज्जो ! गरहह ? कालासाह संजमट्ठयाए । (६) से भंते ! किं गरहा संजमे ? अगरहा संजमे ? कालास० ! गरहा संजमे, नो अगरहा संजमे, गरहा वि य णं सव्वं दोसं पविणेति, सव्वं बालियं परिण्णाए एवं खु णे आया संजमे उवहिते भवति, एवं खु णे आया संजमे उवचिते भवति, एवं खु णे आया संजमे उवट्ठिते भवति । २२. (१) एत्थ णं से कालासवेसियपुत्ते अणगारे संबुद्धे थेरे भगवंते वंदति णमंसति, २ एवं वयासी— एतेसि णं भंते ! पदाणं पुब्बिं अण्णाणयाए असवणयाए अबोहीए अणभिगमेणं अदिट्ठाणं अस्सुताणं अमुताणं अविण्णायाणं अवोगडाणं अब्बोच्छिन्नाणं अणुवधारिताणं एतमट्ठे णो सद्वहिते, णो पत्तिए, णो रोइए । इदाणिं भंते ! एतेसिं पदाणं जाणताए सवणताए बोहीए अभिगमेणं दिट्ठाणं सुताणं मुयाणं विण्णाताणं वोगडाणं वोच्छिन्नाणं णिज्जूढाणं उवधारिताणं एतमट्ठं सद्वहामि, पत्तियामि, रोएमि । एवमेतं से जहेयं तुब्भे वदह । (२) तए णं ते थेरा भगवंतो कालसवेसियपुत्तं अणगारं एवं वयासी— सद्वहाहि अज्जो ! पत्तियाहि अज्जो ! से जहेतं अम्हे वदामो । २३. (१) तए णं से कालासवेसियपुत्ते अणगारे थेरे भगवंते वंदइ नमंसइ, २ एवं वदासी — इच्छामि णं भंते ! तुब्भं अंतिए चाउज्जामाओ धम्माओ पंचमहव्वइयं सपडिक्कमणं धम्मं उवसंपज्जित्ताणं विहरित्तए । अहासुहं देवाणुप्पिया ! मा पडिबंधं करेह । (२) तए णं से कालसवेसियपुत्ते अणगारे थेरे भगवंते वंदइ नमंसइ, वंदित्ता नमंसित्ता चाउज्जामाओ धम्माओ पंचमहव्वइयं सपडिक्कमणं धम्मं उवसंपज्जित्ताणं विहरइ । २४. तए णं से कालसवेसियपुत्ते अणगारे बहूणि वासाणि सामण्णपरियागं पाउणइ, २ जस्सट्ठाए कीरति नग्गभावे मुंडभावे अण्हाणयं अदंतधुवणयं अच्छत्तयं अणोवाहणयं भूमिसेज्जा फलगसेज्जा कट्ठसेज्जा केसलोओ बंभचेरवासो परघरपवेसो लब्धावलब्धी, उच्चावया गामकंटगा बावीसं परिसहोवसग्गा अहियासिज्जंति तमट्ठं आराहेइ, २ चरमेहिं उस्सासे-नीसासेहिं सिद्धे बुद्धे मुक्के परिनिव्वुडे सव्वदुक्खप्पहीणे । [सु. २५. गोयमपुच्छाए सेट्ठिपभिइं पडुच्च अपच्चक्खाणमिरियापरूवणं ] २५. ‘भंते !’ त्ति भगवं गोयमा ! समणं भगवं महावीरं वंदति नमंसति, २ एवं वदासी— से नूणं भंते ! सेट्ठिस्स य तणुयस्स य किविणस्स य खत्तियस्स य समा चेव अपच्चक्खाणकिरिया कज्जइ ? हंता, गोयमा ! सेट्ठिस्स य जाव अपच्चक्खाणकिरिया कज्जइ । से केणट्ठेणं भंते ! ० ? गोयमा ! अविरतिं पडुच्च; से तेणट्ठेणं गोयमा ! एवं वुच्चइ सेट्ठिस्स य तणु० जाव कज्जइ । [सु. २६. आहाकम्मभोइणो गुरुकम्मयापरूवणं ] २६. आहाकम्मं णं भुजमाणे समणे निग्गंथे किं बंधति ? किं पकरेति ? किं चिणाति ? किं उवचिणाति ? गोयमा ! आहाकम्मं णं भुजमाणे आउयवज्जओ सत्त कम्मपगडीओ सिढिलबंधणबद्धाओ धणियबंधणबद्धाओ पकरेइ जाव अणुपरियट्ठइ । से केणट्ठेणं जाव अणुपरियट्ठइ ? गोयमा ! आहाकम्मं णं भुजमाणे आयाए धम्मं अतिक्रमति, आयाए धम्मं अतिक्रममाणे पुढविक्कायं णावकंखति जाव तसकायं णावकंखति, जेसिं पि य णं जीवाणं सरीराइं आहारमाहारेइ ते वि जीवे नावकंखति । से तेणट्ठेणं गोयमा ! एवं वुच्चइ— आहाकम्मं णं भुजमाणे आउयवज्जओ सत्त कम्मपगडीओ जाव अणुपरियट्ठति । [सु. २७. फासएसणिज्जभोइणो लहुकम्मयापरूवणं ] २७. फासुएसणिज्जं णं भंते ! भुजमाणे किं बंधइ जाव उवचिणाइ ? गोयमा ! फासुएसणिज्जं णं भुजमाणे आउयवाज्जओ

सत्तं कम्मपयडीओ धणियबंधणबद्धाओ सिढिलबंधणबद्धाओ पकरेइ जहा संवुडे णं (स० १ उ० १ सु.११ २ ), नवरं आयं च णं कम्मं सिय बंधइ, सिय नो बंधइ । सेसं तहेव जाव वीतीयति । से केणट्टेणं जाव वीतीयति ? गोयमा ! फासुएसणिज्जं भुंजमाणे समणे निग्गंथे आताए धम्मं णाइक्कमति, आताए धम्मं अणतिक्रममाणे पुढविक्कायं अवकंखति जाव तसकायं अवकंखति, जेसिं पि य णं जीवाणं सरीराइं आहारेति ते वि जीवे अवकंखति, से तेणट्टेणं जाव वीतीयति । [सु. २८. अथिर-थिर -बालाईणं परिवट्टणा -अपरिवट्टणा -सासयाइपरूवणं ] २८. से नूणं भंते ! अथिरे पलोट्टति, नो थिरे पलोट्टति; अथिरे भज्जति, नो थिरे भज्जति; सासए बालए, बालियत्तं असासयं; सासते पंडिते, पंडितत्तं असासतं ? हंता, गोयमा ! अथिरे पलोट्टति जाव पंडितत्तं असासतं । सेवं भंते ! सेवं भंतेत्ति जाव विहरति । ☆☆☆॥

**नवमो उद्देशो समत्तो ॥ ☆☆☆ दसमो उद्देशो 'चलणाओ' ☆☆☆** [ सु. १. चलमाणचलिताचलित- परमाणुपोग्गलसंहननासंहनन -भासाऽभासा- किरियादुक्खाईसु अन्नउत्थियपरूवणा तप्पडिसेहो य ] १. अन्नउत्थिया णं भंते ! एवमाइक्खंति जाव एवं परूवेत्ति— “एवं खलु चलमाणे अचलिते जाव निज्जरिज्जमाणे अणिज्जिणे । दो परमाणुपोग्गला एगयओ न साहन्नंति । कम्हा दो परमाणुपोग्गला एगयतो न साहन्नंति ? दोण्हं परमाणुपोग्गलाणं नत्थि सिणेहकाए तम्हा दो परमाणुपोग्गला एगयओ न साहन्नंति । तिण्णि परमाणुपोग्गला एगयओ साहन्नंति, कम्हा तिण्णि परमाणुपोग्गला एगयओ साहन्नंति ? तिण्हं परमाणुपोग्गलाणं अत्थि सिणेहकाए तम्हा तिण्णि परमाणुपोग्गला एगयओ साहन्नंति । ते भिज्जमाणा दुहा वि तहा वि कज्जंति, दुहा कज्जमाणा एगयओ दिवहे परमाणुपोग्गले भवति, एगयओ वि दिवहे परमाणुपोग्गले भवति; तिहा कज्जमाणा तिण्णि परमाणुपोग्गला भवंति, एवं जाव चत्तारि, पंच परमाणुपोग्गला एगयओ साहन्नंति, एगयओ साहन्नित्ता दुक्खत्ताए कज्जंति, दुक्खे वि य णं से सासते सया समितं चिज्जति य अवचिज्जति य । पुव्विं भासा भासा, भासिज्जमाणी भासा अभासा, भासासमयवीतिक्रंतं च णं भासिया भासा भासा; सा किं भासओ भासा ? अभासओ भासा ? अभासओ णं सा भासा, नो खलु सा भासओ भासा । पुव्विं किरिया दुक्खा; कज्जमाणी किरिया अदुक्खा; किरियासमवीतिक्रंतं च णं कडा किरियादुक्खा जा सा पुव्विं किरिया दुक्खा, कज्जमाणी किरिया अदुक्खा, किरियासमयवीतिक्रंतं च णं कडा किरिया दुक्खा, सा कि करणतो दुक्खा अकरणतो दुक्खा ? अकरणओ णं सा दुक्खा, णो खलु सा करणतो दुक्खा, सेवं वत्तव्वं सिया । अकिच्चं दुक्खं, अफुसं दुक्खं, अकज्जमाणकडं दुक्खं अकट्टु २. पाण-भूत-जीव-सत्ता वेदणं वेदेत्तीति वत्तव्वं सिया ।से कहमेयं भंते ! एवं गोयमा ! जं णं ते अन्नउत्थिया एवमाइक्खंति जाव वेदणं वेदेत्तीति वत्तव्वं सिया, जे ते एवमाहंसु मिच्छा ते एवमाहंसु । अहं पुण गोयमा ! एवमाइक्खामि— एवं खलु चलमाणे चलिते जाव निज्जरिज्जमाणे निज्जिणे । दो परमाणुपोग्गला एगयओ साहन्नंति । कम्हा दो परमाणुपोग्गल एगयओ साहन्नंति ? दोण्हं परमाणुपोग्गलाणं अत्थि सिणेहकाए, तम्हा दो परमाणुपोग्गला एगयओ साहन्नंति, ते भिज्जमाणा दुहा कज्जंति, दुहा कज्जमाणे एगयओ परमाणुपोग्गले एगयओ परमाणुपोग्गले भवति । तिण्णि परमाणुपोग्गला एगयओ साहन्नंति, कम्हा तिण्णि परमाणुपोग्गला एगयओ साहन्नंति ? तिण्हं परमाणुपोग्गलाणं अत्थि सिणेहकाए, तम्हा तिण्णि परमाणुपोग्गला एगयओ साहणंति; ते भिज्जमाणा दुहा वि तिहा वि कज्जंति, दुहा कज्जमाणा एगयओ परमाणुपोग्गले, एगयओ दुपदेसिए खंधे भवति, तिहा कज्जमाणा तिण्णि परमाणुपोग्गला भवंति १ एवं जाव चत्तारि पंच परमाणुपोग्गला एगयओ साहन्नंति, साहन्नित्ता खंधत्ताए कज्जंति, खंधे वि य णं से असासते सया समियं उवचिज्जइ य अवचिज्जइ य । पुव्विं भासा अभासा, भासिज्जमाणी भासा भासा, भासासमयवीतिक्रंतं च णं भासिता भासा अभासा; जा सा पुव्विं भासा अभासा, भासिज्जमाणी भासा भासा, भासासमयवीतिक्रंतं च णं भासिता भासा अभासा, सा किं भासतो भासा अभासओ भासा ? भासओ णं सा भासा, नो खलु सा अभासओ भासा । पुव्विं किरिया अदुक्खा जहा भासा तहा भाणितव्वा किरिया वि जाव करणतो णं सा दुक्खा, नो खलु सा अकरणओ दुक्खा, सेवं वत्तव्वं सिया । किच्चं दुक्खं, फुसं दुक्खं, कज्जमाणकडं दुक्खं कट्टु कट्टु पाण-भूत-जीव-सत्ता वेदणं वेदेत्तीति वत्तव्वं सिया । [सु. २. एणं जीवं पडुच्च अण्णउत्थियाणं एगसमयकिरियादुयपरूवणाए पडिसेहो ] २. अन्नउत्थिया णं भंते !

एवमाइक्खंति जाव— एवं खलु एगे जीवे एणेणं समएणं दो किरियाओ पकरेति, तं जहा— इरियावहियं च संपराइयं च । जं समयं इरियावहियं पकरेइ तं समयं संपराइयं पकरेइ०, परउत्थियवत्तव्वं नेयव्वं । ससमयवत्तव्वयाए नेयव्वं जाव इरियावहियं वा संपराइयं वा । [सु. ३. निरयगईए उववातस्स विरहकालो] ३. निरयगती णं भंते ! केवतियं कालं विरहिता उववातेणं पण्णत्ता ? गोयमा ! जहन्नेणं एक्कं समयं, उक्कोसेणं बारस मुहुत्ता। एवं वक्कंतीपदं भाणितव्वं निरक्खसेसं । सेवं भंते ! सेवं भंते ! त्ति जाव विहरति । **☆☆☆।दसमो ॥ पढमं सत्तं समत्तं ॥ क्कक्क बीअं सयं [सु. १. बीयसयदसुद्देसनामपरूवणं ] क्कक्क १. आणमति १ समुग्घाया २ पुढवी ३ इंदिय ४ णियंठ ५ भासाय ६ । देव ७ सभ ८ दीव ९ अत्थिय १० बीयम्मि सदे दसुद्देसा ॥१॥** **☆☆☆ पढमो उद्देसो 'आणमति'** **☆☆☆ [सु. २. पढमुद्देसस्सुवुग्घाओ सु. २. पढमुद्देसस्सुवुग्घाओ ] २. तेणं कालेणं तेणं समएणं रायगिहे नामं नगरे होत्था । वण्णओ । सामी समोसढे । परिसा निग्गता । धम्मो कहितो । पडिगता परिसा । तेणं कालेणं तेणं समएणं जेद्वे अंतेवासी जाव पज्जुवासमाणे एवं वदासी— [सु. ३. एगिंदिएसु ऊसासाइपरूवणं] ३. जे इमे भंते ! बेइंदिया तेइंदिया चउरिंदिया पंचिंदिया जीवा एएसि णं आणामं वा पाणामं वा उस्सासं वा नीसासं वा जाणामो पासामो । जे इमे पुढविक्काइया जाव वणस्सतिकाइया एगिंदिया जीवा एएसि णं आणामं वा पाणामं वा उस्सासं वा निस्सासं वा ण याणामो ण पासामो, एए वि य णं भंते ! जीवा आणमंति वा पाणमंति वा उस्ससंति वा नीससंति वा ? हंता, गोयमा ! एए वि य णं जीवा आणमंति वा पाणमंति वा ऊससंति वा नीससंति वा । [सु. ४-७. जीव -चउवीसदंडएसु ऊसासाइदव्वसरूवपरूवणाइ ] ४. (१) किं णं भंते ! एते जीवा आणमंति वा पाणमंति वा उस्ससंति वा नीससंति वा ? गोयमा ! दव्वतो णं अणंतपएसियाइं दव्वाइं, खेत्तओ णं असंखिज्जपएसोगाढाइं, कालओ अन्नयरद्वितीयाइं, भावओ वण्णमंताइं गंधमंताइ रसमंताइं फासमंताइ आणमंति वा पाणमंति वा ऊससंति वा नीससंति वा । (२) जाइं भावओ वण्णमंताइं आण० पाण० ऊस० नीस० ताइं किं एगवण्णाइं आणमंति पाणमंति ऊस० नीस० ? आहारगमो नेयव्वो जाव ति-चउ -पंचदिसिं । (५). किं णं भंते ! नेरइया आ० पा० उ० नी० ? तं चेव जाव नियमा आ० पा० उ० नी० । जीवा एगिंदिया वाघाय-निव्वाघाय भाणियव्वा । सेसा नियमा छदिसिं । (६). वाउयाए णं भंते ! वाउयाए चेव आणमंति वा पाणमंति वा ऊससंति वा नीससंति वा ? हंता, गोयमा ! वाउयाए णं वाउयाए जाव नीससंति वा । ७. (१) वाउयाए णं भंते ! वाउयाए चेव अणेगसयसहस्सखुत्तो उद्दाइत्ता उदाइत्ता तत्थेव भुज्जो भुज्जो पच्चायाति ? हंता, गोयमा ! जाव पच्चायाति । (२) से भंते ! किं पुट्टे उद्दाति ? अपुट्टे उद्दाति ? गोयमा ! पुट्टे उद्दाइ, नो अपुट्टे उद्दाइ । (३) से भंते ! किं ससरीरी निक्खमइ, असरीरी निक्खमइ ? गोयमा ! सिय ससरीरी निक्खमइ, सिय असरीरी निक्खमइ । से केणट्टेणं भंते ! एवं वुच्चइ सिय ससरीरी निक्खमइ, सिय असरीरी निक्खमइ ? गोयमा ! वाउयायस्स णं चत्तारि सरीरया पण्णत्ता, तं जहा— ओरालिए वेउव्विए तेयए कम्मए । ओरालिय-वेउव्वियाइं विप्पजहाय तेय-कम्मएहिं निक्खमति, से तेणट्टेणं गोयमा ! एवं वुच्चइ-सिय ससरीरी सिय असरीरी निक्खमइ । [सु. ८-९. उवसंत-खीणकसाईण निग्गंथाणं संसारभमण- सिद्धिगमणपरूवणं ] ८. (१) मडाई णं भंते ! नियंठे नो निरुद्धभवे, नो निरुद्धभवपवंचे, नो पहीणसंसारे, णो पहीणसंसारवेदणिज्जे, णो वोच्छिण्णसंसारे णो वोच्छिण्णसंसारवेदणिज्जे, नो निद्वियट्टे, नो निद्वियट्टकरणिज्जे पुणरवि इत्तत्थं हव्वमागच्छत्ति ? हंता, गोयमा ! मडाई णं नियंठे जाव पुणरवि इत्तत्थं हव्वमागच्छइ । (२) से णं भंते ! किं ति वत्तव्वं सिया ? गोयमा ! पाणे त्ति वत्तव्वं सिया, भूते त्ति वत्तव्वं सिया, जीवे त्ति वत्तव्वं सिया, सत्ते त्ति वत्तव्वं सिया, विण्णू वि वत्तव्वं सिया, वेदा ति वत्तव्वं सिया— पाणे भूए जीवे सत्ते विण्णू वेदा ति वत्तव्वं सिया । से केणट्टेणं भंते ! पाणे त्ति वत्तव्वं सिया जाव वेदा ति वत्तव्वं सिया ? गोयमा ! जम्हा आणमइ वा पाणमइ वा उस्ससइ वा नीससइ वा तम्हा पाणे त्ति वत्तव्वं सिया । जम्हा भूते भवति भविस्सति य तम्हा भूए त्ति वत्तव्वं सिया । जम्हा जीवे जीवइ जीवत्तं आउयं च कम्मं उवजीवइ तम्हा जीवे त्ति वत्तव्वं सिया । जम्हा सत्ते सुभासुभेहिं कम्मेहिं तम्हा सत्ते त्ति वत्तव्वं सिया । जम्हा-तित्त-वकडुय कसायंबिल-महुरे रसे जाणइ तम्हा विण्णू त्ति क्तव्यं सिया । जम्हा वेदेइ य सुह -दुक्खं**

तम्हा वेदा ति वत्तव्वं सिया । से तेणट्टेणं जाव पाणे त्ति वत्तव्वं सिया जाव वेदा ति वत्तव्वं सिया । ९. (१) मडाई णं भंते ! नियंठे निरुद्धभवे निरुद्धभवपवंचे जाव निट्टियट्टकरणिज्जे णो पुणरवि इत्तत्थं हव्वमागच्छति ? हंता, गोयमा ! मडाई णं नियंठे जाव नो पुणरवि इत्तत्थं हव्वमागच्छति । (२) से णं भंते ! किं ति वत्तव्वं सिया ? गोयमा सिद्धे त्ति वत्तव्वं सिया, बुद्धे त्ति वत्तव्वं सिया, मुते त्ति वत्तव्वं, पारगए त्ति व परंपरगए त्ति व, सिद्धे बुद्धे मुते परिनिव्वुडे अंतकडे सव्वदुक्खप्पहीणे त्ति वत्तव्वं सिया । सेवं भंते ! सेवं भंते ! त्ति भगवं गोयमे समणं भगवं महावीरं वंदइ नमंसइ, २ संजमेणं तवसा अप्पाणं भावेमाणे विहरति । [सु. १०. भगवओ महावीरस्स रायगिहाओ विहारो] १०. तए णं समणे भगवं महावीरे रायगिहाओ नगराओ गुणसिलाओ चेइयाओ पडिनिक्खमइ, पडिनिक्खमिक्खा बहिया जणवयविहारे विहरइ । [सु. ११-५४. खंदयपरिव्वायगवुत्तंतो सु. ११. भगवओ महावीरस्स कयंगलानयरीए समोसरणं ] ११. तेणं कालेणं तेणं समएणं कयंगला नामं नगरी होत्था । वण्णओ । तीसे णं कयंगलाए नगरीए बहिया उत्तरपुरत्थिमे दिसीभागे छत्तपलासए नामं चेइए होत्था । वण्णओ । तए णं समणे भगवं महावीरे उप्पण्णनाण-दंसणधरे जाव समोसरणं । परिसा निग्गच्छति । [सु. १२. सावत्थीवत्थव्वखंदयपरिव्वायगपरिचओ ] १२. तीसे णं कयंगलाए नगरीए अदूरसामंते सावत्थी नामं नयरी होत्था । वण्णओ । तत्थ णं सावत्थीए नयरीए गद्दभालस्स अंतेवासी खंदए नामं कच्चायणसगोत्ते परिव्वायगे परिवसइ, रिउव्वेद- जजुव्वेद- सामवेद - अथव्वणवेद इतिहासपंचमाणं निघंटछट्टाणं चउण्हं वेदाणं संगोवंगणं सरहस्साणं सारए वारए पारए सडंगवी सट्ठितंतविसारए संखाणे सिक्खा कप्पे वागरणे छंदे निरुत्ते जोतिसामयणे अन्नेसु य बहूसु बंभण्णएसु पारिव्वायएसु य नयेसु सुपरिनिट्टिए यावि होत्था । [सु. १३-१६. खंदयपरिव्वाययं पइ पिंगलयनियंठस्स सअंत-अणंतलोगाइविसए पुच्छा खंदयस्स तुसिणीयत्तं च] १३. तत्थ णं सावत्थीए नयरीए पिंगलए नामं नियंठे वेसालियसावए परिवसइ । तए णं से पिंगलए णामं णियंठे वेसालियसावए अण्णदा कयाइं जेणेव खंदए कच्चायणसगोत्ते तेणेव उवागच्छइ, २ खंदगं कच्चायणसगोत्तं इणमक्खेवं पुच्छे-मागहा ! किं सअंते लोके, अणंते लोके १, सअंते जीवे अणंते जीवे २, सअंता सिद्धी अणंता सिद्धी ३, सअंते सिद्धे अणंते सिद्धे ४, केण वा मरणेणं मरमाणे जीवे वड्ढति वा हायति वा ५ ? एतावं ताव आयक्खाहि वुच्चमाणे एवं । १४. तए णं से खंदए कच्चायणसगोत्ते पिंगलएणं णियंठेणं वेसाली-सावएणं इणमक्खेवं पुच्छिए समाणे संकिए कंखिए वितिगिंछिए भेदसमावन्ने कलुसमावन्ने णो संचाएइ पिंगलयस्स नियंठस्स वेसालियसावयस्स किंचि वि पमोक्खमक्खाइउं, तुसिणीए संचिट्टइ । १५. तए णं से पिंगलए नियंठे वेसालीसावए खंदयं कच्चायणसगोत्तं दोच्चं पि तच्चं पि इणमक्खेवं पुच्छे— मागहा ! किं सअंते लोए जाव केण वा मरणेणं मरमाणे जीवे वड्ढइ वा हायति वा ? एतावं ताव आइक्खाहि वुच्चमाणे एवं । १६. तए णं से खंदए कच्चायणसगोत्ते पिंगलएणं नियंठेणं वेसालीसावएणं दोच्चं पि तच्चं पि इणमक्खेवं पुच्छिए समाणे संकिए कंखिए वितिगिंछिए भेदसमावण्णे कलुसमावन्ने नो संचाएइ पिंगलयस्स नियंठस्स वेसालिसावयस्स किंचि वि पमोक्खमक्खाइउं, तुसिणीए संचिट्टइ । [ सु. १७-१९. कयंगलानयरीसमोसरियस्स भगवतो महावीरस्संतिए सावत्थीनयरीओ खंदयस्स आगमणं ] १७. तए णं सावत्थीए नयरीए सिंघाडग जाव महापहेसु महया जणसम्महे इ वा जणवूहे इ वा परिसा निग्गच्छइ । तए णं तस्स खंदयस्स कच्चायणसगोत्तस्स बहुजणस्स अंतिए एयमट्टं सोच्चा निसम्म इमेयारूवे अज्झत्थिए चिंतिए पत्थिए मणोगए संकप्पे समुप्पज्जित्था- 'एवं खलु समणे भगवं महावीरे, कयंगलाए नयरीए बहिया छत्तपलासए चेइए संजमेणं तवसा अप्पाणं भावेमाणे विहरइ । तं गच्छामि णं, समणं भगवं महावीरं वंदामि नमंसा मि सेयं खलु मे समणं भगवं महावीरं वंदित्ता णमंसिता सक्कारेत्ता सम्माणित्ता कल्लाणं मंगलं देवतं चेतियं पज्जुवासिता इमाइं च णं एयारूवाइं अट्टाइं हेऊइं पसिणाइं कारणाइं वागरणाइं पुच्छित्तए त्ति कट्टु एवं संपेहेइ, २ जेणेव परिव्वायावसहे तेणेव उवागच्छइ, २ ता तिदंडं च कुंडियं च कंचणियं च करोडियं च भिसियं च केसरियं च छन्नालयं च अंकुसयं च पवित्तयं च गणेत्तियं च छत्तयं च वाहणाओ य पाउयाओ य धाउरत्ताओ य गेण्हइ, गेण्हइत्ता परिव्वायावसहाओ पडिनिक्खमइ, पडिनिक्खमिक्खा तिदंडं-कुंडियं-कंचणियं-करोडियं-भिसियं-केसरियं-छन्नालयं-अंकुसयं-पवित्तयं-गणेत्तियं-हत्थगए छत्तोवाहणसंजुते धाउरत्तवत्थपरिहिए सावत्थीए नगरीए मज्झंमज्झेणं निग्गच्छइ, निग्गच्छित्ता जेणेव कयंगला नगरी जेणेव छत्तपलासए

चेइए जेणेव समणे भगवं महावीरे तेणेव पहारेत्थ गमणाए । १८. (१) 'गोयमा !' इ समणे भगवं महावीरे भगवं गोयमं एवं वयासी— दच्छिसि णं गोयमा ! पुव्वसंगतियं । (२) कं भंते ! ? खंदयं नामं । (३) से काहे वा ? किह वा केवच्चिरेण वा ? एवं खलु गोयमा ! तेणं कालेणं २ सावत्थी नामं नगरी होत्था । वण्णओ । तत्थ णं सावत्थीए नगरीए गद्दभालस्स अंतेवासी खंदए णामं कच्चायणसगोत्ते परिव्वायए परिवसइ, तं चेव जाव जेणेव ममं अंतिए तेणेव पहारेत्थ गमणाए । से य अदूराइते बहुसंपते अब्धाणपडिवन्ने अंतरापहे वट्टइ । अज्जेव णं दच्छिसि गोयमा ! । (४) 'भंते !' त्ति भगवं गोयमे समणं भगवं वंदइ नमंसइ, २ एवं वदासी-पहू णं भंते ! खंदए कच्चायणसगोत्ते देवाणुप्पियाणं अंतिए मुंडे भवित्ता णं अगाराओ अणगारियं पव्वइत्तए ? हंता, पभू । १९. जावं च णं समणे भगवं महावीरे भगवओ गोयमस्स एयमट्ठं परिकहेइ तावं च से खंदए कच्चायणसगोत्ते तं देसं हव्वमागते । [सु. २०-२२ खंदय -गोयमपणहुत्तरे भगवओ महावीरस्स परिचओ, खंदयकयं महावीरस्स वंदणाइ] २०. (१) तए णं भगवं गोयमे खंदयं कच्चायणसगोत्तं अदूरआगयं जाणित्ता खिप्पामेव अब्भुट्ठेति, खिप्पामेव पच्चुवगच्छइ, २ जेणेव खंदए कच्चायणसगोत्ते तेणेव उवागच्छइ, २ ता खंदयं कच्चायणसगोत्तं एवं वयासी— 'हे खंदया !, सागयं खंदया !, सुसागयं खंदया !, अणुरागयं खंदया !, सागयमणुरागयं खंदया ! । से नूणं तुमं खंदया ! सावत्थीए नयरीए पिंगलएणं नियंठेणं वेसालियसावएणं इणमक्खेवं पुच्छिए 'मागहा ! किं सअंते लोणे अणंते लोणे ? एवं तंचेव' जेणेव इहं तेणेव हव्वमागए । से नूणं खंदया ! अत्थे समत्थे ? हंता, अत्थि । (२) तए णं से खंदए कच्चायणसगोत्ते भगवं गोयमं एवं वयासी— से केस णं गोयमा ! तहारूवे नाणी वा तवस्सी वा जेणं तव एस अट्ठे मम ताव रहस्सकडे हव्वमक्खाए, जओ णं तुमं जाणसि ? । तए णं से भगवं गोयमे खंदयं कच्चायणसगोत्तं एवं वयासी— एवं खलु खंदया ! मम धम्मायरिए धम्मोवएसए समणे भगवं महावीरे उप्पन्नणाणं-दंसणधरे अरहा जिणे केवली तीय-पच्चुप्पन्नमणागयवियाणए सब्बणू सब्बदरिसी जेणं ममं एस अट्ठे तव ताव रहस्सकडे हव्वमक्खाए, जओ णं अहं जाणामि खंदया ! । (३) तए णं से खंदए कच्चायणसगोत्ते भगवं गोयमं एवं वयासी— गच्छामो णं गोयमा ! तव धम्मायरियं धम्मोवदेसयं समणं भगवं महावीरं वंदामो णमंसामो जाव पज्जुवासामो । अहासुहं देवाणुप्पिया ! मा पडिबंधं० । (४) तए णं से भगवं गोयमे खंदएणं कच्चायणसगोत्तेणं सद्धिं जेणेव समणे भगवं महावीरे तेणेव पहारेत्थ गमणयाए । २१. तेणं कालेणं २ समणे भगवं महावीरे वियडभोई याऽवि होत्था । तए णं समणस्स भगवओ महावीरस्स वियडभोगिस्स सरीरयं ओरालं सिंगारं कल्लाणं सिवं धण्णं मंगल्लं सस्सिरीयं अणलंकियविभुसियं लक्खण-वंजणगुणोववेयं सिरीए अतीव २ उवसोभेमाणं चिट्ठइ । २२. तए णं से खंदए कच्चायणसगोत्ते समणस्स भगवओ महावीरस्स वियडभोगिस्स सरीरयं ओरालं जाव अतीव २ उवसोभेमाणं पासइ, २ ता हट्टतुट्ठचित्तमाणंदिए नंदिए पीइमणे परमसोमणस्सिए हरिसवसविसप्पमाणहियए जेणेव समणे भगवं महावीरे तेणेव उवागच्छइ, २ ता समणं भगवं महावीरं तिक्खुत्तो आयाहिणप्पयाहिणं करेइ जाव पज्जुवासइ । [सु. २३-२४. लोग -जीव-सिद्धि-सिद्धे पडुच्च सअंतं -अणंतविसयाए खंदयपुच्छाए समाहाणं ] २३. 'खंदया !' ति समणे भगवं महावीरे खंदयं कच्चाय० एवं वयासी— से नूणं तुमं खंदया ! सावत्थीए नयरीए पिंगलएणं नियंठेणं वेसालियसावएणं इणमक्खेवं पुच्छिए 'मागहा ! किं सअंते लोए अणंते लोए ?' एवं तं चेव जाव जेणेव ममं अंतिए तेणेव हव्वमागए । से नूणं खंदया ! अयमट्ठे समट्ठे ? हंता, अत्थि । २४. (१) जे वि य ते खंदया ! अयमेयारूवे अज्झत्थिए चिंतिए पत्थिए मणोगए संकप्पे समुप्पज्जित्था— किं सअंते लोए, अणंते लोए ? तस्स वि य णं अयमट्ठे — एवं खलु मए खंदया ! चउव्विहे लोए पण्णत्ते, तं जहा— दव्वओ खेत्तओ कालओ भावओ । दव्वओ णं एगे लोए सअंते । खेत्तओ णं लोए असंखेज्जाओ जोयणकोडाकोडीओ आयाम-विक्खंभेणं, असंखेज्जाओ जोयणकोडाकोडीओ परिक्खेवेणं प०, अत्थि पुण से अंते । कालओ णं लोए ण कयावि न आसी न कयावि न भवति न कयावि न भविस्सति, भुविं च भवति य भविस्सइ य, धुवे णियए सासते अक्खए अव्वए अवट्ठिए णिच्चे, णत्थि पुण से अंते । भावओ णं लोए अणंता वण्णपज्जवा गंध० रस० फासपज्जवा, अणंता संठाणपज्जवा, अणंता गरुयलहुयपज्जवा, अणंता अगरुयलहुयपज्जवा, नत्थि पुण से अंते । से तं खंदगा ! दव्वओ लोए सअंते, खेत्तओ लोए सअंते, कालतो लोए अणंते, भावओ लोए अणंते । (२) जे वि य ते खंदया ! जाव सअंते जीवे, अणंते जीवे ? तस्स वि य णं अयमट्ठे— एवं खलु जाव दव्वओ

णं एगे जीवे सअंते । खेत्तओ णं जीवे असंखेज्जपएसिए असंखेज्जपदेसोगाढे, अत्थि पुण से अंते । कालओ णं जीवे न कयावि न आसि जाव निच्चे, नत्थि पुणार से अंते ! भावओ णं जीवे अणंता णाणपज्जवा अणंता दंसणपज्जवा अणंता चरित्तपज्जवा अणंता गरुयलहुयपज्जवा अणंता अगरुयलहुयपज्जवा, नत्थि पुण से अंते । से तं दव्वओ जीवे सअंते, खेत्तओ जीवे सअंते, कालओ जीवे अणंते, भावओ जीवे अणंते । (३) जे वि य ते खंदया ! पुच्छा । दव्वओ णं एगा सिद्धी सअंता; खेत्तओ णं सिद्धी पणयालीसं जोयणसयसहस्साइं आयाम-विक्खंभेणं, एगा जोयणकोडी बायालीसं च जोयणसयसहस्साइं तीसं च जोयणसहस्साइं दोन्नि य अउणापच्चे जोयणसए किंचि विसेसाहिए परिक्खेवेणं प०, अत्थि पुण से अंते; कालओ णं सिद्धी न कयावि न आसि०; भावओ य जहा लोयस्स तहा भाणियव्वा । तत्थ दव्वओ सिद्धी सअंता, खेत्तओ सिद्धी सअंता, कालओ सिद्धी अणंता, भावओ सिद्धी अणंता । (४) जे वि य ते खंदया ! जाव किं अणंते सिद्धे ? तं चेव जाव दव्वओ णं एगे सिद्धे सअंते; खेत्तओ णं सिद्धे असंखेज्जपएसिए असंखेज्जपदेसोगाढे, अत्थि पुण से अंते; कालओ णं सिद्धे सादीए अपज्जवसिए, नत्थि पुण से अंते; भावओ सिद्धे अणंता णाणपज्जवा, अणंता दंसणपज्जवा जाव अणंता अगरुयलहुयपज्जवा, नत्थि पुण से अंते । से तं दव्वओ सिद्धे सअंते, खेत्तओ सिद्धे सअंते, कालओ सिद्धे अणंते, भावओ सिद्धे अणंते । [सु. २५-३१. मरणं पडुच्च संसारवह्नि -हाणिविसयाए खंदयपुच्छाए बाल- पंडियमरणपरूवणापुव्वयं समाहाणं ] २५. जे वि य ते खंदया ! इमेयारूवे अज्झत्थिए चिंतिए जाव समुप्पज्जित्था केण वा मरणेणं मरमाणे जीवे वड्ढति वा हायति वा ? तस्स वि य णं अयमट्ठे -एवं खलु खंदया ! मए दुविहे मरणे पण्णत्ते । तं जहा— बालमरणे पंडियमरणे य । २६. से किं तं बालमरणे ? बालमरणे दुवालसविहे प०, तं -वलयमरणे १ वसट्ठमरणे २ अंतोसल्लमरणे ३ तब्भमरणे ४ गिरिपडणे ५ तरुपडणे ६ जलप्पवेसे ७ जलणप्पवेसे ८ विसभक्खणे ९ सत्थोवाडणे १० वेहाणसे ११ गब्बपट्ठे १२ । इच्चेतेणं खंदया ! दुवालसविहेणं बालमरणेणं मरमाणे जीवे अणंतेहिं नेरइयभवग्गहणेहिं अप्पाणं संजोएइ, तिरिय० मणुय० देव०, अणाइयं च णं अणवदग्गं दीहमब्धं चाउरंतं संसारकंतारं अणुपरियट्ठइ, से तं मरमाणे वड्ढइ वड्ढइ । से तं बालमरणे । २७. से किं तं पंडियमरणे ? पंडियमरणे दुविहे प०, तं०— पाओवगमणे य भत्तपच्चक्खाणे य । २८. से किं तं पाओवगमणे ? पाओवगमणे दुविहे प०, तं०— नीहारिमे य अनीहारिमे य, नियमा अप्पडिकम्मे । से तं पाओवगमणे । २९. से किं तं भत्तपच्चक्खाणे ? भत्तपच्चक्खाणे दुविहे प०, तं०— नीहारिमे य अनीहारिमे य, नियमा सपडिकम्मे । से तं भत्तपच्चक्खाणे । ३०. इच्चेतेणं खंदया ! दुविहेणं पंडियमरणेणं मरमाणे जीवे अणंतेहिं नेरइयभवग्गहणेहिं अप्पाणं विसंजोएइ जाव वीईवयति । से तं मरमाणे हायइ हायइ । से तं पंडियमरणे । ३१. इच्चेणं खंदया ! दुविहेणं मरणेणं मरमाणे जीवे वड्ढइ वा हायति वा । [ सु. ३२-३८. खंदयस्स पडिबोहो पव्वज्जागहणं विहरणं च, भगवओ वि विहरणं ] ३२. (१) एत्थ णं से खंदए कच्चायणसगोत्ते संबुद्धे समणं भगवं महावीरं वंदइ नमंसइ, २ एवं वदासी— इच्छामि णं भंते ! तुब्भं अंतिए केवलिपन्नत्तं धम्मं निसामेत्तए । (२) अहासुहं देवाणुप्पिया ! मा पडिबंधं । ३३. तए णं समणे भगवं महावीरे खंदयस्स कच्चायणसगोत्तस्स तीसे य महतिमहालियाए परिसाए धम्मं परिकहेइ । धम्मकहा भाणियव्वा । ३४. तए णं से खंदए कच्चायणसगोत्ते समणस्स भगवओ महावीरस्स अंतिए धम्मं सोच्चा निसम्म हट्ठुट्ठे जाव हियए उट्ठाए उट्ठेइ, २ समणं भगवं महावीरं तिक्खुत्तो आयाहिणं पयाहिणं करेइ, २ एवं वदासी-सद्धहामि णं भंते ! निग्गंथं पावयणं, पत्तियामि णं भंते ! निग्गंथं पावयणं, रोएमि णं भंते ! निग्गंथं पावयणं, अब्भुट्ठेमि णं भंते ! निग्गंथं पावयणं, एवमेयं भंते !, तहमेयं भंते !, अवितहमेयं भंते !, असंदिद्धमेयं भंते !, इच्छियमेयं भंते !, पडिच्छियमेयं भंते !, इच्छियपडिच्छियमेयं भंते !, से जहेयं तुब्भे वदह त्ति कट्ठु समणं भगवं महावीरं वंदति नमंसति, २ उत्तरपुरत्थिमं दिसीभायं अवक्कमइ, २ तिदंडं च कुंडियं च जाव धातुरत्ताओ य एगंते एडेइ, २ जेणेव समणे भगवं महावीरे तेणेव उवागच्छइ, २ समणं भगवं महावीरं तिक्खुत्तो आयाहिणं पयाहिणं करेइ, करेत्ता जाव नमंसित्ता एवं वदासी-आलित्ते णं भंते ! लोए, पलित्ते णं भंते ! लोए, आलित्तपलित्ते णं भंते ! लोए जराए मरणेण य । से जहानामए केइ गाहावती अगारंसि झियायमाणंसि जे से तत्थ भंडे भवइ अप्पसारे मोल्लगरुए तं गहाय आयाए एगंतमंतं अवक्कमइ, एस मे नित्थारिए समाणे पच्छा पुरा य हियाए सुहाए खमाए निस्सेसाए आणुगामियत्ताए भविस्सइ । एवामेव देवाणुप्पिया ! मज्झ वि आया एगे

भंडे इट्टे कंते पिए मणुत्ते मणमे थेज्जे वेसासिए सम्मए बहुमए अणुमए भंडकरंडगसमाणे, मा णं सीतं, मा णं उण्हं, मा णं खुहा, मा णं पिवासा, मा णं चोरा, मा णं वाला, मा णं दंसा, मा णं मसगा, मा णं वाइय -पित्तिय -सिंभिय-सन्निवाइय विविहा रोगायंका परीसहोवसग्गा फुसंतु त्ति कट्टु, एस मे नित्थारिए समाणे परलोयस्स हियाए सुहाए खमाए नीसेसाए आणुगामियत्ताए भविस्सइ । तं इच्छामि णं देवाणुप्पिया ! सयमेव पव्वावियं, सयमेव मुंडावियं, सयमेव सेहादियं सयमेव सिक्खावियं, सयमेव आयार-गोयरं विणयवेयाणिय-चरण-करण-जाया-मायावत्तियं धम्ममाइक्खिअं । ३५. तए णं समणे भगवं महावीरे खंदयं कच्चायणसगोत्तं सयमेव पव्वावेइ जाव धम्ममाइक्खइ—एवं देवाणुप्पिया ! गंतव्वं, एवं चिट्ठियव्वं, एवं निसीतियव्वं, एवं तुयट्ठियव्वं, एवं भुंजियव्वं, एवं भासियव्वं, एवं उट्ठाय उट्ठाय पाणेहिं भुएहिं जीवेहिं सत्तेहिं संजमेण संजमियव्वं, अस्सिं च णं अट्टे णो किंचि वि पमाइयव्वं । ३६. तए णं से खंदए कच्चायणसगोत्ते समणस्स भगवओ महावीरस्स इमं एयारूवं धम्मियं उवएसं सम्मं संपडिवज्जति, तमाणाए तह गच्छइ, तह चिट्ठइ, तह निसीयति, तह तुयट्ठइ, तह भुंजइ, तह भासइ, तह उट्ठाय २ पाणेहिं भूएहिं जीवेहिं सत्तेहिं संजमेणं संजमइ, अस्सिं च णं अट्टे णो पमायइ । ३७. तए णं से खंदए कच्चायणसगोत्ते अणगारे जाते इरियासमिए भासासमिए एसणासमिए आयाणभंडमत्तनिकखेवणासमिए उच्चार-पासवण-खेल-सिंघाण-जल्ल-पारिट्ठवाणियासमिएमणसमिए वयसमिए कायसमिए मणगुत्ते वइगुत्ते कायगुत्ते गुत्ते गुत्तिंदिए गुत्तबंधचारी चाइ लज्जू धण्णे खंतिखमे जित्तिंदिए सोहिए अणियाणे अप्पुस्सुए अबहिल्लेस्से सुसामण्णरए दंते इणमेव णिग्गंथं पावयणं पुरओ काउं विहरइ । ३८. तए णं समणे भगवं महावीरे कयंगलाओ नयरीओ छत्तपलासाओ चेइयाओ पडिनिकखमइ, २ बहिया जणवयविहारं विहरति । [सु. ३९-४६. खंदयस्स एक्कारसंगउज्झयणं भिक्खुपडिमाऽऽराहणा गुणरयणतवोकम्मणुट्ठाणं च] ३९. तए णं से खंदए अणगारे समणस्स भगवओ महावीरस्स तहारूवाणं थेराणं अंतिए सामाइयमाइयाइं एक्कारस अंगाइं अहिज्जइ, २ जेणेव समणे भगवं महावीरे तेणेव उवागच्छइ, २ समणं भगवं महावीरं वंदइ नमंसइ, २ एवं वयासी— इच्छामि णं भंते ! तुब्भेहिं अब्भणुणाए समाणे मासियं भिक्खुपडिमं उवसंपज्जित्ताणं विहरित्तए । अहासुहं देवाणुप्पिया ! मा पडिबंधं करेह । ४०. तए णं से खंदए अणगारे समणेणं भगवया महावीरेणं अब्भणुणाए समाणे हट्ट जाव नमंसित्ता मासियं भिक्खुपडिमं उवसंपज्जित्ताणं विहरइ । ४१. (१) तए णं से खंदए अणगारे मासियं भिक्खुपडिमं अहासुत्तं अहाकप्पं अहामग्गं अहातच्चं अहासम्मं काएण फासेति पालेति सोहेति तीरेति पूरेति किट्ठेति अणुपालेइ आणाए आराहेइ, काएण फासित्ता जाव आराहेत्ता जेणेव समणे भगवं महावीरे तेणेव उवागच्छइ, २ समणं भगवं जाव नमंसित्ता एवं वयासी— इच्छामि णं भंते ! तुब्भेहिं अब्भणुणाए समाणे दोमासियं भिक्खुपडिमं उवसंपज्जित्ताणं विहरित्तए । अहासुहं देवाणुप्पिया ! मा पडिबंधं । (२) तं चेव । ४२. एवं तेमासियं चाउम्मासियं पंच- छ-सत्तमा० । पढमं सत्तराइंदियं, दोच्चं सत्तराइंदियं, तच्चं सतरातिंदियं, रातिंदियं, एगराइयं । ४३. तए णं से खंदए अणगारे एगराइयं भिक्खुपडिमं अहासुत्तं जाव आराहेत्ता जेणेव समणे भगवं महावीरे तेणेव उवागच्छति, २ समणं भगवं महावीरं जाव नमंसित्ता एवं वदासी- इच्छामि णं भंते ! तुब्भेहिं अब्भणुणाए समाणे गुणरयणसंवच्छरं तवोकम्मं उवसंपज्जित्ताणं विहरित्तए । अहासुहं देवाणुप्पिया ! मा पडिबंधं । ४४. तए णं से खंदए अणगारे समणेणं भगवया महावीरेणं अब्भणुणाए समाणे जाव नमंसित्ता गुणरयणसंवच्छरं तवोकम्मं उवसंपज्जित्ताणं विहरति । तं जहा— पढमं मासं चउत्थं चउत्थेणं अणिक्खित्तेणं तवोकम्मेणं दिया ठाणुकुडुए सूराम्भिमुहे आयावणभूमीए आयावेमाणे, रत्तिं वीरासणेणं अवाउडेण य । दोच्चं मासं छट्ठं छट्ठेणं अनिक्खित्तेणं दिया ठाणुकुडुए सूराम्भिमुहे आयावणभूमीए आयावेमाणे, रत्तिं वीरासणेणं अवाउडेण य । एवं तच्चं मासं अट्ठमं अट्ठमेणं, चउत्थं मासं दसमं दसमेणं, पंचमं मासं बारसमबारसमेणं, छट्ठं मासं चोदसमं चोदसमेणं, सत्तमं मासं सोलसमं २, अट्ठमं मासं अट्ठारसमं २, नवमं मासं वीसतिमं २, दसमं मासं बावीसतिमं २, एक्कारसमं मासं चउव्वीसतियं (२) बारसमं मासं छव्वीससतिमं २. तेरसमं मासं अट्ठावीसतिमं २, चोदसमं मासं तीसतिमं २, पन्नरसमं मासं बत्तीसतिमं २, सोलसमं मासं चोत्तीसतिमं २ अनिक्खिवेणं तवोकम्मेणं दिया ठाणुकुडुए सूराम्भिमुहे आयावणभूमीए, आयावेमाणे, रत्तिं वीरासणेणं अवाउडेणं । ४५. तए णं से खंदए अणगारे गुणरयणसंवच्छरं तवोकम्मं अहासुत्तं अहाकप्पं जाव

आराहेत्ता जेणेव समणे भगवं महावीरे तेणेव उवागच्छइ, २ समणं भगवं महावीरं वंदइ नमंसइ, २ बहूहिं चउत्थ - छट्टुडट्टम- दसम - दुवालसेहिं मासडद्धमासखमणेहिं विचित्तेहिं तवोकम्मेहिं अप्पाणं भावेमाणे विहरति । ४६. तए णं से खंदए अणगारे तेणं ओरालेणं विपुलेणं पयत्तेणं पग्गहिणं कल्लाणेणं सिवेणं धण्णेणं मंगल्लेणं सस्सिरीएणं उदग्गेणं उदत्तेणं उत्तमेणं उदारेणं महाणुभागेणं तवोकम्मेणं सुक्के लुक्खे निम्मंसे अट्टिचम्मावणद्धे किडिकिडियाभूए किसे धमणिसंतए जाते यावि होत्था, जीवंचीवेण गच्छइ जीवंचीवेण चिट्ठइ, भासं भासित्ता वि गिलाइ, भासं भासमाणे गिलाति, भासं भासिस्सामीति गिलाति; से जहा नाम ए कट्टुसगडिया इ वा पत्तसगडिया इ वा पत्तितलभंडगसगडिया इ वा एरंडकट्टुसगडिया इ वा इंगालसगडिया इ वा उण्हे दिण्णा सुक्का समाणी ससद्धं गच्छइ, ससद्धं चिट्ठइ, एवामेव खंदए वि अणगारे ससद्धं गच्छइ, ससद्धं चिट्ठइ, उवचिते तवेणं, अवचिए मंस - सोणितेणं, हुयासणे विव भासरासिपडिच्छन्ने तवेणं तेएणं तवतेयसिरीए अतीव २ उवसोभेमाणे २ चिट्ठइ । [सु. ४७-५१. खंदयस्स संलेहणाभावणा संलेहणा कालगमणं च] ४७. तेणं कालेणं २ रायगिहे नगरे जाव समोसरणं जाव परिसा पडिगया । ४८. तए णं तस्स खंदयस्स अणगारस्स अण्णया कयाइ पुव्वरत्तावरत्तकालसमयंसि धम्मजागरियं जागरमाणस्स इमेयारूवे अज्झत्थिए चित्तिए जाव (सु. १७) समुप्पज्जित्था— “एवं खलु अहं इमेणं एयारूवेणं ओरालेणं जाव (सु. ४६) किसे धमणिसंतए जाते जीवंचीवेणं गच्छामि, जीवंचीवेणं चिट्ठामि, जाव गिलामि, जाव (सु.४६) एवामेव अहं पि ससद्धं गच्छामि, ससद्धं चिट्ठामि, तं अत्थि ता मे उट्ठाणे कम्मे बले वीरिए पुरिसक्कारपरक्कमे तं जावता मे अत्थि उट्ठाणे कम्मे बले वीरिए पुरिसक्कारपरक्कमे जाव य मे धम्मायरिए धम्मोवदेसए समणे भगवं महावीरे जिणे सुहत्थी विहरइ तावता मे सेयं कल्लं पाउप्पभायाए रयणीए फुल्लुप्पल-कम्मलकोमलुम्मिल्लियम्मि अहंपंडरे पभाए रत्तासोयप्पकासकिंसुयसुयमुह- गुंजडद्धरागसरिसे कमलागरसंडबोहए उट्ठियम्मि सूरे सहस्सरस्सिम्मि दिणयरे तेयसा जलंते समणं भगवं महावीरं वंदित्ता नमंसित्ता जाव पज्जुवासित्ता, समणेणं भगवया महावीरेणं अब्भणुण्णाए समाणे सयमेव पंच महव्वयाणि आरोवेत्ता, समणा य समणीओ य खामेत्ता, तहारूवेहिं थेरेहिं कडाऽऽईहिं सद्धिं विपुलं पव्वयं सणियं सणियं दुरूहित्ता, मेघघणसन्निगासं देवसन्निवातं पुढवीसिलावट्टयं पडिलेहित्ता, दब्भसंधारयं, दब्भसंधारोवगयस्स संलेहणाञ्जूसणाञ्जूसियस्स भत्त-पाणपडियाइक्खियस्स पाओवगयस्स कालं अणवकंखमाणस्स विहरित्तए त्ति कट्टु एवं संपेहेइ, २ ता कल्लं पाउप्पभायाए रयणीए जाव जलंते जेणेव समणे भगवं महावीरे जाव पज्जुवासति । ४९. ‘खंदया ! इ समणे भगवं महावीरे खंदयं अणगारं एवं वयासी— से नूणं तव खंदया ! पुव्वरत्तावरत्तं जाव (सु.४८) जागरमाणस्स इमेयारूवे अज्झत्थिए जाव (सु.१७) समुप्पज्जित्था— ‘एवं खलु अहं इमेणं एयारूवेणं ओरालेणं विपुलेणं तं चेव जाव (सु. ४८) कालं अणवकंखमाणस्स विहरित्तए त्ति कट्टु’ एवं संपेहेसि, २ कल्लं पाउप्पभायाए जाव जलंते जेणेव मम अंतिए तेणेव हव्वमागए । से नूणं खंदया ! अट्टे समट्टे ? हंता, अत्थि । अहासुहं देवाणुप्पिया ! मा पडिबंधं करेह । ५०. तए णं से खंदए अणगारे समणेणं भगवया महावीरेणं अब्भणुण्णाए समाणे हट्टुत्तुट्टं जाव ह्यहियए उट्ठाए उट्टेइ, २ समणं भगवं महावीरं तिक्खुत्तो आयाहिणं पयाहिणं करेइ जाव नमंसित्ता सयमेव पंच महव्वयाइं आरुहेइ, २ ता समणे य समणीओ य खामेइ, २ ता तहारूवेहिं थेरेहिं कडाऽऽईहिं सद्धिं विपुलं पव्वयं सणियं २ दुरूहेइ, २ मेघघणसन्निगासं देवसन्निवायं पुढविसिलावट्टयं पडिलेहेइ, २ उच्चारपासवणभूमिं पडिलेहेइ, २ दब्भसंधारयं संधरेइ, २ दब्भसंधारयं दुरूहेइ, २ दब्भसंधारोवगते पुरत्थाभिमुहे संपलियं कनिसण्णे करयलपरिग्गहियं दसनहं सिरसावत्तं मत्थए अंजलिं कट्टु एवं वदासि— नमोऽत्थु णं अरहंताणं भगवंताणं जाव संपत्ताणं, नमोऽत्थु णं समणस्स भगवओ महावीरस्स जाव संपाविउकामस्स, वंदामि णं भगवंतं तत्थगयं इहगते, पासउ मे भयवं तत्थगए इहगयं ति कट्टु वंदइ नमंसति, २ एवं वदासी— “पुव्विं पि मए समणस्स भगवओ महावीरस्स अंतिए सव्वे पाणातिवाए पच्चक्खाए जावज्जीवाए जाव मिच्छादंसणसल्ले पच्चक्खाए जावज्जीवाए, इयाणिं पि य णं समणस्स भगवओ महावीरस्स अंतिए सव्वं पाणाइवायं पच्चक्खामि जावज्जीवाए जाव मिच्छादंसणसल्लं पच्चक्खामि । एवं सव्वं असणं पाणं खाइमं साइमं चउव्विहं पि आहारं पच्चक्खामि जावज्जीवाए । जं पि य इमं सरीरं इट्ठं कंतं पियं जाव फुसंतु त्ति कट्टु एयं पि णं चरिमेहिं उस्सास-नीसासेहिं वोसिरामि” त्ति कट्टु संलेहणाञ्जूसणाञ्जूसिए भत्त-

पाणपडियाइक्खिए पाओवगए कालं अणवकंखमाणे विहरति । ५१. तए णं से खंदए अणगारे समणस्स भगवओ महावीरस्स तहारूवाणं थेराणं अंतिए सामाइयमादियाइं एक्कारस अंगाइं अहिज्जित्ता बहुपडिपुण्णाइं दुवालसवासाइं सामण्णपरियागं पाउणित्ता मासियाए संलेहणाए अत्ताणं झूसित्ता सट्ठिं भत्ताइं अणसणाए छेदेत्ता आलोइयपडिक्कंते समाहिपते आणुपुव्वीए कालगए । [सु. ५२. भगवओ पुरओ थेरकयं खंदयपत्त-चीवरसमाणयणं ] ५२. तए णं ते थेरा भगवंतो खंदयं अणगारं कालगयं जाणित्ता परिनिव्वाणवत्तियं काउस्सग्गं करेति, २ पत्त-चीवराणि गिण्हंति, २ विपुलाओ पव्वयाओ सणियं २ पच्चोरुहंति, २ जेणेव समणे भगवं महावीरे तेणेव उवागच्छंति, २ समणं भगवं महावीरं वंदंति नमंसंति, २ एवं वदासी— एवं खलु देवाणुप्पियाणं अंतेवासी खंदए नामं अणगारे पगइभद्दए पगतिविणीए पगतिउवसंते पगतिपयणुकोह- माण -माया -लोभे मिउ -मद्दवसंपन्ने अल्लीणे भद्दए विणीए । से णं देवाणुप्पिए हिं अब्भणुण्णाए समाणे सयमेव पंच महव्वयाणि आरोवित्ता समणे य समणीओ य खामेत्ता, अम्हेहिं सद्धिं विपुलं पव्वयं तं चेव निरवसेसं जाव (सु. ५०) अहाणुपुव्वीए कालगए । इमे य से आयारभंडए । [सु. ५३-५४. खदयभवंतरविसयगोयमपुच्छासमाहाणे भगवओ अच्चुयकप्पोववाय -तयणंतरसिज्झणापरूवणा] ५३. ‘भंते !’ ति भगवं गोयमे समणं भगवं महावीरं वंदंति नमंसति, २ एवं वयासी— एवं खलु देवाणुप्पियाणं अंतेवासी खंदए नामं अणगारे कालमासे कालं किच्चा कहिं गए, कहिं उववण्णे ? ‘गोयमा !’ इ समणे भगवं महावीरे भगवं गोयमं एवं वयासी- एवं खलु गोयमा ! ममं अंतेवासी खंदए नामं अणगारे पगतिभद्दए जाव से णं मए अब्भणुण्णाए समाणे सयमेव पंच महव्वयाइं आरोवित्ता तं चेव सव्वं अविसेसियं नेयव्वं जाव (सु. ५०-५१) आलोइयपडिक्कंते समाहिपत्ते कालमासे कालं किच्चा अच्चुए कप्पे देवत्ताए उववण्णे । तत्थ णं एगइयाणं देवाणं बावीसं सागरोवमाइं ठिती प० । तत्थ णं खंदयस्स वि देवस्स बावीसं सागरोवमाइं ठिती पण्णत्ता । ५४. से णं भंते ! खंदए देवे ताओ देवलोगाओ आउक्खएणं भवक्खएणं ठितीखएणं अणंतरं चयं चइत्ता कहिं गच्छिहिति ? कहिं उववज्जिहिति ? गोयमा ! महाविदेहे वासे सिज्झिहिति बुज्झिहिति मुच्चिहिति परिनिव्वाहिति सव्वदुक्खाणमंतं करेहिति । ॥ खंदओ समत्तो ☆ ☆ ☆। **बितीयसयस्स पढमो ॥२.१ ॥ ☆ ☆ ☆ बीओ उद्देसो ‘समुग्घाया’** [सु. १. सत्तसमुग्घायनामाइजाणणत्थं पण्णवणासुत्तसमुग्घायपदावलोयणनिद्देसो ] १. कति णं भंते ! समुग्घाता पण्णत्ता ? गोयमा ! सत्त समुग्घाया पण्णत्ता, तं जहा— छाउमत्थियसमुग्घायवज्जं समुग्घायपदं णेयव्वं । ☆ ☆ ☆ ॥ **बितीयसए बितीयोद्देसो ॥२.२ ॥ ☆ ☆ ☆ तइओ उद्देसो ‘पुढवी’ ☆ ☆ ☆** [सु. १. सत्तनिरयनामाइजाणणत्थं जीवाभिगसुत्तावलोयणनिद्देसो ] १. कति णं भंते ! पुढवीओ पण्णत्ताओ ? जीवाभिगमे नेरइयाणं जो बितिओ उद्देसो सो नेयव्वो । पुढविं ओगाहित्ता निरया संठाणमेव बाहल्ल । जाव किं सव्वे पाणा उववन्नपुव्वा ? हंता, गोयमा ! असइं अदुवा अणंतरखुत्तो । ☆ ☆ ☆ ॥ **पुढवी उद्देसो ॥२.३ ॥ ☆ ☆ ☆ चउत्थो उद्देसो ‘इंदिय’ ☆ ☆ ☆** [सु. १. इंदियवत्तव्वयाए पन्नवणासुत्तावलोयणनिद्देसो ] १. कति णं भंते ! इंदिया पण्णत्ता ? गोयमा ! पंच इंदिया पण्णत्ता, तं जहा— पढमिल्लो इंदियउद्देसओ नेयव्वो, ‘संठाणं बाहल्लं पोहत्तं जाव अलोगो’ । ☆ ☆ ☆ **इंदियउद्देसो ॥२.४ ॥ ☆ ☆ ☆ पंचमो उद्देसो ‘नियंठ ☆ ☆ ☆** सु. १. नियंठदेवपरियारणाए अन्नउत्थियमतपरिहारपुव्वयं भगवओ परूवणं १. अण्णउत्थिया णं भंते ! एवमाइक्खंति भासंति पण्णवेति परूवेति एवं खलु नियंठे कालगते समाणे देवभूएणं अप्पाणेणं से णं तत्थ अन्ने देवे, नो अन्नेसिं देवाणं देवीओ अहिजुंजिय २ परियारेइ १, णो अप्पणच्चियाओ देवीओ अभिजुंजिय २ परियारेइ २, अप्पणा मेव अप्पाणं विउव्विय २ परियारेइ ३; एगे वि य णं जीवे एगेणं समएणं दो वेदे वेदेइ, तं जहा— इत्थिवेदं च पुरिसवेदं च । एवं परउत्थियवत्तव्वया नेयव्वा जाव इत्थिवेदं च पुरिसवेदं च । से कहमेयं भंते ! एवं ? गोयमा ! जं णं ते अन्नउत्थिया एवमाइक्खंति जाव इत्थिवेदं च पुरिसवेदं च । जे ते एवमाहंसु मिच्छं ते एवमाहंसु, अहं पुण गोयमा ! एवमाइक्खामि भा० प० परू०— एवं खलु निअंठे कालगए समाणे अन्नयरेसु देवकोएसु देवत्ताए उववत्तारो भवंति महिद्धिएसु जाव महाणुभागेसु दूरगतीसु चिरट्ठितीएसु । से णं तत्थ देवे भवति महिद्धीए जाव दस दिसाओ उज्जोवेमाणे पभासेमाणे जाव पडिरूवे । से णं

तत्थ अत्ते देवे, अत्तेसिं देवाणं देवीओ अभिजुंजिय २ परियारेइ १, अप्पणच्चियाओ देवीओ अभिजुंजिय २ परियारेइ २, नो अप्पणामेव अप्पाणं विउव्विय २ परियारेइ ३; एगे वि य णं जीवे एगेणं समएणं एणं वेदं वेदेइ, तं जहा— इत्थिवेदं वा पुरिसवेदं वा, जं समयं इत्थिवेदं वेदेइ णो तं समयं पुरिसवेयं वेएइ, जं समयं पुरिसवेयं वेएइ णो तं समयं इत्थिवेयं वेदेइ । (१) इत्थिवेयस्स उदएणं नो पुरिसवेदं वेएइ पुरिसवेयस्स उदएणं नो इत्थिवेयं वेएइ । एवं खलु एगे जीवे एगेणं समएणं एणं वेदं वेदेइ, तं जहा— इत्थिवेयं वा पुरिसवेयं वा । इत्थी इत्थिवेएणं उदिण्णेणं पुरिसं पत्थेइ, पुरिसो पुरिसवेएणं उदिण्णेणं इत्थिं पत्थेइ । दो वि ते अत्तमत्तं पत्थेति, तं जहा— इत्थी वा पुरिसं, पुरिसे वा इत्थिं । [सु. २-६. उदगगब्भ-तिरिक्खजोणियगब्भ- मणुस्सीगब्भ- कायभवत्थ- जोणिब्भूयबीयाणं कालट्ठितीपरूवणं] २. उदगगब्भे णं भंते ! ‘उदगगब्भ’ ति कालतो केवच्चिरं होइ ? गोयमा ! जहत्तेणं एक्कं समयं, उक्कोसेणं छम्मासा । ३. तिरिक्खजोणियगब्भे णं भंते ! ‘तिरिक्खजोणियगब्भे’ ति कालओ केवच्चिरं होति ? गोयमा ! जहत्तेणं अंतोमुहुत्तं, उक्कोसेणं अट्ट संवच्छराइं । ४. मणुस्सीगब्भे णं भंते ! ‘मणुस्सीगब्भे’ ति कालओ केवच्चिरं होइ ? गोयमा ! जहत्तेणं अंतोमुहुत्तं, उक्कोसेणं बारस संवच्छराइं । ५. कायभवत्थे णं भंते ! ‘कायभवत्थे’ ति कालओ केवच्चिरं होइ ? गोयमा ! जहत्तेणं अंतोमुहुत्तं, उक्कोसेणं चउव्वीसं संवच्छराइं । ६. मणुस्स-पंचेदियतिरिक्खजोणियबीए णं भंते ! जोणिब्भूए केवतियं कालं संचिट्ठइ ? गोयमा ! जहत्तेणं अंतोमुहुत्तं, उक्कोसेणं बारस मुहुत्ता । [सु. ७-८. एगभवग्गहणं पडुच्च एगजीवस्स जणय-पुत्तसंखापरूवणं ] ७. एगजीवे णं भंते ! एगभवग्गहणेणं केवतियाणं पुत्तत्ताए हव्वमागच्छति ? गोयमा ! जहत्तेणं इक्कस्स वा दोणहं वा तिणहं वा, उक्कोसेणं सयपुहुत्तस्स जीवाणं पुत्तत्ताए हव्वमागच्छंति । ८. (१) एगजीवस्स णं भंते ! एगभवग्गहणेणं केवइया जीवा पुत्तत्ताए हव्वमागच्छंति ? गोयमा ! जहत्तेणं इक्को वा दो वा तिण्णिवा, उक्कोसेणं सयसहस्सपुहत्तं जीवा णं पुत्तत्ताए हव्वमागच्छंति । २ से केणट्ठेणं भंते ! एवं वुच्चइ- जाव हव्वमागच्छंति ? गोयमा ! इत्थीए य पुरिसस्स य कम्मकडाए जोणीए मेहुणवत्तिए नामं संजोए समुप्पज्जइ । ते दुहओ सिणेहं संचिणंति, २ तत्थ णं जहत्तेणं एक्को वा दो वा तिण्णि वा, उक्कोसेणं सयसहस्सपुहत्तं जीवा णं पुत्तत्ताए हव्वमागच्छंति । से तेणट्ठेणं जाव हव्वमागच्छंति । [ सु. ९. मेहुणसेवणाअसंजमस्सोदाहरण ] ९. मेहुणं भंते ! सेवमाणस्स केरिसिए असंजमे कज्जइ ? गोयमा ! से जहानामए केइ पुरिसे रूयनालियं वा बूरनालियं वा तत्तेणं कणएणं समभिधंसेज्जा । एरिसए णं गोयमा ! मेहुणं सेवमाणस्स असंजमे कज्जइ । सेवं भंते ! सेवं भंते ! जाव विहरति । [सु. १०. भगवओ जणवयविहारो] १०. तए णं समणे भगवं महावीरे रायगिहाओ नगराओ गुणसिलाओ चेइयाओ पडिनिक्खमइ, २ बहिया जणवयविहारं विहरति । [सु. ११. तुंगियानगरीसमणोवासयाणं वण्णओ ] ११. तेणं कालेणं २ तुंगिया नामं नगरी होत्था । वण्णओ । तीसे णं तुंगियाए नगरीए बहिया उत्तरपुरित्थिमे दिसीभाए पुप्फवतीए नामं चेतिए होत्था । वण्णओ । तत्थ णं तुंगियाए नगरीए बहवे समणोवासया परिवसंति अट्ठा दित्ता वित्थिण्णविपुलभवण-सयणाऽऽसण- जाण-वाहणाइण्णा बहुधण-बहुजायरूव-रयया आयोग-पयोगसंपउत्ता विच्छड्डियविपुलभत्त-पाणा बहुदासी-दास-गो-महिस-गवेल-यप्पभूता बहुजणस्स अपरिभूता अभिगतजीवाजीवा उवलद्धपुण्ण-पावा आसव-संवर-निज्जर-किरयाहिकरण-बंधमोक्खकुसला असहेज्जदेवासुर-नाग-सुवण्ण-जक्खरक्खस-किन्नर-किंपुरिस-गरुल -गंधव्व-महोरगादिएहिं देवगणेहिं निग्गंथातो पावयणातो अणत्तिकमणिज्जा, णिग्गंथे पावयणे निस्संकिया निक्कंखिता निव्वित्तिगिंच्छा लद्धट्ठा गहितट्ठा पुच्छिंतट्ठा अभिगतट्ठा विणिच्छियट्ठा, अट्ठि-मिंजपेम्माणुरागरत्ता— ‘अयमाउसो ! निग्गंथे पावयणे अट्ठे, अयं परमट्ठे, सेसे अणट्ठे,’ ऊसियफलिहा अवंगुतदुवारा चियत्तंतेउर-घरप्पवेसा, बहूहिं सीलव्वत-गुण वेरमण-पच्चक्खाण-पोसहोववासेहिं चाउदसऽट्ठमुद्धिट्ठपुण्णमाणीसु पडिपुण्णं पोसहं सम्मं अणुपालेमाणा, समणे निग्गंथे फासुएसणिज्जेणं असण-पाण-खाइम-साइमेणं वत्थ-पडिग्गह-कंबल-पायपुंछणेणं पीढ-फलग-सेज्जा-संथारणेणं ओसह-भेसज्जेण य पडिलाभेमाणा, अहापरिग्गहिएहिं तवोक्कमेहिं अप्पाणं भावेमाणा विहरंति । [ सु. १२. पासावच्चिअथेराणं वण्णोओ] १२. तेणं कालेणं २ पासावच्चिज्जा थेरा भगवंतो जातिसंपन्ना कुलसंपन्ना बलसंपन्ना रूवसंपन्ना विणयसंपन्ना णाणसंपन्ना दंसणसंपन्ना चरित्तसंपन्ना लज्जासंपन्ना लाघवसंपन्ना ओयंसी तेयंसी वचतचंसी जसंसी जितकोहा जियमाणा जियमाया जियलोभा जियनिट्ठा जितिंदिया

जितपरीसहा जीवियासा-मरणभयविप्पमुक्का जाव कुत्तयावणभूता बहुस्सुया बहुपरिवारा, पंचहिं अणगारसतेहिं सद्धिं संपरिवुडा, अहाणुपुव्विं चरमाणा, गामाणुगामं दूइज्जमाणा, सुहंसुहेणं विहरमाणा जेणेव तुंगिया नगरी, जेणेव पुप्फवतीए चेतिए तेणेव उवागच्छंति, २ अहापडिरूवं उग्गहं ओगिण्हित्ताणं संजमेणं तवसा अप्पाणं भावेमाणा विहरंति । [१३-१५. तुंगियानगरीसमणोवासयकयं पासावच्चिअजिथेराणं अभिगम-वंदण-पज्जुवासणाइयं, थेरकया धम्मदेसणा य] १३. तए णं तुंगियाए नगरीए सिंघाडग-तिग-चउक्क-चच्चर-महापह-पहेसु जाव एगदिसाभिमुहा णिज्जायंति । १४. तए णं ते समणोवासया इमीसे कहाए लद्धट्टा समाणा हट्टतुट्टा जाव सद्दावेति, २ एवं वदासी—एवं खलु देवाणुप्पिया ! पासावच्चेज्जा थेरा भगवंतो जातिसंपन्ना जाव अहापडिरूवं उग्गहं उग्गिण्हित्ताणं संजमेणं तवसा अप्पाणं भावेमाणे विहरंति । तं महाफलं खलु देवाणुप्पिया ! तहारूवाणं थेराणं भगवंताणं णाम-गोत्तस्स वि सवणयाए किमंग पुण अभिगमण-वंदण-नमंसण-पडिपुच्छण-पज्जुवासणयाए ? जाव गहणयाए ? तं गच्छामो णं देवाणुप्पिया ! थेरे भगवंते वंदामो नमंसामो जाव पज्जुवासामो, एयं णं इहभवे वा परभवे वा जाव अणुगामियत्ताए भविस्सतीति कट्टु अन्नमन्नस्स अंतिए एयमट्टं पडिसुणेंति, २ जेणेव सयाइं सयाइं गिहाइं तेणेव उवागच्छंति, २ णहाया कयबलिकम्मा कतकोउयमंगलपायच्छित्ता, सुद्धप्पावेसाइं मंगल्लाइं वत्थाइं पवराइं परिहिया, अप्पमहग्घाभरणालंक्रियसरीरा सएहिं २ गेहेहिंतो पडिनिक्खमंति, २ ता एगतओमेलायंति, २ पायविहारचारेणं तुंगियाए नगरीए मज्झमज्जेणं णिग्गच्छंति, २ जेणेव पुप्फवतीए चेतिए तेणेव उवागच्छंति, २ थेरे भगवंते पंचविहेणं अभिगमेणं अभिगच्छंति, तं जहा—सचित्ताणं दव्वाणं विओसरणताए १ अचित्ताणं दव्वाणं अविओसरणताए २ एगसाडिएणं उत्तरासंगकरणेणं ३ चक्खुप्फासे अंजलिप्पग्गहेणं ४ मणसो एगत्तीकरणेणं ५; जेणेव थेरा भगवंतो तेणेव उवागच्छंति, २ तिक्खुत्तो आयाहिणं पयाहिणं करेंति, २ जाव तिविहाए पज्जुवासणाए पज्जुवासंति, तं जहा—काइ० वाइ० माण० । तत्थ काइयाए - संकु-चियपाणि-पाए सुस्सूसमाणे णमंसमाणे अभिमुहे विणएण पंजलिउडे पज्जुवासंति । वाइयाए—जं जं भगवं वागरेति 'एवमेयं भंते !, तहमेयं भं० !, अवितहमेयं भं० !, असंदिद्धमेयं भं० !, इच्छियमेयं भं० !, पडिच्छियमेयं भं० !, इच्छियपडिच्छियमेयं भं० !, वायाए अपडिकूलेमाणा विणएणं पज्जुवासंति । माणसियाए—संवेगं जणयंता तिव्वधम्माणुरागरत्ता विगह-विसोत्तियपरिवज्जियमई अन्नत्थ कत्थइ मणं अकुव्वमाणा विणएणं पज्जुवासंति । १५. तए णं ते थेरा भगवंतो तेसिं समणोवासयाणं तीसे य महतिमहालियाए परिसाए चाउज्जामं धम्मं परिकहेति, जहा केसिसामिस्स जाव समणोवासयत्ताए आणाए आराहगे भवति जाव धम्मो कहिओ । [सु. १६-१९. पासावच्चिज्जथेराणं देसाणए तव-संजमफलपरूवणापुव्वयं देवलोओववाहेउपरूवणा, थेराणं जणवयविहारा य] १६. तए णं ते समणोवासया थेराणं भगवंताणं अंतिए धम्मं सोच्चा निसम्म हट्टतुट्टा जाव हयहिदया तिक्खुत्तो आयाहिणपयाहिणं करेंति, २ जाव तिविहाए पज्जुवासणाए पज्जुवासंति, २ एवं वदासी— संजमे णं भंते ! किंफले ? तवे णं भंते ! किंफले ? तए णं ते थेरा भगवंतो ते समणोवासए एवं वदासी— संजमे णं अज्जो ! अणणहखले तवे वोदाणफले । १७. (१) तए णं ते समणोवासया थेरे भगवंते एवं वदासी— जइ णं भंते ! संजमे अणणहयफले, तवे वोदाणफले किंपत्तियं णं भंते ! देवा देवलोएसु उववज्जंति ? (२) तत्थ णं कालियपुत्ते नामं थेरे ते समणोवासए एवं वदासी— पुव्वतवेणं अज्जो ! देवा देवलोएसु उववज्जंति । (३) तत्थ णं मेहिले नामं थेरे ते समणोवासए एवं वदासी— पुव्वसंजमेणं अज्जो ! देवा देवलोएसु उववज्जंति । (४) तत्थ णं आणंदरक्खिए णामं थेरे ते समणोवासए एवं वदासी— कंगियाए अज्जो ! देवा देवलोएसु उववज्जंति, (५) तत्थ णं कासवे णागं थेरे ते समणोवासए एवं वदासी संगियाए अज्जो देवा देवलोएसु उववज्जंति पुव्वतवेणं पुव्वसंजमेणं कम्मियाए संगियाए अज्जो ! देवा देवलोएसु उववज्जंति । सच्चे णं एस मट्टे, नो चव णं आतभावत्तव्वयाए । १८. तए णं ते समणोवासया थेरेहिं भगवंतेहिं इमाइं एयारूवाइं वागरणाइं वागरिया समाणा हट्टतुट्टा थेरे भगवंते वंदंति नमंसंति, २ पसिणाइं पुच्छंति, २ उट्टाइं उवादियंति, २ उट्टाए उट्टेंति, २ थेरे भगवंते तिक्खुत्तो वंदंति णमंसंति, २ थेराणं भगवंताणं अंतियाओ पुप्फवतियाओ चेइयाओ पडिनिक्खमंति, २ जामेव दिसिं पाउब्भूया तामेव दिसिं पडिगया । १९. तए णं ते थेरा अन्नया कयाइ तुंगियाओ पुप्फवतिचेइयाओ पडिनिग्गच्छंति, २ बहिया जणवयविहारं विहरंति । [ सु. २०-२५ रायगिहे

भिक्र्वायरियागयस्स गोयमास्स तुंगियानगरित्थपासावच्चिज्जथेरपरूवणानिसमणं, भगवओ पुरओ पुच्छा, पासावच्चिज्जथेरपरूवणाए भगवओ अविरोहनिद्देसो य] २०. तेणं कालेणं २ रायगिहे नामं नगरे जाव परिसा पडिगया । २१. तेणं कालेणं २ समणस्स भगवओ महावीरस्स जेद्वे अंतेवासी इंदीभूतीनामं अणगारे जाव संखित्तविउलतेयलेस्से छट्टंछट्टेणं अनिक्खित्तेणं तवोकम्मेणं संजमेणं तवसा अप्पाणं भावेमाणे जाव विहरति । २२. तए णं से भगवं गोतमे छट्टक्खमणपारणगंसि पढमाए पोरिसीए सज्झायं करेइ, बीयाए पोरसीए झाणं झियायइ, ततियाए पोरिसीए अतुरियमचवलमसंभंते मुहपोत्तियं पडिलेहेति, २ भायणाइं वत्थाइं पडिलेहेइ, २ भायणाइं पमज्जति, २ भायणाइं उग्गाहेति, २ जेणेव समणे भगवं महावीरे तेणेव उवागच्छति, २ समणं भगवं महावीरं वंदति नमंसति, २ एवं वदासी— इच्छामि णं भंते ! तुब्भेहिं अब्भणुण्णाए उट्टक्खमणपारणगंसि रायगिहे नगरे उच्च-नीय-मज्झिमाइं कुलाइं घरसमुदाणस्स भिक्र्वायरियाए अडित्तए । अहासुहं देवाणुप्पिया ! मा पडिबंधं करेह । २३. तए णं भगवं गोतमे समणेणं भगवया महावीरेणं अब्भणुण्णाए समाणे समणस्स भगवओ महावीरस्स अंतियाओ गुणसिलाओ चेतियाओ पडिनिक्खमइ, २ अतुरित्तमचवलसंभंते जुगंतरपलोयणाए दिट्ठीए पुरतो रियं सोहेमाणे २ जेणेव रायगिहे नगरे तेणेव उवागच्छइ, २ रायगिहे नगरे उदनीय-मज्झिमाइं कुलाइं घरसमुदाणस्स भिक्र्वायरियं अडति । २४. तए णं से भगवं गोतमे रायगिहे नगरे जाव (सु. २३) अडमाणे बहुजणसहं निसामेति— “एवं खलु देवाणुप्पिया ! तुंगियाए नगरीए बहिया पुप्फवतीए चेतिए पासावच्चिज्जा थेरा भगवंतो समणावासएहिं इमाइं एतारूवाइं वागरणाइं पुच्छिया— संजमे णं भंते ! किंफले, तवे णं भंते ! किंफले ? । तए णं ते थेरा भगवंतो ते समणोवासए एवं वदासी— संजमे णं अज्जो ! अणणह्यफले, तवे वीदाणफले तं चेव जाव (सु. १७) पुव्वतवेणं पुव्वसंजमेणं कम्मियाए संगियाए अज्जो ! देवा देवलोएसु उववज्जंति, सच्चे णं एस मट्टे, णो चेव णं आयभाववत्तव्वयाए” से कहमेतं मन्ने एवं ? । २५. (१) तए णं से भगवं गोयमे इमीसे कहाए लद्धट्टे समाणे जायसट्टे जाव समुप्पन्नकोतुहल्ले अहापज्जत्तं समुदाणं गेण्हति, २ रायगिहातो नगरातो पडिनिक्खमति, २ अतुरियं जाव सोहमाणे जेणेव गुणसिलाए चेतिए जेणेव समणे भगवं महावीरे तेणेव उवा०, २ सम० भ० महावीरस्स अदूरसामंते गमणागमणाए पडिक्कमति, एसणमणेसणं आलोएति, २ भत्तपाणं पडिदंसेति, २ समणं भ० महावीरं जाव एवं वदासी— “एवं खलु भंते ! अहं तुब्भेहिं अब्भणुण्णाते समाणे रायगिहे नगरे उच्च-नीय- मज्झिमाणि कुलाणि घरसमुदाणस्स भिक्र्वायरियाए अडमाणे बहुजणसहं निसामेमि एवं खलु देवा० ! तुंगियाए नगरीए बहिया पुप्फवईए चेइए पासावच्चिज्जा थेरा भगवंतो समणोवासएहिं इमाइं एतारूवाइं वागरणाइं पुच्छिता— संजमे णं भंते ! किंफले ? तवे किंफले ? तं चेव जाव (सु. १७) सच्चे णं एस मट्टे, णो चेव णं आयभाववत्तव्वयाए” । (२) “तं पभू णं भंते ! ते थेरा भगवंतो तेसिं समणोवासयाणं इमाइं एतारूवाइं वागरणाइं वागरित्तए ? उदाहु अप्पभू ?, समिया णं भंते ! ते थेरा भगवंतो तेसिं समणोवासयाणं इमाइं एतारूवाइं वागरणाइं वागरित्तए ? उदाहु असमिया ?, आउज्जिया णं भंते ! ते थेरा भगवंतो तेसिं समणोवासयाणं इमाइं एतारूवाइं वागरणाइं वागरित्तए ? उदाहु अणाउज्जिया पलिउज्जिया णं भंते ! ते थेरा भगवंतो पुव्वतवेणं तेसिं समणोवासयाणं इमाइं एतारूवाइं वागरणाइं वागरित्तए ? उदाहु अपलिउज्जिया ?, पुव्वतवेणं अज्जो ! देवा देवलाएसु उववज्जंति, पुव्वसंजमेणं०, कम्मियाए०, संगियाए०, पुव्वतवेणं पुव्वसंजमेणं कम्मियाए संगियाए अज्जो ! देवा देवलोएसु उववज्जंति । सच्चे णं एस मट्टे णो चेव णं आयभाववत्तव्वयाए ?” । (३) पभू णं गोतमा ! ते थेरा भगवंतो तेसिं समणोवासयाणं इमाइं एतारूवाइं वागरणाइं वागरेत्तएणो चेव णं अप्पभू, तह चेव नेयव्वं अविसेसियं जाव पभू समिया आउज्जिया पलिउज्जिया जाव सच्चे णं एस मट्टे, णो चेव णं आयभाववत्तव्वयाए । (४) अहं पि य णं गोयमा ! एवमाइक्खामि भासेमि पण्णवेमि परूवेमि— पुव्वतवेणं देवा देवलोएसु उववज्जंति, पुव्वसंजमेणं देवा देवलोएसु उववज्जंति, कम्मियाए देवा देवलोएसु उववज्जंति, संगियाए देवा देवलोएसु उववज्जंति, पुव्वतवेणं पुव्वसंजमेणं कम्मियाए संगियाए अज्जो ! देवा देवलोएसु उववज्जंति; सच्चे णं एस मट्टे, णो चेव णं आयभाववत्तव्वयाए । [सु. २६. समण-माहणपज्जुवासणाए अणंतर-परंपरफलपरूवणा] २६. (१) तहारूवं णं भंते ! समणं वा माहणं वा पज्जुवासमाणस्स किंफला पज्जुवासणा ? गोयमा ! सवणफला । (२) से णं भंते ! सवणे किंफले ? णाणफले । (३) से णं

भंते ! नाणे किंफले ? विण्णाणफले । (४) से णं भंते ! विण्णाणे किंफले ? पच्चक्खाणफले । (५) से णं भंते ! पच्चक्खाणे किंफले ? संजमफले (६) से णं भंते ! संजमे किंफले ? संजमफले (६) से णं भंते ! संजमे किंफले ? अणण्हयफले । (७) एवं अणण्हये तवफले । तवे वोदाणफले । वोदाणे अकिरियाफले । (८) से णं भंते ! अकिरिया किंफला ? सिद्धिपज्जवसाणफला पण्णत्ता गोयमा ! । गाहा— सवणे णाणे य विण्णाणे पच्चक्खाणे य संजमे । अणण्हये तवे चेव वोदाणे अकिरिया सिद्धी ॥१॥ [सु. २७. वेभारपव्वयाहोभागय 'महातवोवतीर' नामगहरयविसए अण्णउत्थियपरूवणापडिसेहपुव्वयं भगवओ परूवणा] २७. अण्णउत्थिया णं भंते ! एवमाइक्खंति भासेंति पण्णवेति परूवेति— एवं खलु रायगिहस्स नगरस्स बहिया वेभारस्स पव्वयस्स अहे एत्थ णं महं एगे हरए अघे पण्णत्ते अणेगाइं जोयणाइं आयाम-विक्खंभेणं नाणादुमसंडमंडिउद्देसे सस्सिरीए जाव पडिख्वे । तत्थ णं बहवे ओराला बलाहया संसेयंति सम्मुच्छंति वासंति तव्वतिरित्ते य णं सया समियं उस्सिणे २ आउकाए अभिनिस्सवइ । से कहमेतं भंते ! एवं ? गोयमा ! जं णं ते अण्णउत्थिया एवमाइक्खंति जाव जे ते एवं परूवेति मिच्छं ते एवमाइक्खंति जाव सव्वं नेयव्वं । अहं पुण गोतमा ! एवमाइक्खामि भा० पं० प०— एवं खलु रायगिहस्स नगरस्स बहिया वेभारस्स पव्वतस्स अदूरसामंते एत्थ णं महातवोवतीरप्पभवे नामं पासवणे पण्णत्ते, पंच धणुसताणि आयाम-विक्खंभेणं नाणादुमसंडमंडिउद्देसे सस्सिरीए पासादीए दरिसणिज्जे अभिख्वे पडिख्वे । तत्थ णं बहवे उस्सिणजोणिया जीवा य पोग्गला य उदग्गत्ताए वक्कमंति विउक्कमंति चयंति उववज्जंति तव्वतिरित्ते वि य णं सया समितं उस्सिणे २ आउयाए अभिनिस्सवति— एस णं गोतमा ! महातवोवतीरप्पभवे पासवणे, एस णं गोतमा ! महातवोसतीरभवस्स पासवणस्स अट्टे पण्णत्ते । सेवं भंते ! २ त्ति भगवं गोयमे समणं भगवं महावीरं वंदति नमंसति ॥ ॥२.५॥ ★★ ★ छट्ठो उद्देसो 'भासा' ★★ ★ [सु. १. भासासरूवाइजाणणत्थं पण्णवणासुत्तस्स भासापदावलोयणनिद्देसो] १. से णूणं भंते ! 'मन्नामी'ति ओधारिणी भासा ? एवं भासापदं भाणियव्वं । ॥२.६॥ ★ ★ ★ सत्तमो उद्देसो 'देव' ★★ ★ [सु. १. देवाणं भेयपरूवणा] १. कइ णं भंते ! देवा पण्णत्ता ? गोयमा ! चउव्विहा देवा पण्णत्ता, तं जहा— भवणवति -वाणमंतर -जोतिस -वेमाणिया । [सु. २. चउव्विहदेवठाण-कप्पपइट्ठाणाइजाणणत्थं पण्णवणासुत्त - जीवाभिगमसुत्तावलोयणनिद्देसो ] २. कहि णं भंते ! भवणवासीणं देवाणं ठाणा पण्णत्ता ? गोयमा ! इमीसे रयणप्पभाए पुढवीए जहा ठाणपदे देवाणं वत्तव्वया सा भाणियव्वा । उववादेणं लोयस्स असंखेज्जइभागे । एवं सव्वं भाणियव्वं जाव (पण्णवणासुत्तं सु. १७७ तः २११) सिद्धगंडिया समत्ता । “कप्पाण पतिट्ठाणं बाहल्लुच्चत्तमेव संठाणं ।” जीवाभिगमे जो वेमाणियुद्देसो सो भाणियव्वो सव्वो । ॥२.७॥ ★★ ★ अट्ठमो उद्देसो 'सभा' ★★ ★ [सु. १. चमरस्स असुरिंदस्स सभाए परूवणा] १. कहि णं भंते ! चमरस्स असुररण्णो सभा सुहम्मा पण्णत्ता ? गोयमा ! जंबुद्दीवे मंदरस्स पव्वयस्स दाहिणेणं तिरियमसंखेज्जे दीव-समुद्दे वीईवइत्ता अरुणवरस्स दीवस्स बाहिरिल्लातो वेइयंतातो अरुणोदयं समुद्दं बायालीसं जोयणसहस्साइं ओगाहिता एत्थ णं चमरस्स असुररण्णो तिगिंछिकूडे नामं उप्पायपव्वते पण्णत्ते, सत्तरसएएक्कवीसे जोयणसते उड्डं उच्चत्तेणं, चत्तारितीसे जोयणसते कोसं च उव्वेहेणं; गोत्थुभस्स आवापव्वयस्स पमाणेणं नेयव्वं, नवरं उवरिल्लं पमाणं मज्झे भाणियव्वं जाव भूले वित्थडे, मज्झे संखित्ते, उप्पिं विसाले, वरवइरविग्गहिए महामउदंसंठाणसंठिए सव्वरयणामए अच्छे जाव पडिख्वे । से णं एगाए पउमवरवेइयाए एगेणं वणसंडेण य सव्वतो समंता संपरिक्खित्ते । पउमवरवेइयाए वणसंडस्स य वण्णओ । तस्स णं तिगिंछिकूडस्स उप्पायव्वयस्स उप्पिं बहुसमरमणिज्जे भूमिभागे पण्णत्ते । वण्णओ । तस्स णं बहुसमरमणिज्जस्स भूमिभागस्स बहुमज्जेदेसभागे । एत्थ णं महं एगे पासातवडिंसए पण्णत्ते अट्ठाइज्जाइं जोयणसयाइं उड्डं उच्चत्तेणं, पणवीसं जोयणसयं विक्खंमेणं । पासायवण्णओ । उल्लोयभूमिवण्णओ । अट्ठ जोयणाइं मणिपेठिया । चमरस्स सीहासणं सपरिवारं भाणियव्वं । तस्स णं तिगिंछिकूडस्स दाहिणेणं छक्कोडिसए पणपन्नं च कोडीओ पणतीसं सतसहस्साइं पण्णासं च सहस्साइं अरुणोदए समुद्दे तिरियं वीइवइत्ता, अहे य रतणप्पभाए पुढवीए चत्तालीसं जोयणसहस्साइं ओगाहिता एत्थ णं चमरस्स असुरिंसइ असुररण्णो चमरचंपा नामं रायहाणी पण्णत्ता, एणं जोयणसतसहस्सं आयाम-विक्खंभे णं जंबुद्दीवपमाणा । ओवारियत्तेणं सोलसं जोयणसहस्साइं आयामविक्खंमेणं, पन्नासं जोयणसहस्साइं पंच य सत्ताणउए जोयणसए किंचिविसेसूणे परिक्खेवेणं, सव्वप्पमाण

वेमाणियप्पमाणस्स अद्धं नेयव्वं । सभा सुहम्मा उत्तरपुरत्थिमेणं, जिणघरं, ततो उववायसभा हरओ अभिसेय० अलंकारो जहा विजयस्स । उववाओ संकप्पो अभिसेय विभूसणा य ववसाओ । अच्चणिय सुहगमो वि य चमर परिवार इहत्तं ॥१॥ **☆☆☆ ॥ बीयसए अट्टमो ॥२.८॥☆☆☆ नवमो उद्देशो 'दीव' ☆☆☆** [सु. १. समयखेत्तपरूवणाजाणणत्थं जीवाभिगमसुत्तावलोयणनिद्देशो ] १. किमिदं भंते ! 'समयखेत्ते' त्ति पवुच्चत्ति ? गोयमा ! अट्टाइज्जा दीवा दो य समुद्दा— एस णं एवतिए 'समयखेत्ते' त्ति पवुच्चत्ति । 'तत्थ ण अयं जंबुद्वीवे दीवे सव्वदीव-समुद्दाणं सव्वब्भंतरए' (जीवाजीवाभि० सु. १२४, पत्र १७७) एवं जीवाभिगमवत्तव्वया नेयव्वा जाव अब्भित्तरं पुक्खरब्धं जोइसविहूणं । **☆☆☆ ॥ बितीयस्स नवमो उद्देशो ॥२.९ ॥ ☆☆☆ दसमो उद्देशो 'अत्थिकाय' ☆☆☆** [सु. १-६. अत्थिकायाणं भेय-पभेयाइपरूवणं ] १. कति णं भंते ! अत्थिकाया पण्णत्ता ? गोयमा ! पंच अत्थिकाया पण्णत्ता, तं जहा— धम्मत्थिकाए अधम्मत्थिकाए आगासत्थिकाए जीवत्थिकाए पोग्गलत्थिकाए । २. धम्मत्थिकाए णं भंते ! कतिवण्णे कतिगंधे कतिरसे कतिफासे ? गोयमा ! अवण्णे अगंधे अरसे अफासे अरूवी सासते अवट्ठिते लोगदव्वे । से समासतो पंचविहे पण्णत्ते, तं जहा— दव्वतो खेत्ततो कालतो भावतो गुणतो । दव्वतो णं धम्मत्थिकाए एगे दव्वे । खेत्ततो णं लोगप्पमाणमेत्ते । कालतो न कदायि न आसि, न कयाइ नत्थि, जाव निच्चे । भावतो अवण्णे अगंधे अरसे अफासे । गुणतो गमणगुणे । ३. अधम्मत्थिकाए वि एवं चेव । नवरं गुणतो ठाणगुणे । ४. आगासत्थिकाए वि एवं चेव । नवरं खेत्तओ णं आगासत्थिकाए लोयालोयप्पमाणमेत्ते अणंते चेव जाव (सु. २) गुणओ अवगाहणागुणे । ५. जीवत्थिकाए णं भंते ! कतिवण्णे कतिगंधे कतिरसे कइफासे ? गोयमा ! अवण्णे जाव (सु. २) अरूवी जीवे सासते अवट्ठिते लोगदव्वे । से समासओ पंचविहे पण्णत्ते; तं जहा— दव्वतो जाव गुणतो । दव्वतो णं जीवत्थिकाए अणंताइं जीवदव्वाइं । खेत्तओ लोगप्पमाणमेत्ते । कालतो न कयाइ न आसि जाव (सु. २) निच्चे । भावतो पुण अवण्णे अगंधे अरसे अफासे । गुणतो उवयोगगुणे । ६. पोग्गलत्थिकाए णं भंते ! कतिवण्णे कतिगंधे० रसे० फासे ? गोयमा ! पंचवण्णे पंचरसे दुगंधे अट्टफासे रूवी अजीवे सासते अवट्ठिते लोगदव्वे । से समासओ पंचविहे पण्णत्ते; तं जहा— दव्वतो खेत्तओ कालतो भावतो गुणतो । दव्वतो णं पोग्गलत्थिकाए अणंताइं दव्वाइं । खेत्ततो लोगप्पमाणमेत्ते । कालतो न कयाइ न आसि जाव (सु. २) निच्चे । भावतो वण्णमंते गंध० रस० फासमंते । गुणतो गहणगुणे । [सु. ७-८. पंचण्हमत्थिकायाणं सरूवं ] ७. (१) एगे भंते ! धम्मत्थिकायपदेसे 'धम्मत्थिकाए' त्ति वत्तव्वं सिया ? गोयमा ! णो इणट्ठे समट्ठे । (२) एवं दोण्णि तिण्णि चत्तारि पंच छ सत्त अट्ट नव दस संखेज्जा असंखेज्जा भंते ! धम्मत्थिकायपदेसा 'धम्मत्थिकाए' त्ति वत्तव्वं सिया ? गोयमा ! णो इणट्ठे समट्ठे । (३) एगपदेसूणे वि य णं भंते ! धम्मत्थिकाए 'धम्मत्थिकाए' त्ति वत्तव्वं सिया ? णो इणट्ठे समट्ठे । (४) से केणट्ठेणं भंते ! एवं वुच्चइ 'एगे धम्मत्थिकायपदेसे नो धम्मत्थिकाए त्ति वत्तव्वं सिया जाव (सु. ७ २ ) एगपदेसूणे वि य णं धम्मत्थिकाए नो धम्मत्थिकाए त्ति वत्तव्वं सिया ?' । से नूणं गोयमा ! खंडे चक्के ? सगले चक्के ? भगवं ! नो खंडे चक्के, सगले चक्के । एवं छत्ते चम्ममे दंडे दूसे आयुहे मोयए । से तेणट्ठेणं गोयमा ! एवं वुच्चइ— 'एगे धम्मत्थिकायपदेसे नो धम्मत्थिकाए त्ति वत्तव्वं सिया जाव एगपदेसूणे वि य णं धम्मत्थिकाए नो धम्मत्थिकाए त्ति वत्तव्वं सिया' । ८. (१) से किं खाइं णं भंते ! 'धम्मत्थिकाए' त्ति वत्तव्वं सिया ? गोयमा ! असंखेज्जा धम्मत्थिकायपदेसा ते सव्वे कसिणा पडिपुण्णा निरवसेसा एगगहणगहिया, एस णं गोयमा ! 'धम्मत्थिकाए' त्ति वत्तव्वं सिया । (२) एवं अहम्मत्थिकाए वि । (३) आगासत्थिकाय - जीवत्थिकाय -पोग्गलत्थिकाया वि एवं चेव । नवरं पदेसा अणंता भाणियव्वा । सेसं तं चेव । [सु. ९. अमुत्तजीवलक्खणवत्तव्वया ] ९. (१) जीव णं भंते ! सउट्टाणे सकम्ममे सबले सवीरिए सपुरिसक्कारपरक्कमे आयभावेणं जीवभावं उवदंसेतीति वत्तव्वं सिया ? हंता, गोयमा ! जीवं णं सउट्टाणे जाव उवदंसेतीति वत्तव्वं सिया । (२) से केणट्ठेणं जाव वत्तव्वं सिया ? गोयमा ! जीवे णं अणंताणं आभिणिबोहियनाणपज्जवाणं एवं सुलनाणपज्जवाणं ओहिनाणपज्जवाणं मणपज्जवनाणपज्जवाणं केवलनाणपज्जवाणं मतिअण्णाणपज्जवाणं सुतअण्णाणपज्जवाणं विभंगणाणपज्जवाणं चक्खुदंसणपज्जवाणं अचक्खुदंसणपज्जवाणं

ओहिदंसणपज्जवाणं केवलदंसणपज्जवाणं उवओगं गच्छति, उवयोगलक्खणेणं जीवे । से तेणट्ठेणं एवं वुच्चइ— गोयमा ! जीवे णं सउट्ठणे जाव वत्तव्वं सिया । [सु. १०-१२. आगासत्थिकायस्स भेया सरूवं च] १०. कतिविहे णं भंते ! आकासे पण्णत्ते ? गोयमा ! दुविहे आगासे पण्णत्ते, तं जहा— लोयाकासे य अलोयागासे य । ११. लोयाकासे णं भंते ! किं जीवा जीवदेसा जीवपदेसा, अजीवा अजीवदेसा अजीवपएसा ? गोयमा ! जीवा वि जीवदेसा वि जीवपदेसा वि, अजीवा वि अजीवदेसा वि अजीवपदेसा वि । जे जीवा ते नियमा एगिंदिया बेइंदिया तेइंदिया चउरिंदिया पंचेदिया अणिंदिया । जे जीवदेसा ते नियमा एगिंदियदेसा जाव अणिंदियदेसा । जे जीवपदेसा ते नियमा एगिंदियपदेसा जाव अणिंदियपदेसा । जे अजीवा ते दुविधा पण्णत्ता, तं जहा— रूवी य अरूवी य । जे रूवी ते चउव्विहा पण्णत्ता, तं जहा— खंधा खंधदेसा संघपदेस्त परमाणुपोग्गला । जे अरूवी ते पंचविधा पण्णत्ता, तं जहा— धम्मत्थिकाए, नोधम्मत्थिकायस्स देसे, धम्मत्थिकायस्स पदेसा, अधम्मत्थिकाए, नोअधम्मत्थिकायस्स देसे अधम्मत्थिकायस्स पदेसा अब्बासमए । १२. अलोयागासे णं भंते ! किं जीवा ? पुच्छा तथ चेव (सु. ११) । गोयमा ! नो जीवा जाव नो अजीवप्पएसा । एगे अजीवदव्वेसे अगुरुयलहुए अणंतेहिं अगुरुयलहुयगुणेहिं संजुते सव्वागासे अणंतभागूणे । [सु. १३. पंचण्हमत्थिकायाणं पमाणं] १३. (१ धम्मत्थिकाए णं भंते ! केमहालए पण्णत्ते ? गोयमा ! लोए लोयमेत्ते लोयप्पमाणे लोयफुडे लोयं चेव फुसित्ताणं चिट्ठइ । (२) एवं अधम्मत्थिकाए, लोयाकासे, जीवत्थिकाए, पोग्गलत्थिकाए । पंच वि एक्काभिलावा । [ सु. १४-२२. अहोलोयाईणं ओघ-विभागेहिं धम्मत्थिकायाइफुसणावत्तव्वया] १४. अहेलोए णं भंते ! धम्मत्थिकायस्स केवतियं फुसति ? गोयमा ! सातिरेगं अब्द्धं फुसति । १५. तिरियलोए णं भंते !० पुच्छा । गोयमा ! असंखेज्जइभागं फुसइ । १६. उट्ठलोए णं भंते !० पुच्छा । गोयमा ! देसाणं अब्द्धं फुसइ । १७. इमा णं भंते ! रतणप्पभा पुढवी धम्मत्थिकायस्स किं संखेज्जइभागं फुसति, ? असंखेज्जइभागं फुसइ, (१) संखिज्जे मागे फुसति असं खेज्जे भागे फुसंति १ सव्वं फुसति १ गोयमा णो संखेज्जइ भागं फुसति असंखेज्जइ भागं फुसइ णो संखेज्ज०, णो असंखेज्जे, नो सव्वं फुसति । १८ इमीसे णं भंते रयणप्पभाए पुढवीए धणादहीं धम्मत्थिकायस्स किं संखेज्जइभागं फुसति ?० । जधा रतणप्पभा (सु १७) तहा धणोदहि-घणवात-तणुवाया वि । १९ (१) इमीसे णं भंते ! रयणप्पभाए पुढवीए ओवासंतरे धम्मत्थिकायस्स किं संखिज्जइभागं फुसति, असंखेज्जइभागं फुसइ जाव (सु. १७) सव्वं फुसइ ? गोयमा ! संखिज्जइभागं फुसइ, णो असंखेज्जइभागं फूसइ, नो संखेज्जेइ, नो असंखेज्जे० नो सव्वं फसइ । (२) ओवासंतरां सव्वाइं जहा रयणप्पभाए । २०. जधा रयणप्पभाए पुढवीए वत्तव्वया भणिया एवं जाव अहेसत्तमाए । २१. एवं सोहम्मं कप्पे जाव ईसिपबभारापुढवीए । एते सव्वे वि असंखेज्जइभागं फुसति, सेसा पडिसेहेतव्वा । २२. एवं अधम्मत्थिकाए । एवं लोयागासे वि । गाहा— पुढवोदही घण तणू कप्पा गेवेज्जऽणुत्तरा सिद्धी । संखिज्जइभागं अंतरेसु सेसा असंखेज्जा ॥१॥ ॥२.१०॥ ☆☆☆॥ बितियं सयं समत्तं ॥२॥ क्कक्क तइयं सयं क्कक्क [सु. १. तइयसयदसुद्देसऽत्थाहिगारगाहा] १. केरिस विउव्वणा १ चमर २ किरिय ३ जाणित्थि ४-५ नगर ६ पाला य ७ । अहिवति ८ इंदिय ९ परिसा १० ततियम्मि सते दसुद्देसा ॥१॥ ☆ ☆ ☆ पढमो उद्देसो 'मोया-केरिस विउव्वणा' ☆ ☆ ☆ [सु. २. पढमुद्देसस्सुवुग्घाओ] २. तेणं कालेणं तेणं समएणं मोया नामं नगरी होत्था । वण्णओ । तीसे णं मोयाए नगरीए बहिया उत्तरपुरत्थिमे दिसीभागे णं नंदणे नामं चेतिए होत्था । वण्णओ । तेणं कालेणं २ सामी समोसढे । परिसा निग्गच्छति । पडिगता परिसा । [ सु. ३-६. अग्गिभूइपुच्छाए भगवओ चमर-तस्सामाणिय- तायत्तीसग- लोगपाल -अग्गमहिसीणं इट्ठि -जुति -बल -जस -सोक्ख -अणुभाग -विउव्वणापरूवणा] ३. तेणं कालेणं तेणं समएणं समणस्स भगवतो महावीरस्स दोच्चे अंतेवासी अग्गिभूती नामं अणगारे गोतमे गोत्तेणं सुत्तस्सेहे जाव पज्जुवासमाणे एवं वदासी— चमरे णं भंते ! असुरिदे असुरराया केमहिट्ठीए ? केमहज्जुतीए ? केमहाबले ? केमहायसे ? केमहासोक्खे ? केमहाणुमाणे ? केवतियं च णं पभू विकुव्वित्तए ? गोयमा ! असुररण्णो एगमेगे सामाणिय देवे तिरिमसंखेज्जे दीवसमुद्दे बहूहिंल्ले चमरे णं असुरिदे असुरराया महिट्ठीए जाव महाणुभागे । से णं तत्थ चोत्तीसाए भवणावाससतसहस्साणं,

चउसट्टीए सामाणियसाहस्सीणं, तायत्तीसाए तायत्तीसगाणं जाव विहरति । एमहिट्टीए जाव एमहाणुभागे । एवतियं च णं पभू विकुव्वित्तए — से जहानामए जुवती जुवाणे हत्थेणं हत्थे गेणहेज्जा, चक्कस्स वा नाभी अरगाउत्ता सिता, एवामेव गोयमा ! चमरे असुरिदे असुरराया वेउव्वियसमुग्घातेणं समोहण्णति, २ संखिज्जाइं जोअणाइं दंडं निसिरति, तं —जहा रतणाणं जाव रिट्ठाणं अहाबायरे पोग्गले परिसाडेति, २ अहासुहुमे पोग्गले परियाइयति, २ दोच्चं पि वेउव्वियसमुग्घाएणं समोहण्णति, २ पभू णं गोतमा ! चमरे असुरिदे असुरराया केवलकप्पं जंबुद्धीवं दीवं बहूहिं असुरकुमारेहिं देवेहिं देवीहि य आइण्णं वित्तिकिण्णं उवत्थडं संथडं फुडं अवगाढावगाढं करेत्तए । अदुत्तरं च णं गोतमा ! पभू चमरे असुरिदे असुरराया तिरियमसंखेज्जे दीव -समुद्दे बहूहिं असुरकुमारेहिं देवेहिं देवीहि य आइण्णे वित्तिकिण्णे उवत्थडे संथडे फुडे अवगाढेवगाढे करेत्तए । एस णं गोतमा ! चमरस्स असुरिंदस्स असुररण्णे अयमेतारूवे विसए विसयमेते वुइए, णो चेव णं संपत्तीए विकुव्विंसु वा, विकुव्वति वा, विकुव्विस्सति वा । (४) जति णं भंते ! चमरे असुरिदे असुरराया एमहिट्टीए जाव एवइयं च णं पभू विकुव्वित्तए, चमरस्स णं भंते ! असुरिंदस्स असुररण्णे सामाणिया देवा केमाहट्टीया जाव केवतियं च णं पभू विकुव्वित्तए ? गोयमा ! चमरस्स असुरिंदस्स असुररण्णे सामाणिया देवा महिट्टीया जाव महाणुभागा । ते णं तत्थ साणं साणं भवणाणं, साणं साणं सामाणियाणं, साणं साणं अग्गमहिसीणं, जाव दिव्वाइं भोगभोगाइं भुंजमाणा विहरंति । एमहिट्टीया जाव एवतियं च णं पभू विकुव्वित्तए— से जहानामए जुवति जुवाणे हत्थेणं हत्थे गेणहेज्जा, चक्कस्स वा नाभी अरयाउत्ता सिया, एवामेव गोतमा ! चमरस्स असुरिंदस्स असुररण्णे एगमेगे सामाणिए देवे वेउव्वियसमुग्घातेणं समोहण्णइ, २ जाव दोच्चं पि वेउव्वियसमुग्घाएणं समोहण्णइ, २ पभू णं गोतमा ! चमरस्स असुरिंदस्स असुररण्णे एगमेगेसामाणिए देवे केवलकप्पं जंबुद्धीवं दीवं बहूहिं असुरकुमारेहिं देवेहिं देवीहि य आइण्णं वित्तिकिण्णं उवत्थडं संथडं फुडं अवगाढावगाढं करेत्तए । अदुत्तरं च णं गोतमा ! पभू चमरस्स असुरिंदस्स (४) असुरकुमारेहिं देवेहिं देवीहि य आइण्णे वित्तिकिण्णे उवत्थडे संथडे फुडे अवगाढावगाढे करेत्तए । एस णं गोतमा ! चमरस्स असुरिंदस्स असुररण्णे एगमेगस्स सामाणियदेवस्स अयमेतारूवे विसए विसयमेते वुइए, णो चेव णं संपत्तीए विकुव्विंसु वा विकुव्वति वा विकुव्विस्सति वा । ५. (१) जइ णं भंते ! चमरस्स असुरिंदस्स असुररण्णे सामाणिया देवा एमहिट्टीया जाव एवतियं च णं पभू विकुव्वित्तए चमरस्स णं भंते ! असुरिंदस्स असुररण्णे तायत्तीसिया देवा केमहिट्टीया ? तायत्तीसिया देवा जहा सामाणिया तहा नेयव्वा । (२) लोयपाला तहेव । नवरं संखेज्जा दीव-समुद्दा भाणियव्वा । ६. जति णं भंते ! चमरस्स असुरिंदस्स असुररण्णे लोगपाला असुररण्णे एगमेगे सायाणियदेवे तिरियमसंखेज्जे दीव-समुद्दे बहुहिं देवा एमहिट्टीया जाव एवतियं च णं पभू विकुव्वित्तए, चमरस्स णं भंते ! असुरिंदस्स असुररण्णे अग्गमहिसीओ देवीओ केमहिट्टीयाओ जाव केवतियं च णं पभू विकुव्वित्तए ? गोयमा ! चमरस्स णं असुरिंदस्स असुररण्णे अग्गमहिसीओ देवीओ महिट्टीयाओ जाव महाणुभागाओ । ताओ णं तत्थ साणं साणं भवणाणं, साणं साणं सामाणियसाहस्सीणं, साणं साणं महत्तरियाणं, साणं साणं परिसाणं जाव एमहिट्टीयाओ, अन्नं जहा लोगपालाणं (सु. ५ २ ) अपरिसेसं । [सु. ७-१०. अग्गिभूइपरूवियचमराइवत्तव्वयं असद्वहंतस्स वाउभूइस्स संकाए भगवओ समाहाणं, अग्गिभूइं पइ वाउभूइकयं खामणाइ य] ७. सेवं भंते ! २ त्ति भगवं दोच्चे गोतमे समणं भगवं महावीरं वंदइ नमंसइ, २ जेणेव तच्चे गोयमे वायुभूती अणगारे तेणेव उवागच्छति, २ तच्चं गोयमं वायुभूतिं अणगारं एवं वदासि-एवं खलु गोतमा ! चमरे असुरिदे असुरराया एमहिट्टीए तं चेव एवं सव्वं अपुट्टवागरणं नेयव्वं अपरिसेसियं जाव अग्गमहिसीणं वत्तव्वया समत्ता । ८. तए णं से तच्चे गोयमे वायुभूती अणगारे दोच्चस्स गोतमस्स अग्गिभूतिस्स अणगारस्स एवमाइक्खमाणस्स भा० पं० परू० एतमट्ठं नो सद्वहति, नो पत्तियति, नो रोयति; एयमट्ठं असद्वहमाणे अपत्तियमाणे अरोएमाणे उट्टाए उट्टेति, २ जेणेव समणे भगवं महावीरे तेणेव उवागच्छइ जाव पज्जुवासमाणे एवं वयासी-एवं खलु भंते ! मम दोच्चे गोतमे अग्गिभूती अणगारे एवमाइक्खति भासइ पण्णवेइ परूवेइ-एवं खलु गोतमा ! चमरे असुरिदे असुरराया महिट्टीए जाव महाणुभावे से णं तत्थ चोत्तीसाए भवणावाससयसहस्साणं एवं तं चेव सव्वं अपरिसेसं भाणियव्वं जाव (सु. ३-६) अग्गमहिसीणं वत्तव्वता समत्ता । से कहमेतं भंते ! एवं ? 'गोतमा' दि समणे भगवं महावीरे तच्चं गोतमं

वायुभूतिं अणगारं एवं वदासि—जं णं गोतमा ! तव दोच्चे गोयमे अग्निभूती अणगारे एवमाइक्खइ ४—“ एवं खलु गोयमा ! चमरे ३ महिह्णीए एवं तं चेव सव्वं जाव अग्गमहिस्सीणं वत्तव्वया समत्ता ”, सच्चे णं एस मट्ठे, अहं पि णं गोयमा ! एवमाइक्खामि भा० प० परू० । एवं खलु गोयमा ! चमरे ३ जाव महिह्णीए सो चेव बितिओ गमो भाणियव्वो जाव अग्गमहिस्सीओ, सच्चे णं एस मट्ठे । ९. सेवं भंते २ ० तच्चे गोयमे वायुभूती अणगारे समणं भगवं महावीरं वंदइ नमंसइ, २ जेणेव दोच्चे गोयमे अग्निभूती अणगारे तेणेव उवागच्छइ, २ दोच्चं गोयमं अग्निभूतिं अणगारं वंदइ नमंसति, २ एयमट्ठं सम्मं विणएणं भुज्जो २ खामेति । १०. तए णं से दोच्चे गोयमे अग्निभूई अण० तच्चेणं गो० वायुभूइणा अण० एयमट्ठं सम्मं विणएणं भुज्जो २ खामिए समाणे उट्ठाए उट्ठेइ, २ तच्चेणं गो० वायुभूइणा अण० सद्धिं जेणेव समणे भगवं० महावीरे तेणेव उवागच्छइ, २ समणं भगवं० वंदइ०, २ जाव पज्जुवासइ । [सु. ११-१२. वाउभूइपुच्छाए भगवओ बतिल-तस्सामाणियादीणं इह्णिविउव्वणाइपरूवणा] ११. तए णं से तच्चे गो० वायुभूती अण० समणं भगवं० वंदइ नमंसइ, २ एवं वदासी—जति णं भंते ! चमरे असुरिदे असुरराया एमहिह्णीए जाव (सु. ३) एवतियं च णं पभू विकुव्वित्तए, बली णं भंते ! वइरोयणिदे वइरोयणराया केमहिह्णीए जाव (सु. ३) केवइयं च णं पभू विकुव्वित्तए ? गोयमा ! बली णं वइरोयणिदे वइरोयणराया महिह्णीए जाव (सु. ३) महाणुभागे । से णं तत्थ तीसाए भवणावाससयसहस्साणं, सट्ठीए सामाणियसाहस्सीणं सेसं जहा चमरस्स, नवरं चउण्हं सट्ठीणं आयरक्खदेवसाहस्सीणं अन्नेसिं च जाव भुंजमाणे विहरति । से जहानामए एवं जहा चमरस्स; णवरं सातिरेगं केवलकप्पं जंबुद्दीवं दीवं ति भाणियव्वं । सेसं तहेव जाव विउव्विस्सति वा (सु. ३) । १२. जइ णं भंते ! बली वइरोयणिदे वैरोयणराया एमहिह्णीए जाव (सु. ३) एवइयं च णं पभू विउव्वित्तए बलिस्स णं वइरोयणस्स सामाणियदेवा केमहिह्णीया ? एवं सामाणियदेवा तावत्तीसा लोकपालऽग्गमहिस्सीओ य जहा चमरस्स (सु. ४-६), नवरं साइरेगं जंबुद्दीवं जाव एगमेगाए अग्गमहिस्सीए देवीए, इमे वुइए विसए जाव विउव्विस्संति वा । सेवं भंते ! २ तच्चे गो० वायुभूती अण० समणं भगवं महा० वंदइ ण०, २ नऽच्चासन्ने जाव पज्जुवासइ । [सु. १३. अग्निभूइपुच्छाए भगवओ धरणिंद-तस्सामाणियाईणं इह्णिविउव्वणाइपरूवणा] १३. तए णं से दोच्चे गो० अग्निभूती अण० समणं भगवं वंदइ०, २ एवं वदासि-जति णं भंते ! बली वइरोयणिदे वइरोयणराया एमहिह्णीए जाव एवइयं च णं पभू विकुव्वित्तए धरणे णं भंते ! नागकुमारिदे नागकुमारराया केमहिह्णीए जाव केवतियं च णं पभू विकुव्वित्तए ? गोयमा ! धरणे णं नागकुमारिदे नागकुमारराया एमहिह्णीए जाव से णं तत्थ चोयालीसाए भवणावाससयसहस्साणं, छण्हं सामाणियसाहस्सीणं, तायत्तीसाए तायत्तीसगाणं, चउण्हं लोगपालाणं, छण्हं अग्गमहिस्सीण सपरिवाराणं, तिण्हं परिसाणं, सत्तण्हं अणियाणं, सत्तण्हं अणियाहिवतीणं, चउवीसाए आयरक्खदेवसाहस्सीणं, अन्नेसिं च जाव विहरइ । एवतियं च णं पभू विउव्वित्तए—से जहानामए जुवति जुवाणे जाव (सु. ३) पभू केवलकप्पं जंबुद्दीवं दीवं जाव तिरियमसंखेज्जे दीव-समुद्दे बहूहिं नागकुमारेहिं नागकुमारीहिं जाव विउव्विस्सति वा । सामाणिय-तायत्तीस-लोगपालऽग्गमहिस्सीओ य तहेव जहा चमरस्स (सु. ४-६) । नवरं संखेज्जे दीव -समुद्दे भाणियव्वं । [ सु. १४. दाहिणिल्ल-उत्तरिल्लाणठ सुवण्णकुमाराइथणियकुमार-वाणमंतर - जोइसियाणं तस्सामाणियाईणं च इह्णिविउव्वणाइविसयाए कमसो अग्निभूइ- वाउभूइपुच्छाए भगवओ परूवणा १४. एवं जाव थणियकुमारा, वाणमंतर- जोतिसिया वि । नवरं दाहिणिल्ले सव्वे अग्निभूती पुच्छति, उत्तरिल्ले सव्वे वाउभूती पुच्छइ । [सु. १५-१८. सक्कदेविंद -तीसयदेव -सक्कसामाणियाइणं इह्णिविउव्वणाइविसयाए अग्निभूइपुच्छाए भगवओ परूवणा ] १५. ‘भंते !’ त्ति भगवं दोच्चे गोयमे अग्निभूती अणगारे समणं भगवं म० वंदति नमंसति, २ एवं वयासी— जति णं भंते ! जोतिसिदे जोतिसराया एमहिह्णीए जाव एवतियं च णं पभू विकुव्वित्तए ? सक्के णं भंते ! देविदे देवराया केमहिह्णीए जाव केवतियं च णं पभू विकुव्वित्तए १ गोयमा ! सक्के णं देविदे देवराया महिह्णीए जाव महाणुभागे । से णं तत्थ बत्तीसाए विमाणावाससयसहस्साणं आयरक्खदेवसाहस्सीणं चउरासीए सामाणियसाहस्सीणं (२) जाव चउण्हं चउरासीणं आयरक्खदेवसाहस्सीणं अन्नेसिं च जाव विहरइ । एगहिइढीए जाव एवतियं च णं पभू विकुव्वित्तए । एवं जहेव चमरस्स तहेव भाणियव्वं, नवरं दो केवलकप्पे जंबुद्दीवे दीवे, अवसेसं तं चेव । एस णं गोयमा ! सक्कस्स देविंदस्स देवरणो इमेयारूवे विसए विसयमेत्ते णं वुइए,

नो चेव णं संपत्तीए विकुव्विंसु वा विकुव्वति वा विकुव्विस्सति वा । १६. जइ णं भंते ! सक्के देविदे देवराया एमहिद्धीए जाव एवतियं च णं पभू विकुव्वित्तए एवं खलु देवाणप्पियाणं अंतेवासी तीसए णामं अणगारे पगतिभइए जाव विणीए छट्टंछट्टेणं अणिक्खित्तेणं तवोकम्मेणं अपरं भावेमाणे बहुपडिपुण्णाइं अट्ट संवच्छराइं सामण्णपरियागं पाउणित्ता भासियाए सल्लेहणाए अत्ताणं झूसेत्ता सट्ठिं भत्ताइं अणसणाए छेदेत्ता आलोइयपडिक्कंते समाहिपत्ते कालमासे कालं किच्चा सोहम्मं कप्पे सयंसि विमाणंसि उववायसमाए देवसयणिज्जसिं देवदूसंतरिए अंगुलस्स असंखेज्जभागमेतीए ओगाहणाए सक्कस्स देविंदस्स देवरण्णो सामाणियदेवत्ताए उववन्ने । तए णं तीसए देवे अहुणोववन्नमेत्ते समाणे पंचविहाए पज्जतीए पज्जत्तिभावं गच्छइ, तं जहा— आहारपज्जतीए सरीरं इंदियं आणापाणुपज्जतीए भासामणपज्जतीए । तए णं तं तीसयं देवं पंचविहाए पज्जतीए पज्जत्तिभावं गयं समाणं सामाणियपरिसोववन्नया देवा करयलपरिग्गहियं दसनहं सिरसावत्तं मत्थए अंजलिं कट्ठु जएणं विजएणं वद्धाविंति, २ एवं वदासी— अहो ! णं देवाणुप्पिएहिं दिव्वा देविद्धी, दिव्वा देवजुती, दिव्वे देवाणुभावे लद्धे पत्ते अभिसमन्नागते, जारिसिया णं देवाणुप्पिएहिं दिव्वा देविद्धी (३) दिव्वा देवज्जुती दिव्वे देवाणुभावे लद्धं पत्ते अभिसमन्नागते तारिसिया णं सक्केणं देविदेणं देवरण्णा दिव्वा देविद्धी जाव अभिसमन्नागता जारिसिया णं संक्केणं देविदेणं देवरण्णा दिव्वा देविद्धी जाव अभिसमन्नागता तारिसिया णं देवाणुप्पिएहिं दिव्वा देविद्धी, जाव अभिसमन्नागता । से णं भंते ! तीसए देवे केमहिद्धीए जाव केवतियं च णं पभू विकुव्वित्तए ? गोयमा ! महिद्धीए जाव महाणुभागे, से णं तत्थ सयस्स विमाणस्स, चउण्हं सामाणियसाहस्सीणं, चउण्हं अग्गमहितीणं, (४) सपरिवाराणं, तिण्हं परिसाणं, सत्तण्हं अणियाणं सत्तण्हं अणियाहिवतीणं सोलण्हं आयरक्खदेवसाहस्सीणं अन्नेसिं च बहूणं वेमाणियाणं देवाण य देवीण य जाव विहरति । एमहिद्धीए जाव एवइयं च णं पभू विकुव्वित्तए— से जहाणामए जुवति जुवाणे हत्थेण हत्थे गेणहेज्जा जहेव सक्कस्स तहेव जाव एस णं गोयमा ! तीसयस्स देवस्स अयमेयारूवे विसए विसयमेत्ते वुइए, नो चेव णं संपत्तीए विउव्विंसु वा ३ । १७. जति णं भंते ! तीसए देवे एमहिद्धीए जाव एवइयं च णं पभू विकुव्वित्तए, सक्कस्स णं भंते ! देविंदस्स देवरण्णो अवसेसा सामाणिया देवा केमहिद्धीया तहेव सव्वं जाव एस णं गोयमा ! सक्कस्स देविंदस्स देवरण्णो एगमेगस्स सामाणियस्स देवस्स इमेयारूवे विसए विसयमेत्ते वुइए, नो चेव णं संपत्तीए विउव्विंसु वा विकुव्वंति वा विकुव्विस्संति वा । १८. तायात्तीसय - लोणपाल - अग्गमहितीणं जहेव - चमरस्स । नवरं दो केवलकप्पे जंबुद्धीवे दीवे, अन्नं तं चेव । सेवं भंते ! सेवं भंते ! त्ति दोच्चे गोयमे जाव विहरति । [सु. १९-२१. ईसाणदेविंद-ईसाणोववन्नकुरुदत्तपुत्त-ईसाणसा माणियाईणं इद्धि-विउव्वणाइविसयाए वाउभूइपुच्छाए भगवओ परूवणा ] १९. 'भंते' त्ति भगवं तच्चे गोयमे वाउभूती अणगारे समणं भगवं जाव एवं वदासी— जति णं भंते ! सक्के देविदे देवराया एमहिद्धीए जाव एवइयं च णं पभू विउव्वित्तए, ईसाणे णं भंते ! देविदे देवराया केमहिद्धीए ? एवं तहेव, नवरं साहिए दो केवलकप्पे जंबुद्धीवे दीवे, अवसेसं तहेव । २०. जति णं भंते ! ईसाणे देविदे देवराया एमहिद्धीए जाव एवतियं च णं पभू विउव्वित्तए, एवं खलु देवाणुप्पियाणं अंतेवासी कुरुदत्तपुत्ते नामं पगतिभइए जाव विणीए अट्टमंअट्टमेणं अणिक्खित्तेणं पारणए आयंबिलपरिग्गहिएणं तवोकम्मेणं उट्टं बाहाओ पगिब्भिय २ सूराभिमुहे आयावणभूमीए आतावेमाणे बहुपडिपुण्णे छम्मासे सामण्णपरियागं पाउणित्ता अब्बमासियाए संलेहणाए अत्ताणं झोसित्ता तीसं भत्ताइं अणसणाए छेदिता आलोइयपडिक्कंते समाहिपत्ते कालमासे कालं किच्चा ईसाणे कप्पे सयंसि विमाणंसि जा चेव तीसए वत्तव्वया स च्चेव अपरिसेसा कुरुदत्तपुत्ते वि । नवरं सातिरेगे दो केवलकप्पे जंबुद्धीवे दीवे, अवसेसं तं चेव । २१. एवं सामाणिय-तायत्तीस - लोणपाल - अग्गमहितीणं जाव एस णं गोयमा ! ईसाणस्स देविंदस्स देवरण्णो एवं एगमेगाए अग्गमहितीए देवीए अयमेयारूवे विसए विसयमेत्ते वुइए, नो चेव णं संपत्तीए विउव्विंसु वा विकुव्वंति वा विकुव्विस्संति वा । [सु. २२-३०. सणंकुमाराइअच्चुयपज्जंताणं ससामाणियाईणं इद्धि-विउव्वणाइपरूवणा ] २२. (१) एवं सणंकुमारे वि, नवरं चत्तारि केवलकप्पे जंबुद्धीवे दीवे, अदुत्तरं च णं तिरियमसंखेज्जे । (२) एवं सामाणिय-तायत्तीस - लोणपाल-अग्गमहितीणं असंखेज्जे दीव -समुद्धे सव्वे विउव्वंति । २३. सणंकुमाराओ आरद्धा उवरिल्ला लोणपाला सव्वे वि असंखेज्जे दीव -समुद्धे विउव्वंति । २४. एवं माहिदे वि । नवरं साइरेगे चत्तारि केवलकप्पे जंबुद्धीवे दीवे । २५. एवं बंभलोए

वि, नवरं अट्ट केवलकप्पे० । २६. एवं लंतए वि, नवरं सातिरेगे अट्ट केवलकप्पे० । २७. महासुक्के सोलस केवलकप्पे० । २८. सहस्सारे सातिरेगे सोलस० । २९. एवं पाणए वि, नवरं बत्तीसं केवल० । ३०. एवं अच्चुए वि, नवरं सातिरेगे बत्तीसं केवलकप्पे जंबुद्दीवे दीवे । अन्नं तं चव । सेवं भंते ! सेवं भंते ! त्ति तच्चे गोयमे वायुभूती समणं भगवं महावीरं वंदइ नमंसति जाव विहरति । [सु. ३१. भगवओ मोयानगरीओ जणवयविहारो] ३१. तए णं समणे भगवं महावीरे अन्नया कयाई मोयाओ नगरीओ नंदणाओ चेतियाओ पडिनिक्खमइ, २ बहिया जणवयविहारं विहरइ । [सु. ३२-३३. ईसाणदेविंदस्स भगवतो वंदणत्थं रायगिहे आगमणं तओ पडिगमणं च] ३२. तेणं कालेणं तेणं समएणं रायगिहे नामं नगरे होत्था । वण्णओ । जाव परिसा पज्जुवासइ । ३३. तेणं कालेणं तेणं समएणं ईसाणे देविदे देवराया सूलपाणी वसभवाहणे उत्तरह्ल्लोगाहिवई अट्टावीसविमाणावाससयसहस्साहिवई अरयंबरवत्थधरे आलइयमालमउडे नवहेमचारुचित्तचंचलकुंडलविलिहिज्जमाणगंडे जाव दस दिसाओ उज्जोवेमाणे पभासमाणे ईसाणे कप्पे ईसाणवडिंसए विमाणे जहेव रायप्पसेणइज्जे जाव (राज० पत्र ४४-५४) दिव्वं देविद्धिं जाव जामेव दिसिं पाउब्भूए तामेव दिसिं पडिगए । [सु. ३४. कूडागारसालादिद्वंतपुव्वयं ईसाणिंददेविद्धीए ईसाणिंदसरीराणुप्पवेसपरूवणा ] ३४. (१) 'भंते !' त्ति भगवं गोयमे समणं भगवं महावीरं वंदति णमंसति, २ एवं वदासी— अहो णं भंते ! ईसाणे देविदे देवराया महिद्धीए । ईसाणस्स णं भंते ! सा दिव्वा देविद्धी कहिं गता ? कहिं अणुपविट्ठा ? गोयमा ! सरीरं गता, सरीरं अणुपविट्ठा । (२) से केणट्ठेणं भंते ! एवं वुच्चति सरीरं गता, सरीरं अणुपविट्ठा ? गोयमा ! से जहानामए कूडागारसाला सिया दुहओ लित्तो गुत्ता गुत्तदुवारा णिवाया णिवायगंभीरा, तीसे णं कूडागार० जाव (राज० पत्र ५६) कूडागारसालादिद्वंतो भाणियव्वो । [ सु. ३५-५२. ईसाणदेविंदस्स पुव्वभववुत्तंतो सु. ३५-३७. तामलिगाहावतिस्स धम्मजागरियाए पाणामापव्वज्जागहणअभिग्गहणसंकप्पो पव्वज्जाइगहणं च] ३५. ईसाणेणं भंते ! देविदेणं देवरणा सा दिव्वा देविद्धी दिव्वा देवजुती दिव्वे देवाणुभागे किणा लद्धे ? किणा पत्ते ? किणा अभिसमन्नागए ? के वा एस आसि पुव्वभवे ? किंणामए वा ? किंगोत्ते वा ? कतरंसि वा गामंसि वा नगरंसि वा जाव सन्निवेसंसि वा ? किं वा दच्चा ? किं वा भोच्चा ? किं वा किच्चा ? किं वा समायरित्ता ? कस्स वा तहारूवस्स समणस्स वा माहणस्स वा अंतिए एगमवि आरियं धम्मियं सुवयणं सोच्चा निसम्म जं णं ईसाणेणं देविदेणं देवरणा सा दिव्वा देविद्धी जाव अभिसमन्नागया ? एवं खलु गोयमा ! तेणं कालेणं तेणं समएणं इहेव जंबुद्दीवे दीवे भारहे वासे तामलित्ती नामं नगरी होत्था । वण्णओ । तत्थ णं तामलित्तीए नगरीए तामली नामं मोरियपुत्ते गाहावती होत्था । अट्टे दित्ते जाव बहुजणस्स अपरिभूए यावि होत्था । ३६. तए णं तस्स मोरियपुत्तस्स तामलिस्स गाहावतिस्स अन्नया कयाइ पुव्वरत्तावरत्तकालसमयंसि कुटुंबजागरियं जागरमाणस्स इमेयारूवे अज्झत्थिए जाव समुप्पज्जित्था— “अत्थि ता मे पुरा पोरणाणं सुचिण्णाणं सुपरक्कंताणं सुभाणं कल्लाणाणं कडाणं कम्माणं कल्लाणे फलवित्तिविसेसे जेणाहं हिरण्णेणं वट्ठामि, सुवण्णेणं वट्ठामि, धणेणं वट्ठामि, धन्नेणं वट्ठामि, पुत्तेहिं वट्ठामि, पसूहिं वट्ठामि, विउलधण-कणग-रयण-मणि-मोत्तिय-संख-सिल-प्पवाल-रत्तरयण-संतसारसावतेज्जेणं अतीव २ अभिवट्ठामि, तं किं णं अहं पुरा पोरणाणं सुचिण्णाणं जाव कडाणं कम्माणं एगंतसोक्खयं उवेहेमाणे विहरामि ?, तं जाव ताव अहं हिरण्णेणं वट्ठामि, जाव अतीव २, अभिवट्ठामि, जाव च णं मे मित्त-नाति-नियग-संबंधिपरियणो आढाति परियाणइ सक्कारेइ सम्माणेइ कल्लाणं मंगलं देवयं चेइयं विणएणं पज्जुवासइ तावता मे सेयं कल्लं पाउप्पभाताए रयणीए जाव जलंते सयमेव दारुमयं पडिग्गहयं करेत्ता विउलं असण-पाण-खातिम-सातिमं उवक्खडावेत्ता मित्त-नाति-नियग-संबंधिपरियणं आमंतेत्ता तं मित्त-नाइ-नियग -संबंधिपरियणं विउलेणं असण-पाण-खातिम-सातिमेणं वत्थ-गंध-मल्लाऽलंकारेण य सक्कारेत्ता सम्माणेत्ता तस्सेव मित्त-नाइ-नियग-संबंधि-परियणस्स पुरतो जेट्टं पुत्तं कुटुंबे ठावेत्ता तं मित्त-नाति-णियग-संबंधिपरियणं जेट्टपुत्तं च आपुच्छित्ता सयमेव दारुमयं पडिग्गहं गहाय मुंडे भवित्ता पाणामाए पव्वज्जाए पव्वइत्तए । पव्वइत्ते वि य णं समाणे इमं एयारूवं अभिग्गहं अभिगिण्हिस्सामि— ‘कप्पइ मे जावज्जीवाए छट्टंछट्टेणं अणिक्खित्तेणं तवोकम्मेणं उट्टं बाहाओ पगिब्भिय पगिब्भिय सूराभिमुहस्स आतावणभूमीति आयावेमाणस्स विहरित्तए, छट्टस्स वि य णं पारणयंसि आयावणभूमीतो पच्चोरुभित्ता सयमेव दारुमयं पडिग्गहयं गहाय

तामलितीए नगरीए उच्च -नीय -मज्झिमाइं कुलाइं घरसमुदाणस्स भिक्खायरियाए अडित्ता सुद्धोदणं पडिग्गाहेत्ता, तं तिसत्तखुत्तो उदएणं पक्खालेत्ता, तओ पच्छा आहारं आहारित्तए' ति कट्टु' एवं संपेहेइ, २ कल्लं पाउप्पभायाए जाव जलंते सयमेव दारुमयं पडिग्गहयं करेइ, २ विउलं असण-पाण-खाइम-साइमं उवक्खडावेइ, २ तओ पच्छा ण्हाए कयबलिकम्मे कयकोउयमंगलपायच्छित्ते सुद्धप्पावेसाइं मंगल्लाइं वत्थाइं पवर परिहिए अप्पमहग्घाऽऽभरणालं कियसरीरे भोयणवेलाए भोयणमंडवंसि सुहासणवरगते । तए णं मित्त-नाइ-नियग-संबंधिपरिजणेणं सद्धिं तं विउलं असण-पाण-खातिम-साइमं आसादेमाणे वीसादेमाणे परिभाएमाणे परिभुंजेमाणे विहरइ । ३७. जिमियभुत्तुरागए वि य णं समाणे आयंतं चोक्खे परमसुइभूए तं मित्त जाव परियणं विउलेणं असणपाण० ४ पुप्फ-वत्थ-गंध-मल्लाऽलंकारेण य सक्कारेइ, २ तस्सेव मित्त -नाइ जाव परियणस्स पुरओ जेट्टं पुत्तं कुट्टुं ठावेइ, २ ता तं मित्त-नाइ-णियग-संबंधिपरिजणं जेट्टुपुत्तं च आपुच्छइ, २ मुंडे भवित्ता पाणामाए पव्वज्जाए पव्वइए । पव्वइए वि य णं समाणे इमं एयारूवं अभिग्गहं अभिगिण्हइ — 'कप्पइ मे जावज्जीवाए छट्टंछट्टेणं जाव आहारित्तए' ति कट्टु इमं एयारूवं अभिग्गहं अभिगिण्हइ, २ ता जावज्जीवाए छट्टंछट्टेणं अनिक्खित्तेणं तवोकम्मेणं उड्डं बाहाओ पगिब्भिय २ सुराभिमुहे आतावणभूमीए आतावेमाणे विहरइ । छट्टस्स वि य णं पारणयंसि आतावणभूमीओ पच्चोरुभइ, २ सयमेव दारुमयं पडिग्गहं गहाय तामलितीए नगरीए उच्च-नीय-मज्झिमाइं कुलाइं घरसमुदाणस्स भिक्खायरियाए अडइ, २ सुद्धोयणं पडिग्गाहेइ, २ तिसत्तखुत्तो उदएणं पक्खालेइ, तओ पच्छा आहारं आहारेइ । [सु. ३८. गोतमपुच्छियस्स भगवओ पाणामापव्वज्जासरूवपणवणा ] ३८. से केणट्टेणं भंते ! एवं वुच्चइ— पाणामा पव्वज्जा ? गोयमा ! पाणामाए णं पव्वज्जाइ पव्वइए समाणे जं जत्थ पासइ इदं वा खंदं वा रुदं वा सिवं वा वेसमणं वा अज्जं वा कोट्टकिरियं वा राजं वा जाव सत्थवाहं वा कागं वा साणं वा पाणं वा उच्चं पासइ उच्चं पणामं करेति, नीयं पासइ नीयं पणामं करेइ, जं जहा पासति तस्स तहा पणामं करेइ । से तेणट्टेणं जाव पव्वज्जा । [सु. ३९-४०. तामलिस्स बालवोणुट्टाणाणंतं अणसणपडिवज्जणं] ३९. तए णं से तामली मोरियपुत्ते तेणं ओरालेणं विपुलेणं पयत्तेणं पग्गहिणं बालतवोकम्मेणं सुक्के भुक्खे जाव धमणिसंतते जाए यावि होत्था । ४०. तए णं तस्स तामलिस्स बालतवस्सिस्स अन्नया कयाइ पुव्वरत्तावरत्तकालसमयंसि अणिच्चजागरियं जागरमाणस्स इमेयारुवे अज्झत्थिए चिंतिए जाव समुप्पज्जित्था— 'एवं खलु अहं इमेणं ओरालेणं विपुलेणं जाव उदग्गेणं उदत्तेणं उत्तमेणं महाणुभागेणं तवोकम्मेणं सुक्के भुक्खे जाव धमणिसंतते जाते, तं अत्थि जा मे उट्टाणे कम्मे बले वीरिए पुरिसक्कारपरक्कमे तावता मे सेयं कल्लं जाव जलंते तामलितीए नगरीए दिट्ठाभट्टे य पासंडत्थे य गिहत्थे य पुव्वसंगतिए य परियायसंगतिए य आपुच्छित्ता तामलितीए नगरीए मज्झंमज्झेणं निग्गच्छित्ता पाउग्गं कुंडियमादीयं उवकरणं दारुमयं च पडिग्गहयं एगंते एडित्ता तामलितीए नगरीए उत्तरपुरत्थिमे दिसीभाए णियत्तणियमंडलं आलिहित्ता संलेहणाइूसणाइूसियस्स भत्त-पाणपडियाइक्खियस्स पाओवगयस्स कालं अणवकंखमाणस्स विहरित्तए ति कट्टु एवं संपेहेइ । एवं संपेहेत्ता कल्लं जाव जलंते जाव आपुच्छइ, २ तामलितीए एगंते एडेइ जाव भत्त -पाणपडियाइक्खिए पाओवगमणं निवत्ते । [सु. ४१-४४. तामलितवस्सिं पइ बलिचंचारायहाणीवत्थव्वदेव -देवीकया निप्फला बलिचंचारायहाणिइंदत्तलंभनियाणकरणविन्नती)] ४१. तेणं कालेणं तेणं समएणं बलिचंचा रायहाणी अणिंदा अपुराहिया यावि होत्था । तए णं ते बलिचंचारायहाणिवत्थव्वया बहवे असुरकुमारा देवा य देवीओ य तामलिं बालतवस्सिं ओहिणा आभोयंति, २ अन्नमन्नं सद्दवेंति, २ एवं वयासी— "एवं खलु देवाणुप्पिया ! बलिचंचा रायहाणी अणिंदा अपुरोहिया, अम्हे य णं देवाणुप्पिया ! इंदाधीणा इंदाधिट्टिया इंदाहीणकज्जा । अयं च णं देवाणुप्पिया ! तामली बालतवस्सी तामलितीए नगरीए बहिया उत्तरपुरत्थिमे दिसीभाए नियत्तणियमंडलं आलिहित्ता संलेहणाइूसणाइूसिए भत्त -पाणपडियाइक्खिए पाओवगमणं निवत्ते । तं सेयं खलु देवाणुप्पिया ! अम्हं तामलिं बालतवस्सिं बलिचंचाए रायहाणीए ठितिपकप्पं पकरावेत्तए' ति कट्टु अन्नमन्नस्स अंतिए एयमट्टं पंडिसुणेंति, २ बलिचंचाए रायहाणीए मज्झंमज्झेणं निग्गच्छंति, २ जेणेव रुयगिदे उप्पायपव्वए तेणेव उवागच्छंति, २ वेउव्वियसमुग्घाएणं समोहणंति जाव उत्तरवेउव्वियाइं रूवाइं विकुव्वंति, २ ताए उक्किट्टाए तुरियाए चवलाए चंडाए जइणाए छेयाए सीहाए सिग्घाए दिव्वाए उद्धुयाए देवगतीए तिरियमसंखिज्जाणं

दीव-समचद्दाणं मज्झमज्झेणं जेणेव जंबुद्वीवे दीवे जेणेव भारहे वासे जेणेव तामलिती नगरी जेणेव तामली मोरियपुत्ते तेणेव उवागच्छंति, २ ता तामलिस्स बालतवस्सिस्स उप्पिं सपक्खिं सपडिदिसिं ठिच्चा दिव्वं देविह्णिं दिव्वं देवज्जुतिं दिव्वं देवाणुभागं दिव्वं बत्तीसतिविहं नट्टविहं उवदंसेंति, २ तामलिं बालतवस्सिं तिक्खुत्तो आदाहिणं पदाहिणं करेति वंदंति नमंसंति, २ एवं वदासी— “एवं खलु देवाणुप्पिया ! अम्हे बलिचंचारायहाणीवत्थव्वया बहवे असुरकुमारा देवा य देवीओ य देवाणुप्पियं वंदामो नमंसामो जाव पज्जुवासामो । अम्हं णं देवाणुप्पिया ! बलिचंचा रायहाणी अणिंदा अपुराहिया, अम्हे य णं देवाणुप्पिया ! इंदाहीणा इंदाहिट्टिया इंदाहीणकज्जा, तं तुब्भे णं देवाणुप्पिया ! बलिचंचं रायहाणिं आढाह परियाणह सुमरह, अट्टं बंधह, णिदाणं पकरेह, ठित्तिपकप्पं पकरेह । तए णं तुब्भे कालमासे कालं किच्चा बलिचंचारायहाणीए उववज्जिस्सह तए णं तुब्भे अम्हं इंदा भविस्सह, तए णं तुब्भे अम्हेहिं सद्धिं दिव्वाइं भोगभोगाइं भुंजमाणा विहरिस्सह” । ४२. तए णं से तामली बालतवस्सी तेहिं बलिचंचारायहाणिवत्थव्वएहिं बहूहिं असुरकुमारेहिं देवेहिं य देवीहि य एवं वुत्ते समाणे एयमट्टं नो आढाइ, नो परियाणेइ, तुसिणीए संचिट्टइ । ४३. तए णं ते बलिचंचारायहाणिवत्थव्वया बहवे असुरकुमारा देवा य देवीओ य तामलिं मोरियपुत्तं दोच्चं पि तिक्खुत्तो आदाहिणप्पदाहिणं करेति, २ जाव अम्हं च णं देवाणुप्पिया ! बलिचंचा रायहाणी अणिंदा जाव ठित्तिकप्पं पकरेह, जाव दोच्चं पि तच्चं पि एवं वुत्ते समाणे जाव तुसिणीए संचिट्टइ । ४४. तए णं ते बलिचंचारायहाणिवत्थव्वया बहवे असुरकुमारा देवा य देवीओ य तामलिणा बालतवस्सिणा अणाढाइज्जमाणा अपरियाणिज्जमाणा जामेव दिसिं पादुब्भूया तामेव दिसिं पडिगया । [सु. ४५. तामलितवस्सिस्स ईसाणदेविंदत्तेण उववाओ] ४५. तेणं कालेणं तेणं समएणं ईसाणे कप्पे अणिदे अपुरोहिते यावि होत्था । तए णं से तामली बालतवस्सी रिसी बहुपडिपुण्णाइं सट्ठिं वाससहस्साइं परियाणं पाउणित्ता दोमासियाए संलेहणाए अत्ताणं झूसित्ता सवीसं भत्तसयं अणसणाए छेदित्ता कालमासे कालं किच्चा ईसाणे कप्पे ईसाणवडिंसए विमाणे उववातसभाए देवसयणिज्जंसि देवदूसंतरिते अंगुलस्स असंखेज्जभागमेत्तीए ओगाहणाए ईसाणदेविंदविरहकालसमयंसि ईसाणदेविंदत्ताए उववन्ने । तए णं से ईसाणे देविदे देवराया अहुणोववन्ने पंचविहाए पज्जत्तीए पज्जत्तीभावं गच्छति, तंजहा— आहारपज्जत्तीए जाव भासा-मणपज्जत्तीए । [सु. ४६-४९. बलिचंचावत्थव्वासुरकयतामलितावसमडयावहीलणवुत्तं -तसवणाणंतरं ईसाणिंदकओ बलिचंचादेवपरितावो ] ४६. तए णं बलिचंचारायहाणिवत्थव्वया बहवे असुरकुमारा देवा य देवीओ य तामलिं बालतवस्सिं कालगयं जाणित्ता ईसाणे य कप्पे देविंदत्ताए उववन्नं पासित्ता आसुरुता कुविया चंडिक्रिया मिसिमिसेमाणा बलिचंचाए रायहाणीए मज्झमज्झेणं निग्गच्छंति, २ ताए उक्किट्टाए जाव जेणेव भारहे वासे जेणेव तामलिती नयरी जेणेव तामलिस्स बालतवस्सिस्स सरीरए तेणेव उवागच्छंति, २ वामे पाए सुंबेणं बंधंति, २ तिक्खुत्तो मुहे उट्टुहंति, २ तामलितीए नगरीए सिंघाडग-तिग-चउक्क-चच्चर-चउम्मूह-महापह-पहेसु आकह्विकडिंड करेमाणा महया २ सट्ठेणं उग्घोसेमाणा २ एवं वदासि— ‘केस णं भो ! से तामली बालतवस्सी सयंगहियलिंगे पाणामाए पव्वज्जाइ पव्वइए ! केस णं से ईसाणे कप्पे ईसाणे देविदे देवराया’ इति कट्टु तामलिस्स बालतवस्सिस्स सरीरयं हीलंति निंदंति खिंसंति गरिहंति अवमन्नंति तज्जंति तालेति परिवहेति पव्वहेति आकह्विकडिंडं करेति, हीलेत्ता जाव आकह्विकडिंडं करेत्ता एगंते एडेति, २ जामेव दिसिं पाउब्भूया तामेव दिसिं पडिगया । ४७. तए णं ईसाणकप्पवासी बहवे वेमाणिया देवा य देवीओ य बलिचंचारायहाणिवत्थव्वएहिं बहूहिं असुरकुमारेहिं देवेहिं देवीहि य तामलिस्स बालतवस्सिस्स सरीरयं हीलिज्जमाणं निंदिज्जमाणं जाव आकह्विकडिंडं कीरमाणं पासंति, २ आसुरुत्ता जाव मिसिमिसेमाणा जेणेव ईसाणे देविदे देवराया तेणेव उवागच्छंति, २ करयलपरिग्गहियं दसनहं सिरसावत्तं मत्थए अंजलिं कट्टु जएणं विजएणं वद्धावेति, २ एवं वदासी -एवं खलु देवाणुप्पिया ! बलिचंचारायहाणिवत्थव्वया बहवे असुरकुमारा देवा य देवीओ य देवाणुप्पिए कालगए जाणित्ता ईसाणे य कप्पे इंदत्ताए उववन्ने पासेत्ता आसुरुत्ता जाव एगंते एडेति, २ जामेव दिसिं पाउब्भूया तामेव दिसिं पडिगया । ४८. तए णं से ईसाणे देविदे देवराया तेसिं ईसाणकप्पवासीणं बहूणं वेमाणियाणं देवाण य देवीण य अंतिए एयमट्टं सोच्चा निसम्म आसुरुत्ते जाव मिसिमिसेमाणे तत्थेव सयणिज्जवरगए तिवलियं भिउडिं निडाले साहट्टु बलिचंचं रायहाणिं अहे सपक्खिं सपडिदिसिं समभिलोएइ, तए णं सा बलिचंचा

रायहाणी ईसाणेणं देविदेणं देवरण्णा अहे सपक्खिं सपडिदिसिं समभिलोइया समाणी तेणं दिव्वप्पभावेणं इंगालब्भूया मुम्मुरब्भूया छारिब्भूया तत्तकवेल्लकब्भूया तत्ता समजोइब्भूया जाया यावि होत्था । ४९. तए णं ते बलिचंचारायहाणिवत्थव्वया बहवे असुरकुमारा देवा य देवीओ य तं बलिचंचं रायहाणिं इंगालब्भूयं जाव समजोतिब्भूयं पासंति, २ भीया तत्था तसिया उव्विग्गा संजायभया सव्वओ समंता आधावेति परिधावेति, २ अन्नमन्नस्स कायं समतुरंगेमाणा २ चिट्ठंति । [सु. ५०-५१. ईसाणिंदं पइ बलिचंचादेवाणं अवराहखामणं आणावसवट्ठितं च] ५०. तए णं ते बलिचंचारायहाणिवत्थव्वया बहवे असुरकुमारा देवा य देवीओ य ईसाणं देविंदं देवरायं परिकुवियं जाणित्ता ईसाणस्स देविंदस्स देवरण्णो तं दिव्वं देविह्ठिं दिव्वं देवज्जुतिं दिव्वं देवाणुभागं दिव्वं तेयलेस्सं असहमाणा सव्वे सपक्खि सपडिदिसिं ठिच्चा करयलपरिग्गहियं दसनहं सिरसावत्तं मत्थए अंजलिं कट्टु जएणं विजयेणं वद्धाविंति, २ एवं वयासी— अहो णं देवाणुप्पिएहिं दिव्वा देविह्ठी जाव अभिसमन्नागता, तं दिट्ठा णं देवाणुप्पियाणं दिव्वा देविह्ठी जाव लद्धा पत्ता अभिसमन्नागया । तं खामेमो णं देवाणुप्पिया !, खंमंतु णं देवाणुप्पिया !, खंतुमरिहंति णं देवाणुप्पिया !, णाइ भुज्जो एवंकरणयाए त्ति कट्टु एयमट्ठं सम्मं विणयेणं भुज्जो २ खामेति । ५१. तते णं से ईसाणे देविदे देवराया तेहिं बलिचंचारायहाणीवत्थव्वएहिं बहूहिं असुरकुमारेहिं देवेहिं देवीहि य एयमट्ठं सम्मं विणएणं भुज्जो २ खामिए समाणे तं दिव्वं देविह्ठिं जाव तेयलेस्सं पडिसाहरइ । तप्पभित्तिं च णं गोयमा ! ते बलिचंचारायहाणिवत्थव्वया बहवे असुरकुमारा देवा य देवीओ य ईसाणं देविंदं देवरायं आढंति जाव पज्जुवासंति, ईसाणस्स य देविंदस्स देवरण्णो आणा -उववाय -वयण -निद्देसे चिट्ठंति । [सु. ५२. ईसाणदेविंदेदेविह्ठिवत्तव्वयाए उवसंहारो] ५२. एवं खलु गोयमा ! ईसाणेणं देविदेणं देवरण्णा सा दिव्वा देविह्ठी जाव अभिसमन्नागया । [सु. ५३-५४. ईसाणिंदस्स ठिति -अणंतरभवपरूवणा ] ५३. ईसाणस्स णं भंते ! देविंदस्स देवरण्णो केवतियं कालं ठिती पण्णत्ता ? गोयमा ! सातिरेगाइं दो सागरोवमाइं ठिती पन्नत्ता । ५४. ईसाणे; णं भंते ! देविदे देवराया ताओ देवलोगाओ आउक्खएणं जाव कहिं गच्छिहिति ? कहिं उववज्जिहिति ? गोयमा ! महाविदेहे वासे सिज्झिहिति जाव अंतं काहिति । [सु. ५५-६१. सक्कीसाणाणं परोप्परं विमाणउच्चत्ताइ -पाउब्भव -पेच्छणा -संलाव -किच्चकरण -विवादनिवारणपरूवणा] ५५. (१) सक्कस्स णं भंते ! देविंदस्स देवरण्णो विमाणेहिंतो ईसाणस्स देविंदस्स देवरण्णो विमाणा ईसिं उच्चयरा चेव ईसिं उन्नयतरा चेव ? ईसाणस्स वा देविंदस्स देवरण्णो विमाणेहिंतो सक्कस्स देविंदस्स देवरण्णो विमाणा ईसिं नीययरा चेव ईसिं निणयरा चेव ? हंता, गोतमा ! सक्कस्स तं चेव सव्वं नेयव्वं । (२) से केणट्ठेणं ? गोयमा ! से जहानामए करतले सिया देसे उच्चे देसे उन्नये, देसे णीए देसे निण्णे, से तेणट्ठेणं । ५६. (१) पभू णं भंते ! सक्के देविदे देवराया ईसाणस्स देविंदस्स देवरण्णो अंतियं पाउब्भवित्तए ? हंता पभू । (२) से णं भंते ! किं आढामीणे पभू, अणाढामीणे पभू ? गोयमा ! आढामीणे पभू, नो अणाढामीणे पभू । ५७. (१) पभू णं भंते ! ईसाणे देविदे देवराया सक्कस्स देविंदस्स देवरण्णो अंतियं पाउब्भवित्तए ? हंता, पभू । (२) से भंते ! किं आढामीणे पभू, अणाढामीणे पभू ? गोयमा ! आढामीणे वि पभू, अणाढामीणे वि पभू । ५८. पभू णं भंते ! सक्के देविदे देवराया ईसाणं देविंदं देवरायं सपक्खिं सपडिदिसिं समभिलोएत्तए ? जहा पादुब्भवणा तहा दो वि आलवगा नेयव्वा । ५९. पभू णं भंते ! सक्के देविदे देवराया ईसाणेणं देविदेणं देवरण्णा सद्धिं आलावं वा संलावं वा करेत्तए ? हंता, पभू । जहा पादुब्भवणा । ६०. (१) अत्थि णं भंते ! तेसिं सक्कीसाणाणं देविंदाणं देवराईणं किच्चाइं करणिज्जाइं समुप्पज्जंति ? हंता, अत्थि । (२) से कहमिदाणिं पकरेति ? गोयमा ! ताहे चेव णं से सक्के देविदे देवराया ईसाणस्स देविंदस्स देवरण्णो अंतियं पाउब्भवति, ईसाणे णं देविदे देवराया सक्कस्स देविंदस्स देवरण्णो अंतियं पाउब्भवइ— ‘इति भो ! सक्का ! देविंदा ! देवराया ! दाहिणह्लुलोगाहिवती !’; ‘इति भो ! ईसाणा ! देविंदा ! देवराया ! उत्तरह्लुलोगाहिवती ! । ‘इति भो !, इति भो’त्ति ते अन्नमन्नस्स किच्चाइं करणिज्जाइं पच्चणुभवमाणा विहरंति । ६१. (१) अत्थि णं भंते ! तेसिं सक्कीसाणाणं देविंदाणं देवराईणं विवादा समुप्पज्जंति ? हंता, अत्थि । (२) से कहमिदाणिं पकरेति ? गोयमा ! ताहे चेव णं ते सक्कीसाणा देविंदा देवरायाणो सणंकुमारं देविंदं देवरायं मणसीकरेति । तए णं से सणंकुमारे देविदे देवराया तेहिं सक्कसाणेहिं देविदेहिं देवराईहिं मणसीकए समाणे खिप्पामेव सक्कीसाणाणं देविंदाणं देवराईणं अंतियं पादुब्भवति । जं से वदइ तस्स आणाउववाय -वयण -निद्देसे

चिद्वंति । [सु. ६२-६४. सणंकुमारदेविंदस्स भवसिद्धियत्ताइ- ठिति -अणंतरभवपरूवणा] ६२. (१) सणंकुमारे णं भंते ! देविदे देवराया किं भवसिद्धिए, अभवसिद्धिए ? सम्महिद्धी. मिच्छदिद्धी ? परित्तसंसारए, अणंतसंसारए ? सुलभबोहिए, दुलभबोहिए ? आराहए, विराहए ? चरिमे अचरिमे ? गोयमा ! सणंकुमारे णं देविदे देवराया भवसिद्धीए नो अभवसिद्धीए, एवं सम्महिद्धी परित्तसंसारए सुलभबोहिए आराहए चरिमे, पसत्थं नेयव्वं । (२) से केणट्टेणं भंते ! ? गोयमा ! सणंकुमारे देविदे देवराया बहूणं समणाणं बहूणं समणीणं बहूणं सावगाणं बहूणं साविगाणं हियकामए सुहकामए पत्थकामए आणुकंपिए निस्सेयसिए हिय -सुह -निस्सेसकामए, से तेणट्टेणं गोयमा ! सणंकुमारे णं भवसिद्धिए जाव नो अचरिमे । ६३. सणंकुमारस्स णं भंते ! देविंदस्स देवरण्णो केवतियं कालं ठिती पण्णत्ता ? गोयमा ! सत्त सागरोवमाणि ठिती पण्णत्ता । ६४. से णं भंते ! ताओ देवलोगातो आउक्खएणं जाव कहिं उववज्जिहिति ? गोयमा ! महाविदेहे वासे सिज्झिहिति जाव अंतं करेहिति । सेवं भंते ! २० । [सु. ६५. तइयसयपढमुद्देसस्स १६-६४ सुत्ताणं संगहणिगाहाओ ] ६५. गाहाओ— छट्टुट्टम मासो अब्बमासो वासाइं अट्ट छम्मासा । तीसग-कुरुदत्ताणं तव भत्तपरिण्ण परियाओ ॥१॥ उच्चत्त विमाणाणं पादुब्भव पेच्छणा य संलावे । किच्च विवादुप्पत्ती सणंकुमारे य भवियत्तं ॥२

**☆☆☆ मोया समत्ता । तइयसए पढमो उद्देसो समत्तो ॥३.१॥** ☆ ☆ ☆ बिइओ उद्देसओ 'चमरो' ☆☆☆[सु. १-२. उकुग्घाओ] १. तेणं कालेणं तेणं समएणं रायगिहे नामं नगरे होत्था जाव परिसा पज्जुवासइ । २. तेणं कालेणं तेणं समएणं चमरे असुरिदे असुरराया चमरचंचाए रायहाणीए सभाए सुहम्माए चमरंसि सीहासणंसि चउसट्टीए सामाणियसाहस्सीहिं जाव नट्टविहिं उवदंसेत्ता जामेव दिसिं पाउब्भूए तामेव दिसिं पडिगए । [सु. ३-४. असुरकुमारठाणपरूवणा] ३. (१) भंते ! त्ति भगवं गोयमे समणं भगवं महावीरं वंदति नमंसति, (२) एवं वदासी— अत्थि णं भंते ! इमीसे रयणप्पभाए पुढवीए अहे असुरकुमारा देवा परिवसंति ? गोयमा ! नो इणट्टे समट्टे । (२) एवं जाव अहेसत्तमाए पुढवीए, सोहम्मस्स कप्पस्स अहे जाव अत्थि णं भंते ! ईसिपब्भाराए पुढवीए अहे असुरकुमारा देवा परिवसंति ? णो इणट्टे समट्टे । ४. से कहिं खाइं णं भंते ! असुरकुमारा देवा परिवसंति ? गोयमा ! इमीसे रयणप्पभाए पुढवीए असीउत्तरजोयणसतसहस्सबाहल्लाए, एवं असुरकुमारदेववत्तव्वया जाव दिव्वाइं भोगभोगाइं भुंजमाणा विहरंति । [सु. ५-७. असुरकुमाराणं अहोणइविसयपरूवणा] ५. अत्थि णं भंते ! असुरकुमाराणं देवाणं अहे गतिविसए प० ? हंता, अत्थि । ६. केवतिए च णं भंते ! असुरकुमाराणं देवाणं अहेगतिविसए पण्णत्ते ? गोयमा ! जाव अहेसत्तमाए पुढवीए, तच्चं पुण पुढविं गता य, गमिस्संति य । ७. किंपत्तियं णं भंते ! असुरकुमारा देवा तच्चं पुढविं गता य, गमिस्संति य ? गोयमा ! पुव्वेयस्स वा वेदणउदीरणयाए, पुव्वसंगतियस्स वा वेदणउवसामणयाए । एवं खलु असुरकुमारा देवा तच्चं पुढविं गता य, गमिस्संति य । [सु. ८-१०. असुरकुमाराणं तिरियगइविसयपरूवणा] ८. अत्थि णं भंते ! असुरकुमाराणं देवाणं तिरियं गतिविसए पण्णत्ते ? हंता, अत्थि । ९. केवतियं ज णं भंते ! असुरकुमाराणं देवाणं तिरियं गतिविसए पण्णत्ते ? गोयमा ! जाव असंखेज्जा दीव -समुद्दा, नंदिस्सरवरं पुण दीवं गता य, गमिस्संति य । १०. किंपत्तियं णं भंते ! असुरकुमारा देवा नंदीसरवरदीवं गता य, गमिस्संति य ? गोयमा ! जे इमे अरिहंता भगवंता एतेसिं णं जम्मणमहेसु वा निक्खमणमहेसु वा णाणुप्पत्तिमहिमासु वा परिनिव्वाणमहिमासु वा एवं खलु असुरकुमारा देवा नंदीसरवरं दीवं गता य, गमिस्संति य । [सु. ११-१३. असुरकुमाराणं उट्टगइविसयपरूवणा] ११. अत्थि णं भंते ! असुरकुमाराणं देवाणं उट्टं गतिविसए प० ? हंता, अत्थि । १२. केवतियं च णं भंते ! असुरकुमाराणं देवाणं उट्टं गतिविसए ? गोयमा ! जाव अच्चुतो कप्पो । सोहम्मं पुण कप्पं गता य, गमिस्संति य । १३. (१) किं पतियं णं भंते ! असुरकुमारा देवा सोहम्मं कप्पं गता य, गमिस्संति य ? गोयमा ! तेसिं णं देवाणं भवपच्चइयवेराणुबंधे । ते णं देवा विकुव्वेमाणा परियारेमाणा वा आयरक्खे देवे वित्तासेंति । अहालहुस्सगाइं रयणाइं गहाय आयाए एणंतमंतं अवक्कमंति । (२) अत्थि णं भंते ! तेसिं देवाणं अहालहुस्सगाइं रयणाइं ? हंता, अत्थि । (३) से कहमिदाणिं पकरेंति ? तओ से पच्छा कायं पव्वहंति । (४) पभू णं भंते ! ते असुरकुमारा देवा तत्थगया चेव समाणा ताहिं अच्छराहिं सद्धिं दिव्वाइं भोगभोगाइं

भुंजमाणा विहरित्तए ? णो इणट्टे समट्टे, ते णं तओ पडिनियत्तंति, तओ पडिनियत्तित्ता इहमागच्छंति, २ जति णं ताओ अच्छराओ आढायंति परियाणंति, पभू णं ते असुरकुमारा देवा ताहिं अच्छराहिं सद्धिं दिव्वाइं भोगभोगाइं भुंजमाणा विहरित्तए, अह णं ताओ अच्छराओ नो आढायंति नो परियाणंति णो णं पभू ते असुरकुमारा देवा ताहिं अच्छराहिं सद्धिं दिव्वाइं भोगभोगाइं भुंजमाणा विहरित्तए । (५) एवं खलु गोयमा ! असुरकुमारा देवा सोहम्मं कप्पं गता य, गमिस्संति य । [सु. १४-१६. असुरकुमाराणं सोहम्मकप्पगमणकालंतर - निस्साइपरूवणा ] १४. केवतिकालस्स णं भंते ! असुरकुमारा देवा उट्ठं उप्पयंति जाव सोहम्मं कप्पं गया य, गमिस्संति य ? गोयमा ! अणंताहिं ओसप्पिणीहिं अणंताहिं उस्सप्पिणीहिं समतिकंताहिं, अत्थि णं एस भावे लोयच्छेरयभूए समुप्पज्जइ— जं णं असुरकुमारा देवा उट्ठं उप्पयंति जाव सोहम्मो कप्पो । १५. किंनिस्साए णं भंते ! असुरकुमारा देवा उट्ठं उप्पयंति जाव सोहम्मो कप्पो ? से जहानामए इह सबरा इ वा बब्बरा इ वा टंकणा इ वा चुच्चुया इ वा पल्हया इ वा पुलिंदा इ वा एगं महं गड्डं वा दुग्गं वा दरिं वा विसमं वा पव्वतं वा णीसाए सुमहल्लमवि आसबलं वा हत्थिबलं वा जोहबलं वा धणुबलं वा आगलेंति, एवामेव असुरकुमारा वि देवा, णऽन्नत्थ अरहंते वा, अरहंतचेइयाणि वा, अणगारे वा भावियप्पणो निस्साए उट्ठं उप्पयंति जाव सोहम्मो कप्पो । १६. सव्वे वि णं भंते ! असुरकुमारा देवा उट्ठं उप्पयंति जाव सोहम्मो कप्पो ? गोयमा ! णो इणट्टे समट्टे, महिद्धिया णं असुरकुमारा देवा उट्ठं उप्पयंति जाव सोहम्मो कप्पो । [सु. १७-१८. चमरस्स उट्ठाहोगमणपरूवणा ] १७. एस वि य णं भंते ! चमरे असुरिदे असुरकुमारया उट्ठं उप्पतियपुव्वे जाव सोहम्मो कप्पो ? हंता, गोयमा ! एस वि य णं चमरे असुरिदे असुरराया उट्ठं उप्पतियपुव्वे जाव सोहम्मो कप्पो । १८. अहे णं भंते ! चमरे असुरिदे असुरकुमारया महिद्धीए महज्जुतीए जाव कहिं पविट्ठा ? कूडागारसालादिट्ठंतो भाणियव्वो । [सु. १९-४३. चमरिंदस्स पुव्वभवुत्तंतो ] १९-२१. पूरणस्स तवस्सिस्स दाणामापव्वज्जागहणं अणसणं च १९. चमरेणं भंते ! असुरिदेणं असुररण्णा सा दिव्वा देविट्ठी तं चेव किणा लद्धा पत्ता अभिसमन्नागया ? एवं खलु गोयमा ! — तेणं कालेणं तेणं समएणं इहेव जंबुद्धीवे २ भारहे वासे विंझगिरिपायमूले बेभेले नामं सन्निवेसे होत्था । वण्णओ । तत्थ णं बेभेले सन्निवेसे पूरणे नामं गाहावती परिवसति अट्ठे दित्ते जहा तामलिस्स (उ. १. सु. ३५-३७) वत्तव्वया तहा नेतव्वा, नवरं चउप्पुडयं दारुमयं पडिग्गहं करेत्ता जाव विपुलं असण-पाण-खाइम-साइमं जाव सयमेव चउप्पुडयं दारुमयं पडिग्गहयं गहाय मुंडे भवित्ता दाणामाए पव्वज्जाए पव्वइत्तए । २०. पव्वइए वि य णं समाणे तं चेव, जाव आयावणभूमीओ पच्चोरुभइ पच्चोरुभित्ता सयमेव चउप्पुडयं दारुमयं पडिग्गहयं गहाय बेभेले सन्निवेसे उच्च-नीय-मज्झिमाइं कुलाइं घरसमुदाणस्स भिक्खायरियाए अडेत्ता 'जं मे पढमे पुडये पडइ कप्पइ मे तं पंथियपहियाणं दलइत्तए, जं मे दोच्चे पुडए पडए कप्पइ मे तं काक-सुणयाणं दलइत्तए, जं मे तच्चे पुडए पडइ कप्पइ मे तं मच्छ-कच्छभाणं दलइत्तए, जं मे चउत्थे पुडए पडइ कप्पइ मे तं अप्पणा आहारं आहारित्तए' त्ति कट्ठु एवं संपेहेइ, २ कल्लं पाउप्पभायाए रयणीए तं चेव निरवसेसं जाव जं से चउत्थे पुडए पडइ तं अप्पणा आहारं आहारेइ । २१. तए णं से पूरणे बालतवस्सी तेणं ओरालेणं विउलेणं पयत्तेणं पग्गहिणं बालतवोकम्मेणं तं चेव जाव बेभेलस्स सन्निवेसस्स मज्झंमज्झेणं निग्गच्छति, २ पाउय-कुंडियमादीयं उवकरणं चउप्पुडयं च दारुमयं पडिग्गहयं एगंतमंते एडेइ, २ बेभेलस्स सन्निवेसस्स दाहिणपुरत्थिमे दिसीभागे अब्दनियत्तणियमंडलं आलिहित्ता संलेहणाइसुणाइसिए भत्त-पाणपडियाइक्खिए पाओवगमणं निवण्णे । [सु. २२. भगवओ महावीरस्स सुंसुमारपुरावत्थाणं] २२. तेणं कालेणं तेणं समएणं अहं गोयमा ! छउमत्थकालियाए एक्कारसवासपरियाए छट्ठंछट्ठेणं अनिक्खित्तेणं तवोकम्मेणं संजमेणं तवसा अप्पाणं भावेमाणे पुव्वाणुपुव्विं चरमाणे गामाणुगामं दूइज्जमाणे जेणेव सुसुमारपुरे नगरे जेणेव असोगवणसंडे उज्जाणे जेणेव असोगवरपायवे जेणेव पुढविसिलावट्टए तेणेव उवागच्छामि, २ असोगवरपायवस्स हेट्ठा पुढविसिलावट्टयंसि अट्टमभत्तं पगिण्हामि, दो वि पाए साहट्टु वग्घारियपाणी एगपोग्गलनिविट्टदिट्ठी अणिमिसनयणे ईसिपब्भारगएणं काएणं अहापणिहिएहिं गत्तेहिं सव्विंदिएहिं गुत्तेहिं एगरातियं महापडिमं उवसंपज्जित्ताणं विहरामि । [ सु. २३-२७. पूरणस्स तवस्सिस्स चमरिंदत्तेण उववायाणंतरं सोहम्मिंदं पइ कोवो ] २३. तेणं कालेणं तेणं समएणं चमरचंचा रायहाणी अणिंदा अपुरोहिया याऽवि होत्था । तए णं से पूरणे बालतवस्सी बहुपडिपुण्णाइं दुवालस वासाइं परियाणं पाउणित्ता

मासियाए संलेहणाए अत्ताणं झूसेत्ता सट्टिं भत्ताइं अणसणाए छेदेत्ता कालमासे कालं किच्चा चमरचंचाए रायहाणीए उववायसभाए जाव इंदत्ताए उववन्ने । २४. तए णं से चमरे असुरिदे असुरराया अहुणोववन्ने पंचविहाए पज्जतीए पज्जतीभावं गच्छइ, तं जहा— आहारपज्जतीए जाव भास-मणपज्जतीए । २५. तए णं से चमरे असुरिदे असुरराया पंचविहाए पज्जतीए पज्जतीभावं गए समाणे उहं वीससाए ओहिणा आभोएइ जाव सोहम्मो कप्पो । पासइ य तत्थ सक्कं देविदं देवरायं मघवं पागसासणं सत्तक्कतु सहस्सक्खं वज्जपाणिं पुरंदरं जाव दस दिसाओ उज्जोवेमाणं पभासेमाणं । सोहम्मो कप्पो सोहम्मवडेंसए विमाणे सभाए सुहम्माए सक्कंसि सीहासणंसि जाव दिव्वाइं भोगभोगाइं भुंजमाणं पासइ, २ इमेयारूवे अज्झत्थिए चिंतिए पत्थिए मणोगए संकप्पे समुप्पज्जित्था— केस णं एस अपत्थियपत्थए दुरंतपंतलक्खणे हिरि - सिरिपरिवज्जिए हीणपुण्णचाउद्दसे जे णं ममं इमाए एयारूवाए दिव्वाए देविह्ठीए जाव दिव्वे देवाणुभावे लद्धे पत्ते जाव अभिसमन्नागए उप्पिं अप्पुस्सुए दिव्वाइं भोगभोगाइं भुंजमाणे विहरइ ? एवं संपेहेइ, २ सामाणियपरिसोववन्नए देवे सद्दावेइ, २ एवं वयासी— केस णं एस देवाणुप्पिया ! अपत्थियपत्थए जाव भुंजमाणे विहरइ ? २६. तए णं ते सामाणियपरिसोववन्नगा देवा चमरेणं असुरिदेणं असुररण्णा एवं वुत्ता समाणा हट्टतुट्टा० जाव हयहियया करयलपरिग्गहियं दसनहं सिरसावत्तं मत्थए अंजलिं कट्टु जयेणं विजयेणं वद्धावेत्ति, २ एवं वयासी— एस णं देवाणुप्पिया ! सक्के देविदे देवराया जाव विहरइ । २७. तए णं से चमरे असुरिदे असुरराया तेसिं सामाणियपरिसोववन्नगाणं देवाणं अंतिए एयमट्टं सोच्चा निसम्म आसुरूत्ते रुट्टे कुविए चंडिक्किए मिसिमिसेमाणे ते सामाणियपरिसोववन्नए देवे एवं वयासी ‘अन्ने खलु भो ! से सक्के देविदे देवराया, अन्ने खलु भो ! से चमरे असुरिदे असुरराया, महिह्ठीए खलु से सक्के देविदे देवराया, अप्पिह्ठीए खलु भो ! से चमरे असुरिदे असुरराया । तं इच्छामि णं देवाणुप्पिया ! सक्कं देविदं देवरायं सयमेव अच्चासादेत्तए’ त्ति कट्टु उसिणे उसिणब्भूए याऽवि होत्था । [सु. २८. भगवओ नीसाए चमरकयं सोहम्मिंदावमाणं] २८. तए णं से चमरे असुरिदे असुरराया ओहिं पउंजइ, २ ममं ओहिणा आभोएइ, २ इमेयारूवे अज्झत्थिए जाव समुप्पज्जित्था— ‘एवं खलु समणे भगवं महावीरे जंबुद्वीवे दीवे भारहे वासे सुंसुमारपुरे नगरे असोगवणसंडे उज्जाणे असोगवरपायवस्स अहे पुढविसिलावट्टयंसि अट्टमभत्तं पगिण्हित्ता एगराइयं महापडिमं उवसंपज्जित्ताणं विहरति । तं सेयं खलु मे समणं भगवं महावीरं नीसाए सक्कं देविदं देवरायं सयमेव अच्चासादेत्तए’ त्ति कट्टु एवं संपेहेइ, २ सयणिज्जाओ अब्भुट्टेइ, २ ता देवदूसं परिहेइ, २ उववायसभाए पुरत्थिमिल्लेणं दारेणं णिग्गच्छइ, २ जेणेव सभा सुहम्मा, जेणेव चोप्पाले पहरणकोसे तेणेव उवागच्छइ, २ ता फलिहरयणं परामुसइ, २ एगे अब्बिए फलिहरयणमायाए महया अमरिसं वहमाणे चमरचंचाए रायहाणीए मज्झंमज्झेणं निग्गच्छइ, २ जेणेव तिगिंछिकूडे उप्पायपव्वए तेणेव उवागच्छइ, २ ता वेउव्वियसमुग्घाएणं समोहण्णइ, २ ता संखेज्जाइं जोयणाइं जाव उत्तरवेउव्वियं रूवं विकुव्वइ, २ ता ताए उक्किट्टाए जाव जेणेव पुढविसिलावट्टए जेणेव ममं अंतिए तेणेव उवागच्छति, २ ममं तिकखुत्तो आदाहिणपदाहिणं करेति, २ जाव नमंसित्ता एवं वयासी ‘इच्छामि णं भंते ! तुब्भं नीसाए सक्कं देविदं देवरायं सयमेव अच्चासादेत्तए’ त्ति कट्टु उत्तरपुरत्थिमं दिसिभागं अवक्कमइ, २ वेउव्वियसमुग्घातेणं समोहण्णइ, २ जाव दोच्चं पि वेउव्वियसमुग्घातेणं समोहण्णइ, २ एणं महं घोरं घोरागारं भीमं भीमागारं भासरं भयाणीयं गंभीरं उत्तासणयं कालङ्करत्त- मासरासिसंकासं जोयणसयसाहस्सीयं महाबोदिं विउव्वइ, २ अप्पोडेइ, २ वग्गइ, २ गज्जइ, २ हयहेसियं करेइ, २ हत्थिगुलुगुलाइयं करेइ, २ रहघणघणाइयं करेइ, २ पायदहरणं करेइ, २ भूमिचवेडयं दलयइ, २ सीहाणादं नदइ, २ उच्छोलेति, २ पच्छोलेति, २ तिवइं छिंदइ, २ वामं भुयं ऊसवेइ, २ दाहिणहत्थपदेसिणीए य अंगुट्टनहेणं य वितिरिच्छं मुहं विडंबेइ, २ महया २ सद्देणं कलकलरवं करेइ, एगे अब्बितिए फलिहरयणमायाए उहं वेहासं उप्पतिए, खोभंते चेव अहेलोयं, कंपेमाणे व मेइणितलं, साकट्टंते व तिरियलोयं, फोडेमाणे व अंबरतलं, कत्थइ गज्जंते, कत्थइ विज्जुयायंते, कत्थइ वासं वासमाणे, कत्थइ रयुग्घायं पकरेमाणे, कत्थइ तमुक्कायं पकरेमाणे, वाणमंतरे देवे वित्तासेमाणे २, जोइसिए देवे दुहा विभयमाणे २, आयरक्खे देवे विपलायमाणे २, फलिहरयणं अंबरतलंसि वियट्टमाणे २, विउब्भावेमाणे २ ताए उक्किट्टाए जाव तिरियमसंखेज्जाणं दीव- समुद्दाणं मज्झंमज्झेणं वीथीवयमाणे २, जेणेव सोहम्मो कप्पो, जेणेव सोहम्मवडेंसए विमाणे, जेणेव सभा सुधम्मा तेणेव

उवागच्छइ, २ एगं पायं पउमवरवेइयाए करेइ, एगं पायं सभाए सुहम्माए करेइ, फलिहरयणेणं महया २ सहेणं तिक्खुत्तो (१) इंदकीलं आउडेति, २ एवं वयासी-  
‘कहिं णं भो ! सक्के देविदे देवराया ? असुरिंदस्स असुररणो वहाए वज्जे निसट्ठे । तए णं मे इमेयारूवे अज्झत्थिए कहिं णं ताओ चउरासीइं सामाणियसाहस्सीओ ? जाव  
कहिं णं ताओ चत्तारि चउरासीईओ आयरक्खदेवसाहस्सीओ ? कहिं णं ताओ अणेगाओ अच्छराकोडीओ ? अज्ज हणामि, अज्ज महेमि, अज्ज वहेमि, अज्ज ममं  
अवसाओ अच्छराओ वसमुवणमंतु’ त्ति कट्ठु तं अणिट्ठं अकंतं अप्पियं असुभं अमणुणं अमणामं फरुसं गिरं निसिरइ । [२९-३०. सोहग्गिंदनिसट्ठवज्जभीयस्स  
चमरस्स भगवओ पायावलंबणं] २९. तए णं से सक्के देविदे देवराया तं अणिट्ठं जाव अमणामं अस्सुयपुव्वं फरुसं गिरं सोच्चा निसम्म आसुरुते जाव मिसिमिसेमाणे  
तिवलियं भिउडिं निडाले साहट्ठु चमरं असुरिंदं असुररायं एवं वदासी— ‘हं भो ! चमरा ! असुरिंदा ! असुरराया ! अपत्थियपत्थया ! जाव हीणपुण्णचाउद्दसा !  
अज्जं न भवसि, नाहि ते सुहमत्थि’ त्ति कट्ठु तत्थेव सीहासणवरगते वज्जं परामुसइ, २ तं जलंतं फुडंतं तडतडंतं उक्कासहस्साइं विणिम्मयमाणं २, जालासहस्साइं  
पमुंचमाणं २, इंगालसहस्साइं पविक्रिखरमाणं २, फुलिंगजालामालासहस्सेहिं चक्खुविक्रखेव- दिट्ठिपडिघातं पि पकरेमाणं हुतवहअतिरेगतेयदिप्पंतं जइणवेगं  
फुल्लकिंसुयसमाणं महब्भयं भयकरं चमरस्स असुरिंदस्स असुररणो वहाए वज्जं निसिरइ । ३०. तते णं से चमरे असुरिदे असुरराया त जलंतं जाव भयकरं  
वज्जमभिमुहं आवयमाणं पासइ, पासित्ता झियाति पिहाइ, पिहाइ झियाइ, झियायित्ता पिहायित्ता तहेव संभग्गमउडविडवे सालंबहत्थाभरणे उड्ढंपाए अहोसिरे  
कक्खागयसेयं पिवं विणिम्मयमाणे २ ताए उक्किट्ठाए जाव तिरियमसंखेज्जाणं दीव-समुद्दाणं मज्झंमज्झेणं वीतीवयमाणे २ जेणेव जंबुदीवे दीवे जाव जेणेव  
असोगवरपायवे जेणेव ममं अंतिए तेणेव उवागच्छइ, २ ता भीए भयगग्गरसरे ‘भगवं सरणं’ इति बुयमाणे ममं दोण्ह वि पायाणं अंतरंसि इति वेगेणं समोवतिते ।  
[सु. ३१-३२. भगवओ पसायाओ सक्ककोवोवसमो चमरनिब्भयत्तं च] ३१. तए णं तस्स सक्कस्स देविंदस्स देवरणो इमेयारूवे अज्झत्थिए जाव समुप्पज्जित्था  
‘नो खलु पभू चमरे असुरिदे असुरराया, नो खलु समत्थे चमरे असुरिदे असुरराया, नो खलु विसए चमरस्स असुरिंदस्स असुररणो अप्पणो निस्साए उड्ढं  
उप्पत्तित्ता जाव सोहम्मो कप्पो, णऽन्नत्थ अरहंते वा, अरहंतचेइयाणि वा, अणगारे वा भावियप्पणो नीसाए उड्ढं उप्पयति जाव सोहम्मो कप्पो । तं महादुक्खं खलु  
तहारूवाणं अरहंताणं भगवंताणं अणगाराण य अच्चासायणाए’ त्ति कट्ठु ओहिं पजुंजति, २ ममं ओहिणा आभोएति, २ ‘हा ! हा ! अहो ! हतो अहमंसि’ त्ति कट्ठु ताए  
उक्किट्ठाए जाव दिव्वाए देवगतीए वज्जस्स वीहिं अणुगच्छमाणे २ तिरियमसंखेज्जाणं दीव-समुद्दाणं मज्झंमज्झेणं जाव जेणेव असोगवरपादवे जेणेव ममं अंतिए  
तेणेव उवागच्छइ, २ ममं चउरंगुलसंपत्तं वज्जं पडिसाहरइ । अवियाऽऽइं मे गोतमा ! मुट्ठिवातेणं केसग्गे वीइत्था । ३२. तए णं से सक्के देविदे देवराया वज्जं  
पडिसाहरति, पडिसाहरित्ता ममं तिक्खुत्तो आदाहिणपदाहिणं करेइ, २ वंदइ नमंसइ, २ एवं वयासी—“एवं खलु भंते ! अहं तुब्भं नीसाए चमरेणं असुरिदेणं  
असुररणो सयमेव अच्चासाइए । तए णं मए परिकुविणं समाणेणं चमरस्स असुरिंदस्स असुररणो वहाए वज्जे निसट्ठे । तए णं मे इमेयारूवे अज्झत्थिए जाव  
समुप्पज्जित्था-नो खलु पभू चमरे असुरिदे असुरराया तहेव जाव ओहिं पउंजामि, देवाणुप्पिए ओहिणा आभोएमि, ‘हा ! हा ! अहो ! हतो मी’ ति कट्ठु ताए उक्किट्ठाए जाव  
जेणेव देवाणुप्पिए तेणेव उवागच्छामि, देवाणुप्पियाणं चउरंगुलमसंपत्तं वज्जं पडिसाहरामि, वज्जपडिसाहरणट्ठाए णं इहमागए, इह समोसडे, इह संपत्ते, इहेव अज्ज  
उवसंपत्तित्ताणं विहरामि । तं खामेमि णं देवाणुप्पिया !, खमंतु णं देवाणुप्पिया !, खमितुमरहंति णं देवाणुप्पिया ! णाइ भुज्जो एवं पकरणताए” त्ति कट्ठु ममं वंदइ  
नमंसइ, २ उत्तरपुरत्थिमं दिसीभागं अवक्कमइ, २ वामेणं पादेणं तिक्खुत्तो भूमिं दलेइ, २ चमरं असुरिंदं असुररायं एवं वदासी“मुक्को सि णं भो ! चमरा ! असुरिंदा !  
असुरराया ! समणस्स भगवओ महावीरस्स पभावेणं, नाहि ते दाणिं ममाओ भयमत्थि’ त्ति कट्ठु जामेव दिसिं पाउब्भूए तामेव दिसिं पडिगए । [सु. ३३.  
महिट्ठियदेवखित्तपोग्गलगहणपरूवणा ] ३३. (१) भंते ! त्ति भगवं गोयमे समणं भगवं महावीरं वंदति०, २ एवं वदासि देवे णं भंते ! महिट्ठीए महज्जुतीए जाव महाणुभागे  
पुव्वामेव पोग्गलं खिवित्ता पभू तमेव अणुपरियट्ठित्ताणं गिण्हित्तए ? हंता, पभू । २ से केणट्ठेणं भंते ! जाव गिण्हित्तए ? गोयमा ! पोग्गले णं खित्ते समाणे पुव्वामेव सिग्घगती

भवित्ता ततो पच्छा मंदगती भवति, देवे णं महिद्धीए पुब्बिं पि य पच्छा वि सीहे सीहगती चेव, तुरिते तुरितगती चेव । से तेणट्टेणं जाव पभू गेण्हित्तए । [सु. ३४. सक्क - वज्ज - असुरकुमारदेवाणं उह्वाहोगइवेगपरूवणा] ३४. जति णं भंते ! देवे महिद्धीए जाव अणुपरियट्टित्ताणं गेण्हित्तए । कम्हा णं भंते ! सक्केणं देविदेणं देवरण्णा चमरे असुरिदे असुरराया नो संचाइए साहत्थिं गेण्हित्तए ? गोयमा ! असुरकुमाराणं देवाणं अहेगतिविसए सीहे सीहे चेव, तुरिते तुरिते चेव । उह्वाहंगतिविसए अप्पे अप्पे चेव, मंदे मंदे चेव । वेमाणियाणं देवाणं उह्वाहंगतिविसए सीहे सीहे चेव, तुरिते तुरिते चेव । अहेगतिविसए अप्पे अप्पे चेव, मंदे मंदे चेव । जावतियं खेत्तं सक्के देविदे देवराया उह्वा उप्पतति एक्केणं समएणं तं वज्जे दोहिं, जं वज्जे दोहिं तं चमरे तीहिं; सव्वत्थोवे सक्कस्स देविंदस्स देवरण्णो उह्वालोकंडए, अहेलोकंडए संखेज्जगुणे । जावतियं खेत्तं चमरे असुरिदे असुरराया अहे ओवयति एक्केणं समएणं तं सक्के दोहिं, जं सक्के दोहिं तं वज्जे तीहिं, सव्वत्थोवे चमरस्स असुरिंदस्स असुररण्णो अहेलोकंडए, उह्वालोकंडए संखेज्जगुणे । एवं खलु गोयमा ! सक्केणं देविदेणं देवरण्णा चमरे असुरिदे असुरराया नो संचाइए साहत्थिं गेण्हित्तए । [सु. ३५-३७. सक्क-चमर-वज्जदेवाणं गइखेत्तं उप्पाबहुयं] ३५. सक्कस्स णं भंते ! देविंदस्स देवरण्णो उह्वा अहे तिरियं च गतिविसयस्स कतरे कतरेहिंतो अप्पे वा, बहुए वा, तुल्ले वा, विसेसाहिए वा ? गोयमा ! सव्वत्थोवं खेत्तं सक्के देविदे देवराया अहे ओवयइ एक्केणं समएणं, तिरियं संखेज्जे भागे गच्छइ, उह्वा संखेज्जे भागे गच्छइ । ३६. चमरस्स णं भंते ! असुरिंदस्स असुररण्णो उह्वा अहे तिरियं च गतिविसयस्स कतरे कतरेहिंतो अप्पे वा, बहुए वा, तुल्ले वा, विसेसाहिए वा ? गोयमा ! सव्वत्थोवं खेत्तं चमरे असुरिदे असुरराया उह्वा उप्पयति एक्केणं समएणं, तिरियं संखेज्जे भागे गच्छइ, अहे संखेज्जे भागे गच्छइ । ३७. वज्जं जहा सक्कस्स देविंदस्स तहेव, नवरं विसेसाहियं कायवं । [सु. ३८-४०. सक्क-चमर -वज्जदेवाणं गइकालउप्पाबहुयं ] ३८. सक्कस्स णं भंते ! देविंदस्स देवरण्णो ओवयणकालस्स य उप्पयणकालस्स य कतरे कतरेहिंतो अप्पे वा, बहुए वा, तुल्ले वा, विसेसाहिए वा ? गोयमा ! सव्वत्थोवे सक्कस्स देविंदस्स देवरण्णो उप्पयणकाले, ओवयणकाले संखेज्जगुणे । ३९. चमरस्स वि जहा सक्कस्स, णवरं सव्वत्थोवे ओवयणकाले, उप्पयणकाले संखेज्जगुणे । ४०. वज्जस्स पुच्छा । गोयमा ! सव्वत्थोवे उप्पयणकाले, ओवयणकाले विसेसाहिए । [सु. ४१. सक्क -चमर- वज्जदेवाणं परोप्परं गइकालउप्पाबहुयं] ४१. एयस्स णं भंते ! वज्जस्स, वज्जाहिवतिस्स, चमरस्स य असुरिंदस्स असुररण्णो ओवयणकालस्स य उप्पयणकालस्स य कयरे कयरेहिंतो अप्पे वा ४ ? गोयमा ! सक्कस्स य उप्पयणकाले चमरस्स य ओवणकाले, एते णं बिण्णि वि तुल्ला सव्वत्थोवा । सक्कस्स य ओवयणकाले वज्जस्स य उप्पयणकाले, एस णं दोण्ह वि तुल्ले संखेज्जगुणे । चमरस्स य उप्पयणकाले वज्जस्स य ओवयणकाले, एस णं दोण्ह वि तुल्ले विसेसाहिए । [सु. ४२-४३. सक्ककयावमाणणापचइयखेयकहणाणंतरं णियसामाणियदेवेहिं सद्धिं चमरकयं भगवओ वंदणा-पज्जुवासणाइ] ४२. तए णं से चमरे असुरिदे असुरराया वज्जभयविप्पमुक्के सक्केणं देविदेणं देवरण्णा महया अवमाणेणं अवमाणिते समाणे चमरचंचाए रायहाणीए सभाए सुहम्माए चमरंसि सीहासणंसि ओहतमणसंकप्पे चिंतासोकसागरसंपविट्ठे करतलपलहत्थमुहे अट्टज्झाणोवगते भूमिगतदिट्ठीए झियाति । ४३. तते णं तं चमरं असुरिंदं असुररायं सामाणियपरिसोववन्नया देवा ओहयमणसंकप्पं जाव झियायमाणं पासंति, २ करतल जाव एवं वयासि— किं णं देवाणुप्पिया ओहयमणसंकप्पा जाव झियायंति ? तए णं से चमरे असुरिदे असुरराया ते सामाणियपरिसोववन्नए देवे एवं वयासी—‘एवं खलु देवाणुप्पिया ! मए समणं भगवं महावीरं नीसाए कट्टु सक्के देविदे देवराया सयमेव अच्छासादिए । तए णं तेणं परिकुवितेणं समाणेणं ममं वहाए वज्जे निसिट्ठे । तं भदं णं भवतु देवाणुप्पिया ! समणस्स भगवओ महावीरस्स जस्स म्हि पभावेण अकिट्ठेअव्वहिए अपरिताविए इहमागते, इह समोसढे, इह संपत्ते, इहेव अज्जं उवसंपज्जित्ताणं विहरामि । तं गच्छामो णं देवाणुप्पिया ! समणं भगवं महावीरं वंदामो णमंसामो जाव पज्जुवासामो’ त्ति कट्टु चउसट्ठीए सामाणियसाहस्सीहिं जाव सव्विद्धीए जाव जेणेव असोगवरपादवे जेणेव ममं अंतिए तेणेव उवागच्छइ, २ ममं तिरुत्ते आदाहिणपदाहिणं जाव नमंसिता एवं वदासि—‘एवं खलु भंते ! मए तुब्भं नीसाए सक्के देविदे देवराया सयमेव अच्छासादिए जाव तं भदं णं भवतु देवाणुप्पियाणं जस्स म्हि पभावेणं अक्किट्ठे जाव विहरामि । तं खामेमि णं देवाणुप्पिया !’ जाव उत्तरपुरत्थिमं दिसीभागं अवक्कमइ, २ ता जाव बत्तीसइबद्धं नट्टविहिं उवदसेइ, २ जामेव

दिसिं पादुबभूए तामेव दिसिं पडिगते । [सु. ४४. चमरस्स ठिति-भवंतरसिद्धिपरूवण] ४४. एवं खलु गोयमा ! चमरेणं असुरिदेण असुररणा सा दिव्वा देविही लद्धा पत्ता जाव अभिसमन्नागया । ठिती सागरोवमं । महाविदेहे वासे सिज्झिहिति जाव अंतं काहिति । [सु. ४५. असुराणं सोहम्मदेवलयगमणविसए कारणंतरपरूवणं] ४५. किं पत्तियं णं भंते ! असुरकुमारा देवा उड्ढं उप्पयंति जाव सोहम्मो कप्पो ? गोयमा ! तेसिं णं देवाणं अहुणोववन्नगाण वा चरिमभवत्थाण वा इमेयारूवे अज्झत्थिए जाव समुप्पज्जति—अहो ! णं अम्हेहिं दिव्वा देविही लद्धा पत्ता जाव अभिसमन्नागया । जारिसिया णं अम्हेहिं दिव्वा देविही जाव अभिसमन्नागया तारिसिया णं सक्केणं देविदेणं देवरणा देव्वा देविही जाव अभिसमन्नागया, जारिसिया णं सक्केणं देविदेणं देवरणा जाव अभिसमन्नागया तारिसिया णं अम्हेहिं वि जाव अभिसमन्नागया । तं गच्छामो णं सक्कस्स देविंदस्स देवरणो अंतियं पातुबभवामो, पासामो ता सक्कस्स देविंदस्स देवरणो दिव्वं देविहिं जाव अभिसमन्नागयं, पासतु ताव अम्ह वि सक्के देविदे देवराया दिव्वं देविहिं जाव अभिसमन्नागयं, तं जाणामो ताव सक्कस्स देविंदस्स देवरणो दिव्वं देविहिं जाव अभिसमन्नागयं, जाणउ ताव अम्ह वि सक्के देविदे देवराया दिव्वं देविहिं जाव अभिसमन्नागयं । एवं खलु गोयमा ! असुरकुमारा देवा उड्ढं उप्पयंति जाव सोहम्मो कप्पो । सेवं भंते ! सेवं भंते ! त्ति० । **☆☆☆चमरो समत्तो ॥३.२॥ ☆☆☆ तइओ उद्देसओ 'किरिया' ☆☆☆** [सु. १-७. मंडियपुत्तपण्हत्तरे काइयाइपंचविहकिरियाभेय-पभेयपरूवणं] १. तेणं कालेणं तेणं समएणं रायगिहे नामं नगरे होत्था जाव परिसा पडिगया । तेणं कालेणं तेणं समएणं जाव अंतेवासी मंडियपुत्ते णामं अणगारे पगतिभद्दए जाव पज्जुवासमाणे एवं वदासी— २. कति णं भंते ! किरियाओ पण्णत्ताओ ? मंडियपुत्ता ! पंच किरियाओ पण्णत्ताओ, तं जहा— काइया अहिगरणिया पाओसिया पारियावणिया पाणातिवातकिरिया । ३. काइया णं भंते ! किरिया कतिविहा पण्णत्ता ? मंडियपुत्ता ! दुविहा पण्णत्ता, तं जहा— अणुवरयकायकिरिया य दुप्पउत्तकायकिरिया य । ४. अधिगरणिया णं भंते ! किरिया कतिविहा पण्णत्ता ? मंडियपुत्ता ! दुविहा पण्णत्ता, तं जहा— संजोयणाहिगरणकिरिया य निव्वत्तणाहिगरणकिरिया य । ५. पादोसिया णं भंते ! किरिया कतिविहा पण्णत्ता ? मंडियपुत्ता ! दुविहा पण्णत्ता, तं जहा— जीवपादोसिया य अजीवापदोसिया य । ६. पारित्तावणिया णं भंते ! किरिया कइविहा पण्णत्ता ? मंडियपुत्ता ! दुविहा पण्णत्ता, तं जहा— सहत्थपारितावणिया य परहत्थपारितावणिया य । ७. पाणातिवातकिरिया णं भंते ! पुच्छा । मंडियपुत्ता ! दुविहा पण्णत्ता, तं जहा— सहत्थपाणातिवातकिरिया य परहत्थपाणातिवातकिरिया य । [सु. ८. कम्म-वेयणाणं पुव्व-पच्छाभावित्तपरूवणा] ८. पुव्विं भंते ! किरिया पच्छा वेदणा ? पुव्विं वेदणा पच्छा किरिया ? मंडियपुत्ता ! पुव्विं किरिया, पच्छा वेदणा; णो पुव्विं वेदणा, पच्छा किरिया । [सु. ९-१०. समणं पडुच्च किरियासामित्तपरूवणं] ९. अत्थि णं भंते ! समणाणं निग्गंथाणं किरिया कज्जइ ? हंता, अत्थि । १०. कहं णं भंते ! समणाणं निग्गंथाणं किरिया कज्जइ ? मंडियपुत्ता ! पमायपच्चया जोगनिमित्तं च, एवं खलु समणाणं निग्गंथाणं किरिया कज्जति । [सु. ११-१४. सकिरिय-अकिरियजीवाणं अंतकिरियानत्थित्त-अत्थित्तपरूवणं अकिरियजीवंतकिरियासमत्थगा तणहत्थय-उदगबिंदु-नावादिट्टंता य ११. जीवे णं भंते ! सया समियं एयति वेयति चलति फंदइ घट्टइ खुब्भइ उदीरति तं तं भावं परिणमति ? हंता, मंडियपुत्ता ! जीवे णं सया समितं एयति जाव तं तं भाव परिणमति । १२. (१) जाव च णं भंते ! से जीवे सया समितं जाव परिणमति तावं च णं तस्स जीवस्स अंते अंतकिरिया भवति ? णो इणट्टे समट्टे । (२) से केणट्टेणं भंते ! एवं वुच्चइ— जावं च णं जीवे सदा समितं जाव अंते अंतकिरिया न भवति ? मंडियपुत्ता ! जावं च णं से जीवे सया समितं जाव परिणमति तावं च णं से जीवे आरभति सारभति समारभति, आरंभे वट्टति, सारंभे वट्टति, समारंभे वट्टति, आरभमाणे सारभमाणे समारभमाणे आरंभे वट्टमाणे, सारंभे वट्टमाणे, समारंभे वट्टमाणे बहूणं पाणाणं भूताणं जीवाणं सत्ताणं दुक्खावणताए सोयावणताए जूरावणताए तिप्पावणताए पिट्टावणताए परिताणवताए वट्टति, से तेणट्टेणं मंडियपुत्ता ! एवं वुच्चति-जावं च णं से जीवे सया समितं एयति जाव परिणमति तावं च णं तस्स जीवस्स अंते अंतकिरिया न भवति । १३. जीवे णं भंते ! सया समियं नो एयति जाव नो तं तं भावं परिणमति ? हंता, मंडियपुत्ता ! जीवे णं सया समियं जाव नो परिणमति । १४. (१) जावं च णं भंते ! से जीवे नो एयति जाव नो तं तं भावं परिणमति तावं च णं तस्स जीवस्स अंते

अंतकिरिया भवति ? हंता, जाव भवति । (२ से केणट्टेणं भंते ! जाव भवति ? मंडियपुत्ता ! जावं च णं से जीवे सया समियं णो एयति जाव णो परिणमइ तावं च णं से जीवे नो आरभति, नो सारभति, नो समारभति, नो आरंभे वट्टइ, णो सारंभे वट्टइ, णो समारंभे वट्टइ, अणारभमाणे असारभमाणे असमारभमाणे, आरंभे अवट्टमाणे, सारंभे अवट्टमाणे, समारंभे अवट्टमाणे बहूणं पाणाणं ४ अदुक्खावणयाए जाव अपरियावणयाए वट्टइ । (३) से जहानामए केइ पुरिसे सुक्कं तणहत्थयं जाततेयंसि पक्खिवेज्जा, से नूणं मंडियपुत्ता ! से सुक्के तणहत्थए जायतेयंसि पक्खित्ते समाणे खिप्पामेव मसमसाविज्जइ ? हंता, मसमसाविज्जइ । (४) से जहानामए केइ पुरिसे तत्तंसि अयकवल्लंसि उदयबिंदुं पक्खिवेज्जा, से नूणं मंडियपुत्ता ! से उदयबिंदू तत्तंसि अयकवल्लंसि पक्खित्ते समाणे खिप्पामेव विद्धंसमागच्छइ ? हंता, विद्धंसमागच्छइ । ५ से जहानामए हरए सिया पुण्णे पुण्णप्पमाणे वोलट्टमाणे वोसट्टमाणे समभरघडत्ताए चिट्ठति ? हंता चिट्ठति । अहे णं केइ पुरिसे तंसि हरयंसि एगं महं नावं सतासवं सयच्छिद्धं ओगाहेज्जा, से नूणं मंडियपुत्ता ! सा नावा तेहिं आसवद्वारेहिं आपूरेमाणी २ पुण्णा पुण्णप्पमाणा वोलट्टमाणा वोसट्टमाणा समभरघडत्ताए चिट्ठति १ हंता, चिट्ठति । अहे णं केइ पुरिसे तीसे नावाए सव्वतो समंता आसवद्वाराइं पिहेइ, २ नावाउस्सिंचणएणं उदयं उस्सिंचिज्जा, से नूणं मंडियपुत्ता ! सा नावा तंसि उदयंसि उस्सित्तंसि समाणंसि खिप्पामेव उद्धं उद्दाति ? हंता, उद्दाति । एवामेव मंडियपुत्ता ! अत्तत्तासंबुडस्स अणगारस्स, इरियासमियस्स जाव गुत्तबंभयारिस्स, आउत्तं गच्छमाणस्स चिट्टमाणस्स निसीयमाणस्स तुयट्टमाणस्स, आउत्तं वत्थ-पडिग्गह -कंबल-पादपुंछणं गेण्हमाणस्स निक्खिवमाणस्स जाव चक्खुपम्हनिवायमवि वेमाया सुहुमा इरियावहिया किरिया कज्जइ । सा पढमसमयबद्धपुट्टा बितियसमयवेतिता ततियसमयनिज्जरिया, सा बद्धा पुट्टा उदीरिया वेदिया निज्जिण्णा सेयकाले अकम्मं चावि भवति । से तेणट्टेणं मंडियपुत्ता ! एवं वुच्चति- जावं च णं से जीवे सया समितं नो एयति जाव अंते अंतकिरिया भवति । [सु. १५. पमत्तसंजयपमत्तसंजमकालपरूवणं ] १५. पमत्तसंजयस्स णं भंते ! पमत्तसंजमे वट्टमाणस्स सव्वा वि य णं पमत्तद्धा कालतो केवच्चिरं होति ? मंडियपुत्ता ! एगजीवं पडुच्च जहन्नेणं एक्कं समयं उक्कोसेणं देसूणा पुव्वकोडी । णाणाजीवे पडुच्च सव्वद्धा । [सु. १६. अप्पमत्तसंजयअप्पमत्तसंजमकालपरूवणं ] १६. अप्पमत्तसंजयस्स णं भंते ! अप्पमत्तसंजमे वट्टमाणस्स सव्वा वि य णं अप्पमत्तद्धा कालतो केवच्चिरं होति ? मंडियपुत्ता ! एगजीवं पडुच्च जहन्नेणं अंतोमुहुत्तं, उक्कोसेणं पुव्वकोडी देसूणा । णाणाजीवे पडुच्च सव्वद्धं । सेवं भंते ! २ त्ति भगवं मंडियपचत्ते अणगारे समणं भगवं महावीरं वंदइ नमंसइ, २ संजमेणं तवसा अप्पाणं भावेमाणे विहरइ । [सु. १७. गोयमपणहुत्तरे सव्वद्धाभाविभावंतरपरूवणाए लवणसमुद्धत्तव्वयानिद्देशो ] १७. 'भंते !' त्ति भगवं गोतमे समणं भगवं महावीरं वंदइ नमंसइ, २ त्ता एवं वदासि— कम्हा णं भंते ! लवणसमुद्धे चाउद्दस -उद्धमुद्धिपुण्णमासिणीसु अतिरेयं वद्धति वा हायति वा ? लवणसमुद्धत्तव्वया नेयव्वा जाव लोयट्ठिती । जाव लोयाणुभावे । सेवं भंते ! एवं भंते ! त्ति जाव विहरति । ☆☆☆ किरिया समत्ता॥ ततियस्स सयस्स तइओ ॥३.३॥ ☆ ☆ ☆ चउत्थो उद्देशओ 'जाणं' ☆ ☆ ☆ [सु. १-५. भावियप्पमणगारं पडुच्च कयउत्तरवेउव्वियसरीरदेव-देवी-जाणा-इजाणण-पासणपरूवणं, रुक्ख-मूलाइअंतो-बाहिपासणपरूवणं च] १. अणगारे णं भंते ! भावियप्पा देवं वेउव्वियसमुग्घाएणं समोहयं जाणरूवेणं जायमाणं जाणइ पासइ ? गोयमा ! अत्थेगइए देवं पासइ, णो जाणं पासइ १, अत्थेगइए जाणं पासइ, नो देवं पासइ २; अत्थेगइए देवं पि पासइ, जाणं पि पासइ ३; अत्थेगइए नो देवं पासइ, नो जाणं पासइ ४ । २. अणगारे णं भंते ! भावियप्पा देविं वेउव्वियसमुग्घाएणं समोहयं जाणरूवेणं जायमाणं जाणइ पासइ ? गोयमा ! एवं चेव । ३. अणगारे णं भंते ! भावियप्पा देवं सदेवीयं वेउव्वियसमुग्घाएणं समोहयं जाणरूवेणं जायमाणं जाणइ पासइ ? गोयमा ! अत्थेगइए देवं सदेवीयं पासइ, नो जाणं पासइ । एएणं अभिलावेणं चत्तारि भंगा । ४. (१) अणगारे णं भंते ! भावियप्पा रुक्खस्स किं अंतो पासइ, बाहिं पासइ ? चउभंगो । २ एवं किं मूलं पासइ, कंदं पा० ? चउभंगो । मूलं पा० खंघं पा० ? चउभंगो । (३) एवं मूलेणं बीजं संजोएयव्वं । एवं कंदेण वि समं संजोएयव्वं जाव बीयं । एवं जाव पुफ्फेण समं बीयं संजोएयव्वं । ५. अणगारे णं भंते ! भावियप्पा रुक्खस्स किं फलं पा० बीयं पा० ? चउभंगो । [सु. ६-७. वाउकायस्स इत्थि -पुरिसाइरूवविउव्वणापडिसेहपुव्वयं पडागासंठियरूवविउव्वणापरूवणाइ ] ६. पभू णं भंते !

वाउकाए एगं महं इत्थिरूवं वा पुरिसरूवं वा हत्थिरूवं वा जाणरूवं वा एवं जुग्ग-गिल्लि -थिल्लि -सीय -संदमाणियरूवं वा विउव्वित्तए ? गोयमा ! णो इमट्ठे समट्ठे । वाउक्काए णं विकुव्वमाणे एगं महं पडागासंठियं रूवं विकुव्वइ । ७. (१) पभू णं भंते ! वाउकाए एगं महं पडागासंठियं रूवं विउव्वित्ता अणेगाइं जोयणाइं गमित्तए ? हंता, पभू । (२) से भंते ! किं आयट्ठीए गच्छइ, परिट्ठीए गच्छइ ? गोयमा ! आतट्ठीए गच्छइ, णो परिट्ठीए गच्छइ । (३) जहा आयट्ठीए एवं चेव आयकम्मुणा वि, आयप्पओगेण वि भाणियव्वं । (४) से भंते ! किं ऊसिओदयं गच्छइ, पतोदयं गुच्छई ? गोयमा ! ऊसिओदयं पि गच्छइ, पतोदयं पि गच्छइ । (५) से भंते ! किं एगओपडागं गच्छइ, दुहओपडागं गच्छइ ? गोयमा ! एगओपडागं गच्छइ, नो दुहओपडागं गच्छइ । (६) से णं भंते ! किं वाउकाए पडागा ? गोयमा ! वाउकाए णं से, नो खलु सा पडागा । सु. ८-११. बलाहगस्स इत्थिपभिइपरिणामणाइपणवणं ८. पभू णं भंते ! बलाहगे एगं महं इत्थिरूवं वा जाव संदमाणियरूवं वा परिणामेत्तए ? हंता पभू । ९. (१) पभू णं भंते ! बलाहए एगं महं इत्थिरूवं परिणामेत्ता अणेगाइं जोयणाइं गमित्तए ? हंता, पभू । (२) से भंते ! किं आयट्ठीए गच्छइ, परिट्ठीए गच्छइ ? गोयमा ! नो आतिट्ठीए गच्छति, परिट्ठीए गच्छइ । (३) एवं नो आयकम्मुणा, परकम्मुणा । नो आयपयोगेणं, परप्पयोगेणं । (४) ऊसितोदयं वा गच्छइ पतोदयं वा गच्छइ । १०. से भंते ! किं बलाहए इत्थी ? गोयमा ! बलाहए णं से, णो खलु सा इत्थी । एवं पुरिसे, आसे, हत्थी । ११. (१) पभू णं भंते ! बलाहए एगं महं जाणरूवं परिणामेत्ता अणेगाइं जोयणाइं गमित्तए जहा इत्थिरूवं तहा भाणियव्वं । णवरं एगओचक्कवालं पि, दुहओचक्कवालं पि भाणियव्वं । (२) जुग्ग-गिल्लि-थिल्लि-सीया संदमाणियाणं तहेव । [सु. १२-१४. चउवीसदंडयउववज्जमाणजीवलेसापरूवणा ] १२. जीवे णं भंते ! जे भविए नेरइएसु उववज्जित्तए से णं भंते ! किंलेसेसु उववज्जति ? गोयमा ! जल्लेसाइं दव्वाइं परियाइत्ता कालं करेइ तल्लेसेसु उववज्जइ, तं०— कणहलेसेसु वा नीललेसेसु वा काउलेसेसु वा । १३. एवं जस्स जा लेस्सा सा तस्स भाणियव्वा जाव जीवे णं भंते ! जे भविए जोतिसिएसु उववज्जित्तए० पुच्छा । गोयमा ! जल्लेसाइं दव्वाइं परियाइत्ता कालं करेइ तल्लेसेसु उववज्जइ, तं०— तेउलेस्सेसु । १४. जीवे णं भंते ! जे भविए वेमाणिएसु उववज्जित्तए से णं भंते ! किंलेस्सेसु उववज्जइ ? गोयमा ! जल्लेसाइं दव्वाइं परियाइत्ता कालं करेइ तल्लेसेसु उववज्जइ, तं०— तेउलेस्सेसु वा पम्हलेसेसु वा । [ सु. १५-१९. भावियप्पमणगारं पडुच्च वेभारपव्वयाणुल्लंघण-उल्लंघण-परूवणा रूवविउव्वणपरूवणाइ य ] १५. अणगारे णं भंते ! भावियप्पा बाहिरए पोग्गले अपरियाइत्ता पभू वेभारं पव्वयं उल्लंघेत्तए पलंघेत्तए वा ? गोयमा ! णो इणट्ठे समट्ठे । १६. अणगारे णं भंते ! भावियप्पा बाहिरए पोग्गले परियाइत्ता पभू वेभारं पव्वयं उल्लंघेत्तए वा ? हंता, पभू । १७. अणगारे णं भंते ! भावियप्पा बाहिरए पोग्गले अपरियाइत्ता जावइयाइं रायगिहे नगरे रूवाइं एवइयाइं विकुव्वित्ता वेभारं पव्वयं अंतो अणुप्पविसित्ता पभू समं वा विसमं करेत्तए, विसमं वा समं करेत्तए ? गोयमा ! णो इणट्ठे समट्ठे । १८. एवं चेव बितिओ वि आलावगो ; णवरं परियात्तित्ता पभू । १९. (१) से भंते ! किं मायी विकुव्वति, अमायी विकुव्वइ ? गोयमा ! मायी विकुव्वइ, नो अमाई विकुव्वति । (२) से केणट्ठेणं भंते ! एवं वुच्चइ जाव नो अमायी विकुव्वइ ? गोयमा ! मायी णं पणीयं पाण-भोयणं भोच्चा वामेति, तस्स णं तेणं पणीएणं पाणभोयणेणं अट्ठि-अट्ठिमिंजा बहलीभवति, पयणुए मंस -सोणिए भवति, जे वि य से अहाबादरा पोग्गला ते वि य से परिणमंति, तं जहा— सोतिंदियत्ताए जाव फासिंदियत्ताए, अट्ठि-अट्ठिमिंज-केस-मंसु-रोम-नहत्ताए सुक्कत्ताए सोणियत्ताए । अमायी णं लूहं पाण-भोयणं भोच्चा भोच्चा णो वामेइ, तस्स णं तेणं लहेणं पाण-भोयणेणं अट्ठि-अट्ठिमिंजा० पतणूभवति, बहले मंस-सोणिए, जे वि य से अहाबादरा पोग्गला ते वि य से परिणमंति; तं जहा— उच्चारत्ताए पासवणत्ताए जाव सोणियत्ताए । से तेणट्ठेणं जाव नो अमायी विकुव्वइ । (३) मायी णं तस्स ठाणस्स अणालोइयपडिक्कंते कालं करेइ नत्थि तस्स आराहणा । (४) अमायी णं तस्स ठाणस्स आलोइयपडिक्कंते कालं करेइ अत्थि तस्स आराहणा । सेवं भंते ! सेवं भंते ! त्ति० । ★ ★ ★तइयसए चउत्थो उद्देसो समत्तो ॥३.४॥ ★ ★ ★

**पंचमो उद्देसओ 'इत्थी' अहवा 'अणगारविकुव्वणा' ★★ ★ [सु. १-१५. भावियप्पमणगारं पडुच्च इत्थिरूव-असि-पडागा -जण्णोवइत-पल्हत्थिय -**

पलियंक -आसइरूवविउव्वणापणवणादि] १. अणगारे णं भंते ! भावियप्पा बाहिए पोग्गले अपरियाइत्ता पभू एगं महं इत्थिरूवं वा जाव संदमाणियरूवं वा विकुव्वित्तए ? णो इ० । २. अणगारे णं भंते ! भावियप्पा बाहिए पोग्गले परियाइत्ता पभू एगं महं इत्थिरूवं वा जाव संदमाणियरूवं वा विकुव्वित्तए ? हंता, पभू । ३. (१) अणगारे णं भंते ! भावियप्पा केवतियाइं पभू इत्थिरूवाइं विकुव्वित्तए ? गोयमा ! से जहानामए जुवइ जुवाणे हत्थेणं हत्थंसि गेणहेज्जा, चक्कस्स वा नाभी अरगाउत्ता सिया एवामेव अणगारे वि भावियप्पा वेउव्वियसमुग्घाएणं समोहणइ जाव पभू णं गोयमा ! अणगारे णं भावियप्पा केवलकप्पं जंबुद्धीवं दीवं बहूहिं इत्थिरूवेहिं आइणं वित्तिकिणं जाव एस णं गोयमा ! अणगारस्स भावियप्पणो अयमेयारूवे विसए विसयमेत्ते बुइए, नो चेव णं संपत्तीए विकुव्विसु वा ३ । (२) एवं परिवाडीए नेयवं जाव संदमाणिया । ४. से जहानामए केइ पुरिसे असिचम्मपायं गहाय गच्छेज्जा एवामेव अणगारे णं भावियप्पा असिचम्मपायहत्थकिच्चगएणं अप्पाणेणं उहं वेहासं उप्पइज्जा ? हंता, उप्पइज्जा । ५. अणगारे णं भंते ! भावियप्पा केवतियाइं पभू असिचम्मपायहत्थकिच्चगयाइं रूवाइं विउव्वित्तए ? गोयमा ! से जहानामए जुवति जुवाणे हत्थेणं हत्थे गेणहेज्जा तं चेव जाव विउव्विसु वा ३ । ६. से जहानामए केइ पुरिसे एगओपडागं काउं गच्छेज्जा, एवामेव अणगारे वि भावियप्पा एगओपडागहत्थकिच्चगएणं अप्पाणेणं उहं वेहासं उप्पतेज्जा ? हंता, गोयमा ! उप्पतेज्जा । ७. (१) अणगारे णं भंते ! भावियप्पा केवतियाइं पभू एगओपडागहत्थकिच्चगयाइं रूवाइं विकुव्वित्तए ? एवं चेव जाव विकुव्विसु वा ३ । (२) एवं दुहओपडागं पि । ८. से जहानामए केइ पुरिसे एगओजणोवइतं काउं गच्छेज्जा, एवामेव अणगारे वि भा० एगओजणोवइतकिच्चगएणं अप्पाणेणं उहं वेहासं उप्पतेज्जा ? हंता, उप्पतेज्जा । ९. (१) अणगारे णं भंते ! भावियप्पा केवतियाइं पभू एगतोजणोवतितकिच्चगयाइं रूवाइं विकुव्वित्तए ? तं चेव जाव विकुव्विसु वा ३ । (२) एवं दुहओजणोवइयं पि । १०. (१) से जहानामए केइ पुरिसे एगओपलहत्थियं काउं चिट्ठेज्जा एवामेव अणगारे वि भावियप्पा ? तं चेव जाव विकुव्विसु वा ३ । (२) एवं दुहओपलहत्थियं पि । ११. (१) से जहानामए केयि पुरिसे एगओपलियकं काउं चिट्ठेज्जा० ? तं चेव जाव विकुव्विसु वा ३ । (२) एवं दुहओपलियकं पि । १२. अणगारे णं भंते ! भावियप्पा बाहिए पोग्गले अपरियाइत्ता पभू एगं महं आसरूवं वा हत्थिरूवं वा सीह-वग्घ-वग-दीविय-अच्छ-तरच्छ-परासररूवं वा अभिजुंजित्तए ? णो इणट्ठे समट्ठे, अणगारे णं एवं बाहिए पोग्गले परियाइत्ता पभू । १३. (१) अणगारे णं भंते ! भावियप्पा एगं महं आसरूवं वा अभिजुंजित्तए ? पभू अणेगाइं जोयणाइं गमित्तए ? हंता, पभू । (२) से भंते ! किं आयड्डीए गच्छति, परिड्डीए गच्छति ? गोयमा ! आयड्डीए गच्छइ, नो परिड्डीए गच्छइ । (३) एवं आयकम्मणा, नो परकम्मणा । आयप्पयोगेणं, नो परप्पयोगेणं । (४) उस्सिओदगं वा गच्छइ पतोदगं वा गच्छइ । १४. (१) से णं भंते ! किं अणगारे आसे ? गोयमा ! अणगारे णं से, नो खलु से आसे । (२) एवं जाव परासररूवं वा । १५. (१) से भंते ! किं मायी विकुव्वति ? अमायी विकुव्वति गोयमा ! मायी विकुव्वति, नो अमायी विकुव्वति । (२) माई णं तस्स ठाणस्स अणालोइयपडिक्कंते कालं करेइ अन्नयरेसु आभिओगिएसु देवलोगेसु देवत्ताए उववज्जइ । (३) अमाई णं तस्स ठाणस्स आलोइयपडिक्कंते कालं करेइ अन्नयरेसु अणाभिओगिएसु देवलोगेसु देवत्ताए उववज्जइ । सेवं भंते २ त्ति० । [ सु. १६. पंचमुद्देसउत्थाहिगारसंगहणीगाहा ] १६. गाहा— इत्थी असी पडागा जणोवइते य होइ बोद्धवे । पलहत्थिय पलियंके अभियोगविकुव्वणा मायी ॥१॥

☆☆☆ तइए सए पंचमो उद्देसो समत्तो ॥३.५॥ ☆☆☆ छट्ठो उद्देसओ

‘नगर’ अहवा ‘अणगारवीरियलद्धी’

☆☆☆

[सु. १-५. भावियप्पणो मिच्छद्विट्ठिस्सउणगारस्स वीरियाइलद्धिप्पभावओ नगरंतररूवजाणणा-

पासणापरूवणा] १. अणगारे णं भंते ! भावियप्पा मायी मिच्छद्विट्ठी वीरियलद्धीए वेउव्वियलद्धीए विभंगनाणलद्धीए वाणारसिं नगरिं समोहए, समोहणित्ता रायगिहे नगरे रूवाइं जाणति पासति ? हंता, जाणइ पासइ । २. (१) से भंते ! किं तहाभावं जाणइ पासइ ? अन्नहाभावं जाणइ पासइ ? गोयमा ! णो तहाभावं जाणइ पासइ, अणहाभावं जाणइ पासइ । (२) से केणट्ठेणं भंते ! एवं वुच्चइ ‘नो तहाभावं जाणइ पासइ, अन्नहाभावं जाणइ पासइ ?’ । गोयमा ! तस्स णं एवं

भवति— एवं खलु अहं रायगिहे नगरे समोहए, समोहणित्ता वाणारसीए नगरीए रूवाइं जाणामि पासामि, से से दंसणे विवच्चासे भवति, से तेणट्टेणं जाव पासति । ३. अणगारे णं भंते ! भावियप्पा मायी मिच्छद्विटी जाव रायगिहे नगरे समोहए, समोहणित्ता वाणारसीए नगरीए रूवाइं जाणइ पासइ ? हंता, जाणइ पासइ । तं चेव जाव तस्स णं एवं होइ— एवं खलु अहं वाणारसीए नगरीए समोहए, २ रायगिहे नगरे रूवाइं जाणामि पासामि, से से दंसणे विवच्चासे भवति, से तेणट्टेणं जाव अन्नहाभावं जाणइ पासइ । ४. अणगारे णं भंते ! भावियप्पा मायी मिच्छद्विटी वीरियलद्धीए वेउव्वियलद्धीए विभंगणाणलद्धीए वाणारसिं नगरिं रायगिहं च नगरं अंतरा य एगं महं जणवयवग्गं समोहए, २ वाणारसिं नगरिं रायगिहं च नगरं तं च अंतरा एगं महं जणवयवग्गं जाणति पासति ? हंता, जाणति पासति । ५. (१) से भंते ! किं तहाभावं जाणइ पासइ ? अन्नहाभावं जाणइ पासइ ? गोयमा ! णो तहाभावं जाणति पासइ, अन्नहाभावं जाणइ पासइ । (२) से केणट्टेणं जाव पासइ ? गोयमा ! तस्स खलु एवं भवति -एस खलु वाणारसी नगरी, एस खलु रायगिहे नगरे, एस खलु अंतरा एगे महं जणवयवग्गे, नो खलु एस महं वीरियलद्धी वेउव्वियलद्धी विभंगणाणलद्धी इट्ठी जुती जसे बले वीरिए पुरिसक्कारपरक्कमे लद्धे पत्ते अभिसमन्नागए, से से दंसणे विवच्चासे भवति, से तेणट्टेणं जाव पासति । [सु. ६ - १०. भावियप्पणो सम्मद्विट्ठिस्सऽणगारस्स वीरियाइलद्धिप्पभावओ नगरंतररूवजाणणा -पासणापरूवणा]

६. अणगारे णं भंते ! भावियप्पा अमायी सम्मद्विट्ठी वीरियलद्धीए वेउव्वियलद्धीए ओहिनाणलद्धीए रायगिहे नगरे समोहए, २ वाणारसीए नगरीए रूवाइं जाणइ पासइ ? हंता । ७. (१) से भंते ! किं तहाभावं जाणइ पासइ ? अन्नहाभावं जाणति पासति ? गोयमा ! तहाभावं जाणति पासति, नो अन्नहाभावं जाणति पासति । (२) से केणट्टेणं भंते ! एवं वुच्चइ ? गोयमा ! तस्स णं एवं भवति— एवं खलु अहं रायगिहे नगरे समोहए, समोहणित्ता वाणारसीए नगरीए रूवाइं जाणामि पासामि, से से दंसणे अविवच्चासे भवति, से तेणट्टेणं गोयमा ! एवं वुच्चति । ८. बीओ वि आलावगो एवं चेव, नवरं वाणारसीए नगरीए समोहणावेयव्वो, रायगिहे नगरे रूवाइं जाणइ पासइ । ९. अणगारे णं भंते ! भावियप्पा अमायी सम्मद्विट्ठी वीरियलद्धीए वेउव्वियलद्धीए ओहिनाणलद्धीए रायगिहं नगरं वाणारसिं च नगरिं अंतरा य एगं महं जणवयवग्गं समोहए, (२) रायगिहं नगरं वाणारसिं च नगरिं तं च अंतरा एगं महं जणवयवग्गं जाणइ पासइ ? हंता, जाणइ पासइ । १०. (१) से भंते ! किं तहाभावं जाणइ पासइ ? अन्नहाभावं जाणइ पासइ ? गोयमा ! तहाभावं जाणइ पासइ, णो अन्नहाभावं जाणइ पासइ । (२) से केणट्टेणं ? गोयमा ! तस्स णं एवं भवति— नो खलु एस रायगिहे नगरे, णो खलु एस वाणारसी नगरी, नो खलु एस अंतरा एगे जणवयवग्गे, एस खलु ममं वीरियलद्धी वेउव्वियलद्धी ओहिनाणलद्धी इट्ठी जुती जसे बले वीरिए पुरिसक्कारपरक्कमे लद्धे पत्ते अभिसमन्नागए, से से दंसणे अविवच्चासे भवति, से तेणट्टेणं गोयमा ! एवं वुच्चति— तहाभावं जाणति पासति, नो अन्नहाभावं जाणति पासति । [सु. ११-१३. भावियप्पमणगारं पडुच्च नगराइरूवविउव्वणापरूवणा]

११. अणगारे णं भंते ! भावियप्पा बाहिरए पोग्गले अपरियाइत्ता पभू एगं महं गामरूवं वा नगरूवं वा जाव सन्निवेसरूवं वा विकुव्वित्तए ? णो इणट्टे समट्टे । १२. एवं बित्तिओ वि आलावगो, णवरं बाहिरए पोग्गले परियादित्ता पभू । १३. अणगारे णं भंते ! भावियप्पा केवतियाइं पभू गामरूवाइं विकुव्वित्तए ? गोयमा ! से जहानामए जुवति जुवाणे हत्थेणं हत्थे गेणहेज्जा तं चेव जाव विकुव्विंसु वा ३ । एवं जाव सन्निवेसरूवं वा । [सु. १४-१५. चमराईणं इंदाणं आयरक्खदेवसंखापरूवणा]

१४. चमरस्स णं भंते ! असुरिंदस्स असुररण्णो कति आयरक्खदेवसाहस्सीओ पण्णत्ताओ ? गोयमा ! चत्तारि चउसट्ठीओ आयरक्खदेवसाहस्सीओ पण्णत्ताओ । ते णं आयरक्खा० वण्णओ जहा रायप्पसेणइज्जे । १५. एवं सव्वेसिं इंदाणं जस्स जत्तिया आयरक्खा ते भाणियव्वा । सेवं भंते ! सेवं भंते ! त्ति० । ।☆☆☆ तइयसए छट्ठो उद्देसो समत्तो ॥३.६॥ ☆☆☆ सत्तमो उद्देसओ 'लोगपाला' ☆☆☆ [सु. १. सत्तमुद्देसुवुग्घाओ ] १. रायगिहे नगरे जाव पज्जुवासमाणे एवं वयासी— सु. २-३. सक्कस्स लोगपाल-तव्विमाणनामाइं २. सक्कस्स णं भंते ! देविंदस्स देवरण्णो कति लोगपाला पण्णत्ता ? गोयमा ! चत्तारि